

附圖十五幅

金陵歷代名勝志

曹昱署簽



序

余僑寓金陵之陶谷在清涼山麓相傳是華陽隱君舊居陳君曼生爲余書青峯草堂額雲伯並爲余營松風閣余以暇日棲息於此風日清美輒與二三同志登覽憑弔六朝以來層樓闕殿半爲僧寮酒肆王侯將相才士美人荒塚殘碑歷歷可數暮煙斜日悵惋者久之今年客南陽君以秣陵集見寄自春秋以逮勝國莫不敘其緣起加之考訂參以論斷題詠而贊歎之凡三百餘篇余惟秣陵詩人自唐王昌齡冷朝陽外不多見流寓諸賢則李白鳳凰臺落星石諸篇外亦鮮名作 國朝乾隆中蔣心餘太史僑寓雞鳴山麓署紅雪樓袁簡齋大令營隨園小倉山下均以詩名海內所詠金陵古蹟不過數篇絕無考證王葑亭金陵雜詠詩富矣考之亦未詳君遊茲地不過旬日且出簿書鞅掌之餘而所作之該博閎麗乃如是美矣備矣茲以加矣洵詩乘之鉅觀名山之絕業矣去陶谷二里許爲謝公墩是安石與羲之登覽處太白遊金陵嘗欲營園其上君嘗獨遊於此悅其幽曠思卜居焉此志倘遂余當東歸與君沽白門之酒泛青溪之棹樞染煙有墨吟嘯雲樹陶谷有古梅齊梁物也花開作旃檀味新雪初霽殘月在林喚秦淮美人吹簫暗香疎影中擇卷中詩次第歌

金陵歷代名勝志序

之當不讓王謝諸賢獨擅晉人風味也書以復君並爲之敘
道光二年九月仁和錢杜書於漢上寓廬

序

高青邱有姑蘇雜詠而於金陵惟白下有山皆繞郭一語謝肇淛五雜俎地部引之夫潮打空城山圍故國昔賢探驪之作後無聞焉蓋以東門西戶之形勢左山右湖之標置外以長淮爲襟帶內以大江爲藩籬六代相承二百餘載自非興亡事蹟羅列胸中安能山水英靈瓠捩腕底也哉秣陵集者雲伯先生覽古之所箸也先生畫地成圖升高能賦青燈論史濁酒談詩雅興颺流逸情雲上望雲禮岱曾訂玉檢金繩之文出塞遊灤並多紫濛白霽之作其來金陵不過浹旬凡山川之麗崎郡邑之沿革宮觀之駭娑林亭之幽邃人民城郭之隱賑風土物產之異尙靡不口吟手畫目謔思存洵藝圃之新聞詞林之佳構矣予惟孟堅志地理道元注水經往往借證風詩按圖吻合宋葉石林居用日嘗命諸邑官能文者蒐訪古蹟製圖經主上元簿林邁考最詳多以王荊公詩引證號上元古蹟後史志道修建康志爲助良多故知登眺之篇什抑掌故之權輿也金陵自陳彭年江南錄張敦頤六朝事蹟景定建康志外則有王士點禁扁所引建康宮闕簿金陵志諸書已不概見明周吉甫焦弱候朱元介顧文莊諸公搜羅考核巨細必登彬彬乎郁郁乎可謂盛矣然板橋作記祇

是東京夢華秦淮本事既非南渡續志風騷之旨無與外乘之例亦乖又若分鐘隱爲二人誤茅茅爲一字注玉溪者不知景陽之井正胡誤者反昧白下之門幾乎我屋公墩難分王謝黃腸丹穴莫辨梁陳先生甃管瓊花來尋玉樹流連畫舫觴詠青溪相與覓思話彈琴之石過桓伊邀笛之步酒酣耳熱說龍蟠虎踞之規模紙醉金迷寫粉汰脂妖之情狀詩符三百餘首事萃二千餘年至於才藻之繁富聲調之沈雄則太白鳳臺一律猶嫌貌襲文潛月堂數語遜此襟靈嘉禎捧袂周旋題襟讌集獲預敦槃之末側聞金玉之音花風四吹薇露三盃敬達嗶引聊申瓣香欲起昌黎八代之衰媿非元晏三都之序云爾

道光三年二月長洲後學王嘉福拜書於青溪小吡盧精舍

序

錢唐陳雲伯先生在京師刻其才藻之作爲碧城仙館詩鈔及官江左刻其紀事懷人考古明道之作爲頤道堂文鈔及詩選先生既慨名場宦海之巉巖嶮巖躁進適以致敗也改字曰退菴而讀其書者咸稱頤道先生蓋斂才華於樸實矣先生之改官江左也江以南言文章者莫不宗之金陵爲制府駐節地所遭大吏或不及知或不愜心於先生或不爲先生所心折故試吏十四年而牛首棲霞屐齒未至今年秋以公事至白下旣登覽其山川又憑弔古人之遺蹟返往匝月爲詩數百篇多卓然可傳之作忠邪之辨興衰之故尤三致意於張悌郭璞卞壺桓彝袁粲韋粲王琳孫晟劉仁贍皇甫暉楊邦乂福壽花雲方孝孺景清黃觀桌敬則表章其忠烈於王濬士導陶侃羊侃王僧辨曹彬諸人則美其功而未嘗不論其失宮闈則潘玉兒張麗華孔貴嬪南唐淨德院宮人黃觀妻方孝孺女許其貞烈山林則葛洪劉瓛雷次宗陶宏景明僧紹稱其高尚達摩雲光寶誌之所棲托王昌齡冷朝陽之居處李白杜甫高適蘇軾之所遊覽咸尋繹而歌詠之有經義焉有史裁焉洋洋乎誠詩家之大觀也夫山川之美因人而彰先哲之前言往行有待後人之揚詡也金陵歷六朝至

今二千餘年中閒不乏作者而才不稱題事不證古傳者尠焉茲集於先生辟鄧林之旁枝榮河之別派也而丹青人物藻繪山水也如此且冠以圖加以考綜以表彙以紀事俾鼓白門之棹者一開卷而得之則豈非金陵爲東南之鉅觀而茲文又爲金陵之鉅製也乎均從先生遊也久知之也深旣爲校錄並綜其大略敍之俾讀是集者得所指歸焉

嘉慶己卯十一月嘉善李裕均拜序於吳門桂葉書堂

序

余家居茂苑壤接秣陵雙槩尋秋一筇選夕徘徊邀遂之步流連聽箏之堂訪舊院之鶯花弔故宮之燕麥雲山滿目霜露驚心亦復古愁鬱生吟趣閒觸而塵事牽瀨意緒乖方媿乏倚馬之才殊少探驪之作頤道先生南屏夢禪西溪漁隱湖淥滌筆山翠擁襟旅食春華京邑最久壯遊秋氣邊徼爲多鳳闕龍樓之地紫濛白霽之區擬駱賓王帝京之篇追李君虞關塞作羈宦江表僑寓蘇臺錄風土於吳趨考山川於越絕歌樓持鉢禪榻吹簫詠山塘七里之花聽水閣昨宵之雨可謂風雲氣盛兼多花月閒愁兒女情深不改英雄本色者已偶因羈宦來遊舊都攬蔣阜之煙霞醉秦淮之花月龍蟠虎踞尙論三國之人才燕語鶯啼旁及六朝之佳麗綜二千年之軼事繼三百篇之正聲厥製可謂茂矣覽者能無感乎夫以天塹所限王氣屢鍾吳王鑄劍之池楚國埋金之路青龍之艦教戰赤烏之碑紀功征帆東指壁被軍門迎檐南來櫓開幕府臺城宮殿梁齊之廢基鍾山雲樹陳隋之舊壘元武湖空旌旗日落景陽鐘動樓閣灰飛嘶石馬於松楸臥銅駝於荆棘已足歎墟浩劫索息雄圖矣加以半壁江山中原人物愴懷天闕雪涕新亭謝安石別墅圍棋淮淝告捷祖士稚

中流擊楫關洛歸心溫嶠成陶侃之功郭璞死王敦之難孤城寂寞疇問桓彝遺塚
蕭條客悲卞壺夜築白石之壘曉立青塘之營袁粲宋室忠臣孫晟唐家宰相以及
彥卿搏牀陳喬撤榻莫不手扶日月氣壯山河悼神州之陸沈識忠臣於板蕩至若
六宮贈綬九子飄鈴彼歌玉樹之聲此豔金蓮之步保儀掌書宮人入道娥皇製曲
小妹提鞞亦各絕麗殊尤專房傾國而烽火晨驚釵鈿夕秀水咽青溪之柵苑謝紅
羅之亭壽陽妝冷通替棺埋誰歌桃葉之迎來空羨蘭香之仙去則又辱井洗紅鑑
春波而起怨舞衣慘碧聆秋唱而淒魂者焉亦有內史麾扇散騎彈琴愷之作畫尙
有層樓文通夢花僅餘荒驛茅亭藥院王昌齡之故居烏榜白門冷朝陽之舊宅李
供奉脫裘換酒百年三萬六千場杜司勛蠟屐尋詩南朝四百八十寺又或稚川神
仙著書抱樸華陽宰相臥閣聽松郭文舉倚樹之臺阮孝緒求葭之谷籬門舊居輒
思何點檀橋老屋尙識劉瓛蘿月仄暝松颺盪秋風流式存霞想斯結斯又白雲在
霄肖其高致明星墮地振其朗吟矣若其慧契禪宗默參淨業折蘆憩達摩之洞雨
花禮雲光之臺龍女獻泉金輪造像設重雲之會捨同泰之身談經靈谷曇隱卓錫
而來說法華林寶誌留識而去風旛不動煙磬長圓是又瓦棺出地曾聽經聲寶塔
凌霄難消兵劫者乎今夫山水方滋所期得助簡冊旣邈有待闡幽其或學遜左思

作吳都之賦才輸謝朓詠東田之詩作矣弗美美矣弗備未免慨勝蹟之長湮黯舊
京之無色先生胸羅邱錦手染班香模範山水裁爲篇章嘯傲林泉加之圖繪興懷
觴詠仿永和會稽之遊囅論古今括景定建康之志洵史家之外乘抑詩國之辨才
矣更有請者先生雅志鴻鸞清標蟬蛻石門慕高鳳之居草堂續盧鴻之志異日者
卜宅陶谷營園謝墩花放梅湖樹栽松峴築張昭之湖苑賦沈約之郊居蕭寺題碑
攝山采藥落星高巖蓬池招飲江潭舊苑昌谷賦詩賞心亭上願陪東坡之俊遊建
康軍中請侍南軒之講席謹敘

道光二年九月長洲後學王嘉祿序於廣陵瓊花觀之無雙亭

自敘

金陵於禹貢爲揚州之域舊說春秋時進退吳楚之間考左傳魯襄公三年楚子重伐吳克鳩茲至於衡山鳩茲今蕪湖衡山今江寧上元溧水境之橫山也懸軍深入始及邊鄙則吳地而非楚地可知句踐滅吳於此築城以謀楚今長千里之越城是其遺趾楚人滅越埋金以厭王氣爰有金陵之名江表傳以爲楚武王寔字記以爲楚威王以史記越世家證之則威王爲可信矣甘茂傳范蠡言楚南塞厲門而郡江東是楚置金陵呂屬江東郡也秦并天下置三十六郡屬會稽始皇東巡江淮旣鑿曲阿以通江又鑿方山以通淮並改金陵爲秣陵而項羽數敗烏江亭長日江東雖小地方千里猶舉楚故郡名言之秦漢之際又分會稽爲鄞郡漢爲丹陽郡漢時揚州治壽春漢末袁術據壽春徙揚州治於金陵孫策渡江劉繇徙居曲阿金陵遂爲孫氏所有建安十六年孫權徙治秣陵明年城石頭改秣陵爲建業遂徙都焉晉武帝太康元年平吳改建業爲秣陵元帝渡江是爲東晉宋齊梁陳遞相篡奪隋平江南城郭宮室悉皆盪平別建州蔣於石頭唐初廢郡以江甯縣隸潤州屢更其名後置揚州更名蔣州又置江甯郡改昇州楊吳時爲金陵府更建城郭南唐名江寧府

宋初爲昇州尋爲江甯府建炎三年改名建康元初爲建康路天歷二年以文宗潛邸改名集慶路明初爲應天府式廓舊基外門十七內門九凡九十餘里成祖北遷後遂爲留都入

國朝爲江甯府上元江甯二縣隸焉計自春秋至今二千餘年入爲國都其間帝王之所締造將相之所經營奸雄之所覬覦忠臣義士之所慷慨而奮發以及文人詞客之所登覽豔妃佚女之所藻飾名儒隱君高僧之所棲托咸於是乎在閒嘗升高而望山則鍾阜天闕盧龍落星雞籠覆舟之屬蜿蜒而繇亘水則秦淮青溪運瀆潮溝城濠御河綺交脈注而大江虹貫於其外遺趾則臺城石頭東府官司之署苑囿之娛籬門之衛僑置之鄉邑星羅棋布咸使人流連憑弔想見當日之壯麗誠東南一大都會也僕羈官江左十有四年茲以于役始遂遊覽深惟圖經茫昧有乖文獻人物湮塞未盡揚詡乃博稽載籍形爲詠歌證其謬誤加以論斷匪曰辭章抑史論之亞也昔少陵有詠懷古蹟之作香山有秦中吟東坡有鳳翔八觀詩不揣穉昧竊附斯義俾後之覽者有所尋繹云爾

嘉慶己卯八月錢塘頤道居士自敘於秦淮停雲水榭

吳越楚地圖考

金陵在春秋時本吳地未有城邑惟石頭東有冶城傳云夫差冶鑄於此卽今朝天宮地去府東南一百二十里當溧水溧陽之間有固城云古瀨渚縣亦吳所築周景王四年楚靈王敗吳軍陷固城吳移瀨渚於溧陽南十里周迴七里爲陵平縣又敗於楚更名平陵縣後闔閭將伍員破楚燒固城遂廢元王四年越句踐用范蠡謀將圖楚稱伯江淮乃築城於金陵長千里以強威勢城周二里八十步在今聚寶門外長千里俗呼越臺卽其地金陵有城邑自此始也顯王三十六年楚威王滅越盡有吳故地乃擅江海之利因山立號置金陵邑於石頭後之石頭城據此今石頭城門北岡壘削絕皆城故區

按城邑之設冶城最先越城次之楚金陵邑又次之至諸山之名古人尙質雖籠覆舟義取形似盧龍名始晉元以五馬南渡形似塞上盧龍得名茲圖列之誤也

秦秣陵縣圖考

秦始皇二十五年滅楚并天下分三十六郡置守尉監以金陵地屬鄣郡改金陵邑爲秣陵縣三十七年東巡會稽過吳從江乘浦渡置江乘縣皆統於鄣又以望氣者之言鑿鍾阜斷長塹以泄王氣水自方山西北巨流環繞至石頭達於江後人名曰秦淮考之鄣郡不詳治所志云在石頭城地史載吳興郡西金陵本吳興西境也秣陵云在城東南六十里秣陵浦處今秣陵鎮卽其地江乘按建志康云在城西北十七里南徐州記云在縣西二里有浦發源於石頭東入大江因以爲名又按吳徐盛作疑城自石頭至江乘當在石頭之東北幕府之西南也建康志圖載江乘於瑯琊東恐非

按茲圖所列淮水爲經吳越楚城未聞毀削宜仍其舊茲圖有越城而無吳楚誤也

漢丹陽郡圖考

漢滅秦以江南地封楚王韓信荆王劉賈吳王劉濞皆大國元符二年改鄣郡爲丹陽郡屬揚州統縣十七秣陵湖熟永平江乘句容溧陽隸焉皆鄣郡舊地東漢移郡治宛陵至建安十三年孫權領丹陽郡自宛陵還治秣陵改秣陵爲建業郡在淮水之南按矣苑記去長樂橋東一里南臨大路長樂橋今武定橋東南有長樂巷蓋自東城角之內外皆是郡治城周一頃開東南北三門漢揚州無定治或治壽春或治曲阿或治歷陽治建業爲多亦在淮水之南去丹陽城東南二里建鄴卽秣陵舊治湖熟在今東南六十里淮水之北有湖熟鎮永平在今溧陽南十五里溧陽在今溧水之固城江乘仍秦之治句容卽今治也

按蔣山本名鍾山因孫吳移都建業上避祖諱又以蔣子文見神騎亭改名蔣山則漢時未名蔣山也又後湖至宋元嘉中因黑龍見始名元武則湖名亦誤也

孫吳都建業圖

初東漢末以秣地封孫策爲吳侯至弟權據有江東築石頭改秣陵爲建業建安十三年移丹陽郡治建業黃龍元年遂徙爲都都城在淮水北五里據覆舟山下東環平岡以爲安西城石頭以爲重後帶元武湖以爲險前擁秦淮以爲阻周迴二十里十九步詳見後考赤烏十年作太初宮周迴五百丈作八門前五門曰公車曰昇賢曰明陽曰左掖曰右掖東一門曰蒼龍西一門曰白虎後一門曰元武都城之正門曰宣陽又南五里至淮水有大航門時都城皆設籬曰古籬門宮之後有苑城晉所謂臺城卽今西十八衛以南元津橋大街以北皆是赤烏四年東鑿渠名青溪自城北塹洩元武湖水九曲西南入秦淮西鑿運瀆水自倉城東入今內橋與青溪合南由今乾道橋至斗門橋達於秦淮又夾淮立柵謂之柵塘金陵建都自吳始

按建康實錄載吳大帝赤烏四年詔鑿東渠名青溪通北塹潮溝又輿地志青谿發源鍾山入於淮連綿十餘里則青溪當自蔣山沂源至運瀆在西州之東自笕橋西南流入秦淮而不言上游所受何水今以建康志建康實錄諸書考之其記潮溝云東經閶闔西明二門接運瀆又云其溝東頭已湮塞纔有處所

西頭則現通運道乃知運瀆所受乃潮溝水耳蓋潮溝之水分兩派一由城外入青溪志所謂鑿東渠通北塹者是也一由宮中通運瀆實錄所云開城北渠引後湖水流入新宮齊書所云後湖水頭經過宮內是也今其道久湮計在唐時此水猶在故實錄以爲現通運瀆則上游瞭然矣至潮溝當卽陳之珍珠河建康志云潮溝吳大帝所開以引江潮考六朝時江水當由盧龍山畔通後湖故晉書南史皆有於湖肄舟師閱水軍之事潮溝名引江潮而實通湖水今珍珠河正由北水關引後湖水入城又以青谿通城北塹潮溝之說證之今珍珠河入自北水關於六朝略當北塹又實錄云吳寶鼎二年開城北渠引後湖水流入新宮然則潮溝入宮實白寶鼎至陳人乃有珍珠河之號耳此圖青溪不詳發源鍾山之處又有運瀆而無潮溝皆誤也潮溝當自太平門北水關入城經大橋珍珠橋至浮橋合於楊吳城濠之水至竹橋合青溪之水至復成橋合明御河之水過大中橋至東水關與淮水合乃爲詳盡又燕喜湖乃梁昭太子遷葬始有其名今先列之亦誤

東晉都建康圖考

晉武帝平吳徙揚州治建業在冶城之東丹陽郡仍舊治統縣永平江乘湖熟丹陽句容溧陽改建營仍爲秣陵後又徙秣陵於宮城南八里一百步小長干巷內分淮水北之地復置建業治在宣陽門內以丹陽西置江甯元帝渡江避愍帝諱改建鄴爲建康遂爲都號東晉以宰相領揚州牧築城於青溪東南臨淮水上名東府城別舊治爲西州城以丹陽守爲尹於江乘南置琅瑯郡領臨沂卽邱陽都懷德四縣以處從帝之渡江瑯琊在今句容瑯琊鄉臨沂在今上元之長甯鄉卽邱陽都在臨沂之境懷德在今上元之鍾山鄉又僑置淮南魏廣川高陽堂邑南東海南東平南蘭陵八郡并寄京邑宮城仍吳之舊成帝作新宮繕苑城修六門宮城正南曰大司馬北昌平門東西二門曰東掖西掖大司馬門與都城宣陽門對宮又南出至淮水上置朱雀門卽吳之大航門也都城十二門南北各四東西各二詳見於圖淮水上設浮航二十有四朱雀航卽朱雀門處在今鎮淮橋東後移至橋處蓋據淮爲阻有事撤航爲備卽吳柵塘之意也成帝時徙建康縣於御街西

按此圖青溪發源蔣山引後湖之水而無潮溝是混青溪潮溝而一之也至湘

宮寺乃宋明帝故居捨宅爲寺今圖已有湘宮港亦誤

南朝都建康圖考

東晉旣亡宋齊梁陳相繼爲據宮城都城皆仍於晉號京輦神皋初劉裕逼晉主宮於秣陵縣後乃自郢晉宮元嘉二年於臺城東西開萬春千秋二門都城十二門南面次西門宣陽次東改開陽曰津陽最東曰清明最西改陵陽曰廣陽北面次西曰元武次東曰廣莫最西曰大夏最東曰延熙正東面曰建春次南曰東陽正西面曰西明次南曰闔闔宣陽爲正門與宮大司馬門直對津陽與宮南掖對建春西明二門達於宮前之直街者宋於朱雀門之南渡淮五里又立國門在長干東南以示觀望齊皆因之梁置石闕於端門外改朱雀門稍西在今鎮淮橋北侯景攻臺城燒大司馬門陳復營治改宮萬春門爲雲龍改千秋門爲神武改都城廣莫門爲北捷揚州治丹陽郡治皆仍舊宋省懷德卽邱陽都三縣盡入臨沂省永平縣入溧陽梁武生於秣陵同夏里因以其地置同夏縣在今上元之長樂鄉陳以琅琊三郡地置建興郡領建安同夏烏山江乘臨沂湖熟六縣丹陽江寧建康秣陵句容溧陽仍隸丹陽郡

按此圖青溪潮溝之誤與前圖同陳之大壯觀臨後湖觀水師失載至清涼山古無此名當卽石頭山清涼道場之名始於南唐本楊吳興教寺之舊宋人始改名清涼廣惠寺則此圖列亦誤也

隋蔣州圖考

隋文帝開皇九年平陳建陳城邑宮闕并蕩耕墾六朝之跡不復有存者廢丹陽郡平其城以爲田乃於石頭置蔣州依漢置太守以司隸刺史相統析溧陽丹陽之地置溧水縣十八年廢溧陽并入溧水與江甯當塗三縣屬蔣州大業初改蔣州復名丹陽郡省建康秣陵江夏三縣入江寧又廢臨沂丹陽湖熟三縣亦入江甯與溧水二縣仍爲丹陽郡所統初揚州治徙蔣州城內廢東府城後末年以江都爲揚州置總管府句容屬焉自後揚州之名專於江都矣

按此圖所列有青溪而無潮溝亦沿前誤隋平江南六朝舊蹟悉遭蕩墾後來煬帝南巡止於廣陵不至金陵當亦自知其夷塹之過甚矣否則山川佳麗遠揚州且形勝足以自守中原雲擾尙可偏安胡爲戀戀於雷塘數畝田耶殆天奪之魄矣至大業二年起宮丹陽將遜於江左而已無及也清涼寺誤亦同前

唐昇州圖考

唐滅隋分天下十道丹陽郡屬江南東道武德二年置行臺尙書省三年改江寧縣爲歸化縣又改爲金陵縣又析其地爲安業縣尋廢以句容縣置茅州析江甯溧水之地復置溧陽縣七年置行臺爲大都督府復蔣州仍改茅州爲句容縣與金陵溧水溧陽屬蔣州九年徙金陵縣於白下村曰白下縣貞觀七年復改爲歸化九年仍爲江甯至德二載析置江寧郡而縣廢乾元元年改郡爲昇州上元二年廢州爲上元縣治在西州城地先啓中遷鳳臺山之西大順元年復置昇州統上元句容溧水溧陽四縣按宮苑記隋大業六年置金陵城在元風觀南園又按唐李孝恭破賊築唐府城近石頭天復二年僞吳楊行密克昇州將徐溫改築金陵城貫秦淮卽以州治爲府以府治爲宮恐南唐宮卽昇州治所也

前 按湘宮寺爲宋明帝捨宅宅在青豁今移在州治西北誤青溪清涼寺誤亦同

南唐江甯府圖考

初僞吳楊行密子溥在唐末取昇州後將徐溫自領昇州改築城郭爲金陵府至石晉天福元年爲吳天祚二年溫假子知誥篡吳以金陵爲西都改金陵府爲江寧府遂以府治爲宮以城爲都國號唐復姓李更名昇城周二十五里比六朝都城近南貫秦淮於城中西據石頭卽今石城三山二門南接長干卽今聚寶門東門以白下橋爲限卽今大中橋北門以元武橋爲限卽今北門橋橋所跨水皆昔所鑿城濠也今通濟三山水關卽當時淮水出入處青溪九曲至是爲築城絕其流今竹橋下水西入舊城濠者乃自潮溝從西南流之故道自舊內傍南流經淮清橋合秦淮者則城內所存之一曲內橋之北東盡昇平橋西盡大市橋北至小虹橋此宮城之限內橋南直抵聚寶門大街卽當時御街也按志宮前御街傍夾大溝雜植槐柳臺省相望今溝猶存江甯府治改於宮城之東割上元南十九鄉與當塗北二鄉復置江甯與上元二縣皆治郭下江甯治在北門內上元治仍唐舊句容溧水溧陽亦仍舊治焉

按陸游南唐書瓦官寺因山爲基高可十丈開寶中宋師下江南士大夫豪民

富商之家婦女數千人避難其上吳越兵士舉火焚之一旦而燼焦氏筆乘云
今驍騎衛倉是其遺址登閣江山滿目最爲勝處詔毀私創菴院集慶菴一點
僧妄以瓦官名其處得免今新橋西杏花村有下瓦官寺卽集慶菴又有上瓦
官寺本名叢桂菴焦茲易名鳳遊寺顧起元客座贅語云瓦官寺在淮水南城
外小長干在瓦官寺南西出大江其後洲渚漸生江去長干遠而楊吳築城圍
淮水於內瓦官寺遂在城內瓦官寺南唐改曰昇元寺閣其地當與鳳臺相近
而此圖不載實爲缺略

宋建康府圖考

宋開寶八年南唐滅復昇州仍以宮爲治州隸江南東路天禧二年陞江甯府建康軍節度使封壽春郡王爲昇王建國後卽位是爲仁宗以昇爲大國不以封諸皇子其守臣皆以宰執近臣爲之徙上元縣於城東北南唐司會府地建炎三年改江甯府爲建康府又徙上元於城東隅紹興三年高宗駐蹕明年徙府治於東錦繡坊今舊內處以府治地爲行宮設留守命守臣兼之安撫制置總領轉運提領御前馬步軍諸司皆治於此行宮卽南唐宮地前內橋今改天津橋其下水引青溪由東虹橋（今昇平橋）周繞大內東西三隅經西虹橋（今大市橋）復合清溪曰護龍河城皆僞吳順義中所築由尊賢坊（今里仁街口）出東門由鎮淮橋出南門（今聚寶門）由武衛橋出西門（今石城門）由清化坊出北門（今北門橋南大街）由斗門橋出龍光門（今二山門）以上元江甯爲赤縣溧水溧陽爲畿縣比西京故事

按明初改建都城惟南城大西水西三山不改更名聚寶石城三山則尙屬楊吳之舊也志載賞心亭在宋下水門城上下水門今水西門下臨秦淮丁謂出鎮張袁安臥雪圖處稱爲山水絕境今城上並無此亭隘於民居山水亦未見

稱最勝又志載折柳亭在賞心亭下宋張詠建爲祖餞之所又志載白鷺亭在白鷺洲上去府治西南八里今洲已坍沒地名草鞋夾今有折柳亭而無賞心亭既略北宋府治卽南唐舊宮在內橋盧妃巷廣儲倉一帶南宋府治卽今舊內與白鷺洲皆不合西南八里之數又志載橫江館在水西門外賞心亭側事有明證此圖折柳白鷺二亭並繪入水西門內似未確也張麗華墓在賞心亭天井中賞心亭有着則墓亦有着折柳白鷺二亭有着則賞心亭亦有着也益六朝相沿惟臺城石頭東府三城爲犄角之勢餘皆在城垣之外故青溪與賞心亭處不甚遠耳

元集慶路圖考

元至元十二年卽建康府治開省設建康宣撫司江東建康道提刑按察司又設江東道宣慰司江淮等處行中書省行樞密院十四年更立建康路總管府以宣慰兼本路達魯花赤就僉廳君子堂內署府事十六年徙治於西錦繡坊大軍庫內今府治處隸宣慰司以達江浙行省按察司政肅政廉訪司因避行臺遷治寧國府路治遷徙不常嘗於上元縣與軍器庫內置治元貞二年又徙府於銀行街東南佳麗樓地今江寧縣治大德四年徙於龍翔寺基今武學處後終於銀行街天歷二年以路爲潛邸改名集慶城中置錄事司管治城內徙江甯縣於南門外越臺側陞溧水溧陽爲州領三縣二州一司比京畿例與陝西奉天路徑隸行御史臺城仍宋舊呼西門曰大西龍光門曰水西

按湘宮寺應在青溪此圖在北距青溪遠未是

明都城圖考

明太祖於元至正丙申三月取集慶路戊申混一海內改路爲應天府大建城闕考諸都城之域惟南門大西水西三門因舊更名聚寶石城三出自舊東門處截濠爲城沿淮水北崇禮鄉地開拓八里增建南出者二門曰通濟正陽自正陽以東而北建東出者一門曰朝陽自鍾山之麓由龍廣山圍繞而西抵覆舟山建北門曰太平又西據覆舟山雞鳴山（卽雞籠山）緣湖水以北至直瀆山而西八里又建北出者二門曰神策金川自金川北繞獅子山（卽盧龍山）於內雉堞東西相向亦建二門曰鍾阜儀鳳自儀鳳迤邐而南建定淮清涼二門以接舊西門而周門西出者五由聚寶北至金川神策比通濟正陽至太平之南北倍之由朝陽至石城三山比定淮至神策之東城三山水門至通濟水門之東西亦倍之東盡鍾山之南岡北據山控湖西阻石頭南臨聚寶貫秦淮於內外橫縮屈曲計周九十六里外郭西北據山帶江東南阻山控野闢十有六門東五曰姚坊仙鶴麒麟滄波高橋南七曰上方夾岡雙橋鳳臺馴象大安德小安德西一曰江東北三曰佛寧上元觀音周一百八十里

按明建都城惟南門大西水西三門尙沿其舊卽楊吳據廣陵時徐知誥所建

也知誥久懷篡奪之志此三門爲廣陵至金陵要路築城最固水西門橋伏城下水漲舟不能行增建南出者自通濟始則通濟水關今所稱東水關者亦楊吳之舊也此關爲淮水入城要路而伏在水底非直不能行舟且於受水不暢知誥陰懷割據明初諸臣亦皆無識因循其舊又斷青溪之流使居人旣不得暢沾水利又汾澮流惡之謂何惜哉或曰二水關之設以防外侮天下有道守在四裔蟻封鼠穴豈帝王之度哉

歷代互見圖考

歷代城邑變置若不可悉辨然鍾山自東北而迤邐於西南大江自西南而環抱於東北覆舟阻其後聚寶當其前青龍石碓掖其左右頭三山踞其右秦淮橫其中考諸漢以後郡城皆在淮水之南六朝宮城皆在淮水之北而近於覆舟楚秦隋唐之城皆在淮水西北而據於石頭楊吳以後之城皆跨淮水之南北而近於聚寶明因山距淮盡乎四極

國朝因之爲省城以是據方辨位庶幾可得矣按六朝宮城正門曰大司馬門南對都城之宣陽門二里宣陽門南對朱雀門五里臺省相望爲御街朱雀門臨淮水上朱雀航北今考鎮淮橋東南桐樹灣處當是航所中正街府軍營內小橋當是宣陽門處直出北口西華門西大街當是大司馬門處舊國學成賢街南口當是宮後平昌門處珍珠河正在宮內也成賢街外號以東抵西十八衛之後當爲都之北城宋上元縣西細柳營直北當爲東城舊武學以北當爲西城其規模大略可見南唐之宮前臨內橋東盡昇平橋西盡大市橋北盡小虹橋爲子城之限宋行宮卽此內橋南直抵鎮淮橋此則南唐之御街也志云鎮淮橋卽朱雀橋者蓋蕭梁時移航於此

遂名舊航之處唐所謂長樂渡也南渡長樂一里抵東城角內外皆丹陽郡城之基又東南近倪塘乃晉王含五城又南當是古揚治清涼山地以至石頭山脊爲楚金陵邑城又北爲唐韓滉五城少東南則隋蔣州城又東則冶城今朝天宮處又西抵下街有西州橋卽西州城地唐上元縣城亦是其處皆石頭之麓相去不遠南循三山水關內下浮橋北爲賞心亭少西爲折柳亭出水關中街水環爲繞處當爲白鷺洲洲之上今普惠寺當是李白酒樓繞南城角高處卽昇元閣舊基少北高阜皆鳳凰臺山少西卽建初寺寺西卽杏花村聚寶門外爲長干向西爲越城少南爲秣陵城東南爲國門轉東至通濟跨城處當爲東府城大中橋東畔爲白下亭長安街西口當爲宋永安宮北抵竹橋之側當爲金華宮六朝城後今府學處爲元圃小教場西門內爲上林苑將臺處當爲樂游苑蔣廟之西南當爲商飈館西北爲親蠶宮此皆可因據而互見者也

按此圖賞心亭繪在城內與宋圖合當有據近得

國朝劉錫旂白下餘談載王元倬鳳皇臺尋賞心亭故址詩注云賞心亭宋丁謂建張帝所賜袁安臥雪圖者在水門城上卽今水西門城俯臨秦淮似當自北少折於東在今上下浮橋間乃其城處非今日形勢蓋明初將故城盡擴之亦不知其何所本也

國朝省城圖考

世祖章皇帝順治二年五月

豫王統大兵南下江南軍民投誠改南京爲江南省以應天府爲江寧府領縣如故設江南布政使司及提刑按察使司都使司督糧驛傳等衙門于江甯府治中總督江南江西部院衙門駐節在焉城郭因門之舊惟閉清涼鍾阜定淮金川四門而洪武三山等門無改順治十六年改神策勝爲得勝門以旌武功又築滿城於青溪之東太平門沿舊皇城牆基至通濟門止開一門以通出入爲滿州大兵屯駐之地駐防將軍等開府於此其總兵府以舊臨淮府第爲之在西華門大街之右外郭門城垣舊多頽毀所存者僅高橋滄波江東二三處其城內外橋梁水道惟利涉橋新建於桃葉渡餘皆無改於舊

金陵歷代紀年事表

金陵自孫吳以來九爲國都非立表以載無以資稽考景定志表失之過繁又託始周秦可徵者尠今從新江甯府志斷自三國孫吳始

孫吳

漢獻帝建安二年孫策始封吳侯

十六年孫權徙治秣陵明年城石頭改秣陵爲建業

大帝權黃龍元年遷都建業

赤烏八年陳勳鑿破岡作邸閣

十年改作太初宮

十三年廢太子和處故鄣立子亮爲太子作棠邑涂塘

太元二年薨葬蔣陵

廢帝亮太平二年孫琳廢帝爲會稽王迎立景帝

景帝永安五年立子暉爲皇太子

六年建業石頭小城火燒西南一百八十字

七年帝崩濮陽興張布言於朱太后廢暉立皓

後主皓甘露元年殺朱太后於苑中十一月徙都武昌以丁固諸葛靚鎮建業
寶鼎元年自武昌還建業

二年起昭明宮

建衡三年載太后後宮自牛渚陸道西上呼云青蓋入洛陽遇雪始返
天紀四年晉王濬以舟師至建業皓降

西晉

武帝太康元年平吳改建業爲秣陵

二年分秣陵北爲建業改業爲鄴

三年分建鄴置江甯

十年吳敬王宴受封食丹陽吳興並吳三郡丹陽設立內史

惠帝太安二年張昌反遣其將石冰攻破揚州

永興二年陳敏克石冰遂據江東反顧榮等密圖斬之

懷帝永興元年以琅邪王睿都督揚州江南諸軍事假節鎮建業

孝愍帝建興元年改建業爲建康

東晉

元帝建武元年愍帝詔使居攝乃卽晉王位備百官立宗廟社稷於建康

太興元年改丹陽內史爲丹陽尹

二年立郊邱於建康之已地

三年立懷德縣以處琅邪國人

永昌元年王敦舉兵武昌反入石頭城不朝帝返閨月帝崩葬建平陵

明帝太甯二年王敦舉兵自姑熟至溫嶠等敗其軍敦憤惋死

三年帝崩葬武平陵

成帝咸和二年豫州刺史祖約歷陽太守蘇峻反入姑熟屠于湖卞壺等拒戰於冶城死之峻逼遷天子於石頭城四年帝在石頭匡術以苑城歸順峻子碩攻臺城焚太極東堂秘閣皆盡峻旋被斬於陣溫嶠等議欲遷都王導不可乃止

五年造新宮始繕苑城

八年始於覆舟山南立北郊

咸康元年石季龍入寇帝觀兵廣莫門

三年詔立太學於淮水南

六年復琅邪比漢豐沛

七年實編戶王公以下皆土斷白籍

八年崩葬興平陵

海西公太和六年桓溫詣闕廢帝迎立會稽王昱是爲簡文帝

簡文帝葬高平陵

孝武帝甯康元年除丹陽竹格等四航稅

太元三年作新宮

八年謝元破秦師於淮淝衛將軍謝安勞還師於金城

十年苻堅爲慕容沖姚萇所逼請救太保謝安救秦帝於西池餞安安病歸八月薨

十七年新作東宮

二十一年造清暑殿新作永安宮九月帝崩於清暑殿葬隆平陵

安帝隆安二年兗州刺史王恭反其前鋒劉牢之降還襲恭破之

五年妖賊孫恩反至建業豫州刺史譙王尚之等擊走之元興元年荊州刺史桓元

反命驃騎大將軍元顯討桓元王師敗桓元殺元顯

二年桓元篡位僭國號楚改元永始遷帝於尋陽降爲平固王

三年帝在尋陽劉裕起兵破桓元兵於江乘又破於覆舟山元走裕乃具百官置留

臺是年濤水入石頭敗舟萬計義熙元年乘輿反正

六年廣州刺史盧循反襲建康京師戒嚴築藥園柎浦廷尉三壘

九年罷臨沂湖孰皇后脂澤田以賜貧人

十年城東府

十四年帝崩葬休平陵

恭帝元熙元年劉裕廢帝爲零陵王宮於故秣陵宋永安二年弑之葬沖平陵

宋

武帝永初元年卽位詔舊郡縣以北爲名者悉除之寓立於南者聽以南爲號

三年崩葬建康縣蔣山初甯陵

少帝景平二年徐羨之傅亮等廢帝爲營陽王迎立宜都王義隆是爲文帝六月徐

羨之使邢安泰弑帝於金昌亭文帝元嘉十四年鳳凰見於都下改其地曰鳳凰里

十五年立儒學館於北郊作東宮

十六年立元素學史學文學江左風俗於斯爲美

二十二年築北隄立元武湖於樂游苑北興景陽山於華林園

二十五年新作闔闔廣莫二門改先廣莫曰承明開陽曰津陽

二十七年魏太武帝窺江至瓜步

三十年元凶劼弑逆帝崩於合殿葬長甯陵

孝武帝元嘉三十年起兵討逆劼帝至新亭衆推卽位改新亭曰中興亭二凶及同逆並伏誅

孝建元年南郡王義宣反伏誅詔開建仲尼廟起正光殿大明元年改景陽樓曰慶雲樓清暑殿曰嘉禾殿芳香琴堂連理堂建康秣陵二縣各令置都官從事一人司水火劫盜

三年以揚州所統六郡爲王畿以東揚州爲揚州於元武湖北立上林苑移南郊壇於牛頭山以正陽位立皇后蠶宮於西郊

五年起明堂於國學南丙己之地初立馳道自閭闔門至朱雀門又自承明門至元武湖

六年新作大航門置凌室於覆舟山修藏冰之禮詔上林苑內士庶邱墓欲還合葬者勿禁

七年於元武湖大閱水師二月校獵於烏江登六合山十一月祀梁山
大閱水師於中江十二月於博望梁山立雙闕

八年崩葬秣陵縣巖山景甯陵

前廢帝卽位以王畿諸郡爲揚州以揚州爲東揚郡罷南北馳道

永光元年以石頭城爲長樂宮東府城爲未央宮北邸爲建章宮南第爲長楊宮毀

殷貴妃新安寺十一月湘東王彧等使壽寂等弑帝葬秣陵縣南郊壇西

明帝泰豫元年崩葬臨沂縣莫府山高甯陵

後廢帝元徽元年桂陽王休範反蕭道成出頓新亭討斬之

五年王敬則等陰結楊玉夫弑帝葬秣陵縣南郊壇西蕭道成以太后令貶帝爲蒼

梧王迎立順帝

順帝昇明元年沈攸之舉兵袁粲據石頭城謀誅蕭道成不果死

三年蕭道成廢帝爲汝陰王居丹徒宮齊建元元年監人弑王以疾赴葬遂甯陵

齊

高帝建元元年卽位

二年立六門都牆

四年崩

武帝以宋元嘉二十七年生於青溪宮齊國建爲世子以石頭爲世子宮建元四年

卽位立河南王長懋爲太子是爲文惠太子

永明元年築青溪舊宮作婁湖苑

五年幸芳林園禊宴初起新林苑先是立商飈館於孫陵岡世呼九日臺至是幸焉

六年幸琅邪城講武

九年幸琅邪城講武觀者傾都普賜酒肉

十一年皇帝薨立皇孫昭業爲皇太孫七月帝崩葬景安陵

廢帝鬱林王武帝崩帝以太孫卽位隆昌元年西昌侯鸞以太后令廢帝爲鬱林王蕭詵等弑之迎立海陵王昭文廢帝海陵王立宣城王鸞輔政尋以太后令廢帝爲海陵王使宣城王入纂皇統十一月王有疾遣御師殞之先是武帝立禪靈寺於都下當時以爲壯觀識者謂鼎業遷移之象

明帝卽位罷武帝所起新林苑以地還百姓廢文惠太子所起東田斥賣之

永泰元年王敬則反伏誅巫覡云後湖水頭經過宮內致帝疾帝決意塞之欲南引淮流會崩事寢葬興安陵

東昏永元元年淮水變赤如血都下大水死者甚衆始安王遙光據東府反陳顯達反至都

二年崔慧景反入建業雍州刺史蕭衍舉兵反

三年龍鬪於建康淮激水五里九月蕭衍兵至南豫州李居士以新亭降徐元瑜以東府城降十二月王珍國張稷率兵入弑帝宣德太后令追封爲東昏侯立和帝帝以閱武堂爲芳樂苑又於苑中立店肆模大市置射雉場二百十六處置屏除長圍道路隔絕殿內火燒璫儀十餘殿北至華林園西至秘閣三千餘閒起芳樂等七殿又別爲潘妃神仙玉壽三殿剝取諸寺塔寶珥以爲飾和帝中興二年梁受命奉帝爲巴陵王宮於姑孰戊辰梁遣鄭伯禽弑之追尊爲和帝

梁

武帝宋孝武大明元年帝生於秣陵縣同夏里三橋宅東昏旣誅帝入鎮殿內是日鳳凰集建業命焚東昏淫奢異服六十二種於都街

天監四年立建興苑於秣陵建興里詔立孔子廟置建康三官號南獄廷尉三官爲北獄置集雅館作東宮

六年有三象入建業改閱武堂爲德陽堂聽訟堂爲儀賢堂

七年作神龍仁虎闕於端門大司馬門外新作國門於越城南

九年新作緣淮塘起後渚籬門迄三橋幸國子學試胄子十年初作宮城門三重樓

及開二道

十二年新作太極殿爲十三間以從閨數

普通二年置孤獨園改作南北郊火延燒後宮屋三千間大通元年初帝親同泰寺至是開大通門以對寺之南門幸寺捨身

中大通元年都下疫帝於重雲殿爲百姓設救苦齋

大同元年幸同泰寺捨身鑄十方銀像

二年都下地震生白毛長二尺

三年幸同泰寺捨身鑄十方金銅像幸阿育王寺設無礙法喜食

七年於宮城西立士林館

太清元年帝捨身光嚴重雲二殿游仙化生皆震動三日乃止

二年假景反至建業陷東府城

三年陷宮城帝崩於淨居殿葬修陵帝於鍾山造太愛敬寺青溪邊造智度寺又修

飾國學增廣主員立五經博士簡文帝太寶元年侯景逼帝幸西州曲宴

二年幽帝於永福省

元帝承聖元年王僧辨等乘潮入淮進至禪靈寺前侯景塞淮口緣淮作城自石頭

至朱雀街十餘里陳霸先於石頭西落星山築柵連八城景亦於石頭東北築五城尋爲僧辨所滅

二年王僧辨鎮建康有齊師移鎮姑孰旋還建康

敬帝紹泰元年王僧辨納貞陽侯淵明入建康陳霸先使侯安都襲石頭殺王僧辨父子徐嗣徽襲建康據石頭北齊遣兵據姑孰又於胡墅渡米及馬以應之侯安都襲胡墅霸先立柵於冶城

太平元年徐嗣徽合兵十萬向梁山齊兵至秣陵故城跨淮立柵自方山進及兒塘潛至鍾山龍尾趨莫府山又至元武湖陳霸先屯樂游苑東及覆舟山北縱兵大戰齊師潰江乘攝山鍾山諸軍相次克捷生擒徐嗣徽
二年遜位於陳陳奉爲江陰王薨於外邸

陳

武帝永定元年幸鍾山祠蔣帝詔出佛牙於杜姥宅

二年營太極殿有樟木流泊陶家後溇

三年崩葬萬安陵

文帝天嘉元年迎葬梁元帝於江寧詔逐食流移者不問僑舊悉令著藉同土斷之

法以建安等八郡置東揚州

五年罷南丹陽郡城西城

天康元年崩葬永甯陵

宣帝大建四年詔自梁亂離東宮焚燼太子居永福省可剏築東宮

五年齊泰州瓜步胡墅等城降

七年焚陳桃根所上織成文錦被於雲龍神虎門幸樂游苑采甘露宴羣臣詔於苑

內龍舟山作甘露亭

十年立方盟壇於婁湖立建興郡領建安同夏烏江江乘臨沂湖熟六縣屬揚州

十四年始興王叔陵據東府反帝崩葬顯甯陵

後主至德二年於光照殿前起臨春結綺望仙三閣

禎明二年有羣鼠無數自蔡洲岸入石頭渡淮至於青塘大風激濤水入石頭建業

城無故自壞青龍出建陽井起齊雲閣隋大作戰舡投木枋於江

三年隋總管賀若弼自廣陵北道濟京口陷南徐州進據鍾山白土岡至樂游苑韓

擒虎自南道橫江濟采石陷南豫州至新林石子岡任忠引從朱雀桁趨南掖門而

入帝自投於井隋晉王廣自六合桃葉山濟江入據京城斬張貴妃勝於中橋

隋

文帝開皇九年平陳詔建康城邑並平蕩耕墾於石頭置蔣州江左自東晉以來刑法疏緩至是盡更變之

十年蘇威作五教百姓怨之陳之故境皆反楊素平之廢丹陽郡併秣陵同夏建康三縣入江寧

煬帝大業初置丹陽郡

十三年起宮丹陽將遜於江左

唐

高祖武德二年置揚州東南道行臺尙書省

三年以江寧溧水二縣置揚州析置丹陽溧陽安業三縣更江寧曰歸化以句容延陵二縣置茅州以杜伏威爲使持節總管江淮以南諸軍事揚州刺史輔公祏克丹陽進屯溧水平李子通杜伏威徙居丹陽

六年以延陵句容復隸揚州更歸化曰金陵輔公祏據石頭反

七年趙郡王孝恭平公祏更揚州爲蔣州廢行臺

九年廢都督更金陵爲白下以延陵句容隸潤州以溧水溧陽丹陽隸宣州

太宗貞觀七年更白下縣曰江寧縣

肅宗至德元載封顏真卿丹陽縣子

二載以江寧縣置江甯郡以高適鎮江東密圖永王璘

乾元元年改江甯郡爲昇州置浙江西道節度兼江甯軍使治昇州後徙治蘇州

二年顏真卿拜浙西道節度使徙浙西觀察使治宣州罷領昇州

上元元年劉展反襲下蜀李暉潰遂陷昇州更置上元縣寶應元年廢昇州

德宗建中元年分浙江觀察使爲東西二道

二年合二道觀察置節度尋號鎮海軍節度使

四年節度使韓滉築石頭城修塢壁起建築迄京峴

憲宗元和二年鎮海節度使李錡反治石頭城

僖宗光啓三年復以上元句容溧水溧陽四縣置昇州

昭宗景福元年楊行密有國於淮南並據金陵

天復二年封行密爲吳王

三年田郡襲昇州刺史李神福

楊吳

宣帝唐天祐六年徐溫領昇州刺史留廣陵使知誥爲昇州防遏使往治之

十一年知誥城昇州廣金陵舊城二十里

十四年城成溫徙鎮海節度使治於昇州

睿帝順義元年改昇州大都督府爲金陵府建紫極宮於冶城故址

太和五年徐知誥營宮城於金陵欲徙帝都金陵不果遷天祚元年知誥進封齊王

二年置百官以金陵府爲西都

三年建齊國立宗廟社稷改金陵曰江甯府

南唐

烈祖昇元二年廣濟倉焚米三十萬石改吳興閣曰昇元閣瓦官寺曰昇元寺

元宗保大十一年金陵大火逾月焚廬舍營署殆盡夏六月至秋月不雨淮流可涉

十五年都下大火

交泰元年末帝號稱江南國主用周顯德年號

周顯德六年命修城隍治要害爲子孫計乃城金陵增戍兵

後主宋建隆二年元宗南遷帝留金陵監國

宋開寶三年命境內崇修佛寺

八年宋遣曹彬曹翰潘美伐江南用樊若水策作浮梁渡采石下金陵後主歸命

宋

太祖開寶八年平江南以江寧府爲昇州

太宗淳化五年置上元縣淳化鎮

眞宗景德元年改陶吳舖爲金陵鎮

三年置秣陵鎮於江寧縣

大中祥符元年於茅山池中獲龍

天禧元年改長干寺曰天禧寺置常甯鎮於句容縣

二年以昇州爲江甯府治上元江甯二縣皇子封昇王

仁宗天聖五年鑿義井於天禧寺側

嘉祐四年以吳宿言昇爲始封之地進爲大國無得封從之程顥爲上元主簿多及民之政

英宗治平四年王安石知江寧府旋召入

神宗熙寧五年分京東武衛軍權駐泊江寧府

九年王安石罷判府事尋爲集禧觀使

元豐七年王安石請以所居宅捨爲寺賜額報甯

徽宗大觀元年御筆以江甯險固足守改江甯府爲帥府高宗建炎元年李綱議以建康爲東都葺城池宮室沿江置帥府以備控扼

二年葉適請上南渡

三年上發臨安如建康駐蹕神霄宮御筆改江寧府爲建康府太子薨殯於鐵塔寺上如浙留杜充領行營

金人寇烏江杜充閉門不出金由馬家渡渡江陷建康通判楊邦乂不屈金人剖腹取其心

四年金人焚掠建康欲自靖安渡宣化而去岳飛敗之於靖安伏於牛頭山兀朮次龍灣飛破之於新城韓世忠扼兀朮於黃天蕩或教於冶城西南隅鑿大渠十餘里接江口出世忠之上世忠尾擊敗之

紹興二年詔韓世忠措置江南北岸屯田沿江修守備

六年張浚請幸建康劉貌欲犯建康楊沂中敗之於蕩塘七年岳飛扈駕至建康時東南所恃韓張岳三軍建康張氏部曲所在

八年上復幸浙西葉夢得爲留守因舊址新府學面秦淮十一年兀朮窺江張劉諸

將敗之命淮西江東軍馬錢糧移置於建康

十六年頒御書石經於府學

二十五年秦檜封建康郡王

三十一年金人敗盟諸將敗之

三十二年修築建康城張浚判府事

孝宗隆慶元年張孝祥奏通青溪水口入江汪澈請修築建康城

三年史正志總舟師

四年史正志以蔡寬夫宅基創貢院

淳熙三年劉琪重修府學立明道先生祠

十三年移采石水軍二千五百人屯靖安鎮

光宗紹熙元年廂禁軍舊營皆茅廬章森易瓦屋數千間始不與民居雜

甯宗慶元元年重修北門親兵寨千二百八十七楹

六年郡人朱舜庸編金陵事迹二十餘年始成至是獻之遂修爲續志

嘉泰二年吳琚乞免旬容和買綿絹

開禧三年葉適措置屯田并沿江堡隄團結淮西山水寨四十七處

嘉定五年作晉元帝廟祀王導以下三十六人

八年劉槩建明道先生祠江東旱蝗運使真德秀開東門外新河因役以飽飢民立范忠宣祠於漕司創置唐灣水軍二千五百人創漕司貢院於青溪之西

十年李珣開浚行宮後古珍珠河

十四年併唐灣靖安兩水軍爲一軍

理宗紹定二年增收後湖田租遂爲額

淳祐五年立策勝六軍右軍中軍屯駐建康

七年募立精銳軍

寶祐四年馬光祖勦游擊將軍寨屋三千餘間於武定橋東

五年重建府治賜忠實不欺之堂額

開慶元年創游擊新軍寨屋三千餘間於西門內

景定元年浚城濠四千七百六十五丈創柵寨門浚青溪創新府城內外亭臺祠館數十處

三年姚希德創建蜀三神祠於青溪側

四年建祠神宮於三神祠左

度宗咸淳三年重建貢院於青溪之南

恭帝德祐元年元巴延入建康都統翁福出迎起趙淮戍銀樹東壩

元

世祖至元二十一年立江淮行樞密院治建康二月徙江淮行省於杭州

二十二年徙行樞密院於建康

二十三年徙杭州行御史臺於建康

二十八年改按察司爲肅政廉訪使

成宗元貞元年詔易江南諸路天慶觀爲元妙觀毀所奉宋太祖神主

大德二年罷建康金銀銅冶轉運司

八年徙建康道廉訪使於甯國其建康路簿書命監察御史鈞考

武宗至大二年封綽和爾爲句容郡王

明宗天歷二年改潛邸所幸諸路名建康曰集慶命改集慶潛邸建大龍翔集慶寺

順帝至元元年罷江淮總管府所管集慶等處提舉司

至正十四年大兵平六合朱國珍自滁救之與耿再成守瓦梁壘

十五年滁州兵拔采石取太平使張天祐攻集慶路不克徐達自太平進克溧水陳

夢先屯板橋兵敗死之其子兆先復集兵屯方山

十六年太平兵取集慶路御史大夫福壽坐鳳皇臺下督兵拒戰死之於是建國號曰吳稱吳公改集慶路爲應天府建康軍吳公以御史臺爲府張士誠攻鎮江吳徐達與戰於龍潭敗之

十九年陳友諒攻建康吳公親總大兵於盧龍山破之

二十四年吳公進位稱吳王建百官繪塑功臣像於卞壺及蔣子文廟

二十五年以集慶路學爲國子監

二十六年杖張士誠於竹橋縊殺之明改築應天城作新宮鍾山之陽置江南行中書省治應天府

明

太祖以至正二十七年爲吳元年建廟社宮室

以至正二十八年爲洪武元年以應天爲南京初建國號意在大中旣而祈天乃定曰明

二年令府縣立學降溧水州爲縣建新城立十廟於雞鳴山後又增功臣廟爲十一後又增四廟

四年築浦子口城

九年析置江浦縣

十一年改南京爲京師改大都督爲五軍都督府

二十三年以揚州之六合縣屬應天府

三十年命工部建馬草場於六合

三十一年崩葬孝陵

恭閔帝建文四年燕王反兵至六合己丑燕兵犯金川門都城陷帝不知所終

成祖既克京師以建文四年爲洪武三十五年明年爲永樂元年分命諸將守城還

駐龍江

永樂元年設溧水廣通鎮關

四年狩北京以皇太子監國大小庶務悉以委之府部大小諸臣六軍按堵如故

十七年皇太子歸青宮以皇太孫留守南京六部政悉移而北

十八年行在六部去行在字諸九卿大小省署之留者皆稱南京

二十二年皇太子卽位是爲仁宗

仁宗洪熙元年始設南京守備命皇太子謁孝陵遂命居守南京亡何晏駕皇太子

來自南都卽位是爲宣宗始制詔太監鄭和等稱內守備駙馬都尉沐琮襄城伯李隆等稱外守備

孝宗宏治四年置高淳縣


武宗正德十四年自將擊宸濠幸南京

十五年正月謁孝陵於南京備諸劇戲六月幸牛首宿焉八月受江西俘旋蹕發龍江漁於江口


國朝

順治元年是年三月流寇陷京師明帝崩五月江南迎立福王卽位於南京號宏光順治二年豫王下江南明忻城伯趙之龍及軍民人等咸投誠執福王北去江南平


吳越楚地圖



秦秣陵縣圖



漢丹陽郡圖



三

永安縣

湖熟縣

天印山

秣陵

揚州治

南門

丹陽郡

北門

聚寶山

越城

丹陽縣

三山

溧陽縣

青龍山

句容縣

冶城

石頭

楚城

覆舟山

元武湖

鷄籠山

蔣山

攝山


江乘縣

龍濟

盧龍山

大江

孫吳都建業圖



句容縣

溧陽縣

永平縣

湖熟縣

四

攝山

蔣山

覆舟山

元武湖

鷓鴣山

幕府山

江乘縣

虞龍山

青龍山

燕雀湖

青溪

大航門

宣陽門

柵欄塘

建初寺

大市

聚寶山

金城

北門

丹陽郡

南門

建鄴

天印山

冶城

白鷺洲

石子岡

殷山

大江

石頭

三山

丹陽郡

運漕

秦淮

長干

朱雀航

元武門

太初宮

公車門

昇賢門

左掖門


右掖門

倉城

苑城

無名

東晉都建康圖



琅琊縣

臨沂縣

攝山

陽曲縣

即三縣

蔣山

元武湖

山舟覆

山籠雞

懷德縣

江乘縣

盧龍山

山府幕

句容縣

青龍山

檀城

雀湖

永安宮

東府城

東冶亭

溧陽縣

永世縣

秦淮

五城渡

航城東

郊壇臺處周

烏衣巷

丹陽郡南門

王舍五城

御街

建初寺

秣陵縣

聚寶山

新亭

厚岡

殷山

白鷺洲

竹格港

烏榜村

西園

西州城

石頭

冶城

大江

三山


江寧縣

丹陽縣

湖熟縣

五

南朝都建康圖



句容縣

溧陽縣

湖熟縣

建興郡

臨沂縣

同夏縣

檀城

青龍山

蔣山

開善寺

沈約郊園

博望苑

崔湖

東冶亭

宋北郊

青林苑

青溪

東府城

航城東

渡城五

鹿苑寺

臺處周

丹陽郡南門

五城

天印山

親蚕宮

社學

樂遊苑

芳林苑

大司馬府

江總宅

御街

朱雀航

國門

元武湖

元圃

宣陽門

長楊宮

監市

朱雀航

秦淮南

雨花臺

歸善寺

北市

宣陽門

長楊宮

監市

朱雀航

秦淮南

聚寶山

者關寺

紗寺

鐵塔寺

運港

謝尚宅

籬門

瓦官寺

落馬澗

縣陽丹

長樂宮

山冶

竹格渡

祇園寺

秣陵縣

江乘縣

馬鞍山

石頭

齊世子宮

白鷺洲

新林浦


縣寧江

廬龍山


大江

縣寧江


隋蔣州圖




唐昇州圖




南唐江寧府圖




宋建康府圖




元集慶路圖




明都城圖




歷代互見圖



國朝省城圖



國民都城圖姚雲甫繪



南京翰文書店增印

錢冷亭校

金陵歷代名勝志目錄

(又名秣陵集)

卷一

吳

冶城是吳王夫差鑄劍處

吳王劍池

越

越城是范蠡爲越王句踐築

楚

金陵岡是楚威王埋金處

秦

江樓望秦始皇所鑿諸山

秦淮是秦始皇東巡所鑿

漢

後湖訪王莽大司馬甄邯墓

鍾山漢秣陵尉蔣子文祠

青溪小姑祠

諸葛武侯駐馬坡

孫吳

吳太初宮是長沙桓王初定江東軍府

勞勞亭是孫吳時送別之所

婁湖苑是孫吳輔吳將軍張昭舊居

落星樓是吳大帝饗軍處

吳偏將軍南郡太守周瑜宅

吳折衝將軍西陵太守甘寧墓

吳偏將軍漢昌太守魯肅墓

吳大帝陵

步夫人塚

直瀆是孫吳所鑿

天璽元年紀功碑

板橋弔吳丞相張悌墓

西晉

三山是晉龍驤將軍王濬平吳駐師處

魏司空太尉晉太保王祥墓

晉步兵校尉阮籍墓

孫楚酒樓

晉征南將軍山簡墓

晉平原內史陸機宅

麾扇渡是晉丹陽內史顧榮揮散陳敏兵處

晉平西將軍周孝侯讀書處

晉太子洗馬衛玠墓

晉豫章太守梅賾祠

西浦是杜蘭香遇張碩處

卷一一

東晉

五馬渡是晉元帝渡江處

盧龍山

雁門山

迎擔湖

天闕

幕府山是王導開幕府處

新亭

汝南灣感劉碧玉事

陰山

晉隱士郭文舉書臺

層樓是顧愷之舊居

東冶亭是晉太元中送別處

西池

石城帛晉宣城內史贈廷尉再贈太常桓簡公彝

白石壘是晉征西將軍陶侃討蘇峻監軍李根所築

四望山

晉贈侍中驃騎將軍卞忠貞公壺墓

晉丞相王文獻公導墓

慈湖

晉句漏令葛洪故里

洞元觀相傳是葛洪飛昇處

晉贈宏農太守郭璞墓

晉前將軍溫忠武公嶠墓

金城是桓溫爲琅邪內史所居

投書渚是晉豫章太守殷羨投書處

晉鎮西將軍謝尙宅

謝公墩

冶城懷晉右軍將軍會稽內史王羲之

桃葉渡

東山

謝元別墅用溫飛卿謝公墅歌韻

朱雀橋

烏衣巷

邀籛步是王徽之邀桓伊吹籛處

晉太傅謝文靖公安墓

杜姥宅

晉廣州刺史吳隱之故居

西州橋

謝將軍廟

東府城是晉會稽文孝王道子舊第

西園卽冶城園本桓元別苑也

栽松峴

晉陵

晉元帝廟

卷三

宋

新洲行弔宋武帝

覆舟山是宋武帝破桓元處

樂游苑

鳳皇臺

祈澤寺訪龍女獻泉成池處

招隱館

蕭思話彈琴石

宋征南大將軍江州刺史檀道濟舊宅

宋臨川內史謝靈運墓

宋法曹參軍謝惠連墓

烽火樓是宋文帝登望魏師處

南龍山訪宋孝武殷貴妃墓

含草殿是宋孝武帝女壽陽公主梅花點額處

宋光祿大夫顏延之墓

宋司徒何尙之宅

後湖

湘宮寺

宋車騎大將軍司空沈慶之宅

東山弔宋守尙書右僕射中領軍劉劭

茱萸隴

石頭城弔宋司徒袁粲

齊

芳林苑

靈和殿遺趾懷齊常侍張緒

雞鳴埭

雉亭山

九日臺

博望苑

齊竟陵王子良宅

芳樂苑弔齊潘淑妃

倪塘訪齊散騎常侍柳世隆墓

攝山棲霞寺是齊處士明僧紹故居

周氏草堂訪周彥倫隱處

東籬門園訪齊處士何點舊居

檀橋訪劉瓛故宅

夢筆驛

新林浦向板橋是謝朓吟詩處

齊景陽樓遺址並題金雲門女史禮羸畫景陽樓圖定林寺古鐘相傳齊景陽宮

鐘也

莫愁湖

擬梁武帝河中之水歌莫愁湖上詠盧莫愁事

鬱金堂題壁

汝南灣訪南齊劉瓛陸慧曉張融故居

卷四

梁

鐵冶溝

郗氏窟相傳梁武帝后郗氏化蟒處

江潭苑用李賀追賦畫江潭苑韻並效其體

昭明太子讀書臺

梁金華宮

燕雀湖

永慶寺是梁永慶公主舊宅

隨鹿谷是阮孝緒母病求獲處

梁隱士貞白先生陶隱居故里

辟支洞

達摩洞

雨花臺

靈谷寺弔梁高僧寶誌

八功德水

說法臺

迴光寺卽梁武帝蕭寺遺址

臺城西訪華林園遺址書庾蘭成三月三日馬射賦後

徐勉宅

伏挺泉

皂莢橋是曹景宗屯兵處

沈約郊園

梁豫州刺史裴邃墓

三橋弔范雲墓

青塘弔梁散騎常侍贈護軍將軍韋忠貞公塚

望國門是梁冠軍將軍羊侃屯兵處

臺城行弔梁武帝

梁武帝陵

梁驃騎大將軍中書監王僧辨墓

烈山弔梁湘州刺史王琳戰場

陳

陳武帝萬安陵

大壯觀是陳宣帝講武處

書徐孝穆玉臺新詠序後

珍珠河是陳後主宮人雨中泛舟處

玉樹後庭花曲詠張貴妃擬江總持

璧月瓊枝詠孔貴嬪擬孔範

女學士弔袁大捨

臨春閣甄硯歌

青溪弔江總宅

白土岡是陳隋戰場

景陽井卽燕支井在臺在內

陳宮求賢殿是後主沈后所居

水西門訪賞心亭並弔張麗華墓

讀廣輿記感華塚上白光如練事再賦一首

張麗華祠

青溪懷古

石子岡是六朝人叢葬處

車府山

卷五

隋

蔣州

韓擒虎賀若弼軍壘

隔江望桃葉山是晉王乘戰艦渡江處

唐

梅湖曲

武岡山石佛相傳唐武后造

獻花巖

烏龍潭訪顏魯公放生池

長千行效李太白

白鷺洲

落星岡是李太白遇蓬池隱者脫紫綺裘換酒處

板橋浦是李白夜泛處

擬建太白樓於鳳皇臺詩以誌事

高座寺李白賦詩贈中孚處

白下門

青溪訪王龍標故居

冷朝陽宅

瓦官寺尋杜少陵舊游處

高適曾鎮金陵集中無詩詠之以存其概

杏花村

楊吳

楊吳三門

延和宮弔楊吳太子璉妃

南唐

南唐故宮遺址

南園訪南唐宋齊邱故居

蚶蚶磯弔汪台符

石頭驛詠陶穀使江南事

南唐李建勳青溪草堂遺址

金陵寺是五代僧貫休所建

南唐北苑

南唐別院感耿玉真事

翠微亭

訪南唐百尺樓遺址

紅羅亭懷古

瓦官寺感南唐遺事

鳳臺山弔南唐司空孫文忠公晟遺宅

南唐劉忠肅王祠

梅岡弔南唐中書侍郎韓熙載墓

鍾山訪徐鉉遺宅

訪南唐昭惠后周娥皇懿陵

柔儀殿感南唐小周后事

訪澄心堂遺址並弔黃保儀

南唐淨德尼院弔入道宮人殉國自焚處

樂官山

書晁補之芳儀曲後

南唐李後主祠

皇甫巷是南唐皇甫暉所居

宋

宋曹武惠王廟

半山報甯寺是王安石故宅

半山亭

鍾山用東坡同王勝之游蔣山韻

明道先生祠

一拂清忠祠

泥馬巷

宋妃祠

南宋行宮

土門岡弔楊忠襄公

龍灣是宋岳忠武王破金人處

黃天蕩詠韓蘄王破金師事

南軒先生祠

東南佳麗樓

三宿巖訪南宋右僕射虞允文題名

元

龍翔寺是元文宗潛邸

衛國忠肅公廟弔元殉難江南行臺御史大夫福壽

卷六

明

朝天宮

觀象臺

天界寺是明初修元史處

盧龍山閱江樓

明太祖孝陵

孝陵長生鹿銀牌歌

懿文太子陵

朝天女感孝陵殉葬宮人事

闈妃怨

漢府

舊內

訪十六樓遺址

舊院篇

鍾山弔靜誠先生陳遇墓

劉文成公故居

禮賢館弔宋文憲公濂

天界寺弔王忠文公禕 並題遺集後

鍾山里訪高青邱故居

張太尉墓

東邱郡侯花雲墓

越國武莊公胡大海墓

功臣廟

中山武甯王徐達

開平忠武王常遇春

岐陽武靖王李文忠

寧河武順王鄧愈

東甌襄武王湯和

黔陽昭靖王沐英

功臣廟感麗江武靖王傅友德事

感藍玉事書明史傳後

徐中山王舊宅

東西花園

勝棋樓

隱仙菴

書葉伯巨奏疏後

書高巍傳後

金川門

神樂觀

感齊泰黃子澄事因題一律

木末亭拜方正學墓

表忠祠弔鐵忠定公鉉

景公祠

感卓忠毅公事

書姚廣孝傳後

翁夫人血影石

秦淮弔方正學二女自沈殉節處

靖難忠臣祠

徐妙錦墓

鍾山告天文石刻

登報恩寺浮圖

淳泥國王墓

靜海寺

五穀樹

明武宗釣魚處

過明大內感媚蘭仙子事

孔雀菴

秦淮感鄭妥娘事

青溪訪顧眉生眉樓遺址

汪文毅公祠

百川橋弔明殉難乞兒

史墩是史閣部別業今爲酒肆

書厲太鴻開平王孫種菜詩後

明故宮遺趾今爲將軍駐節處

聽友人話南都遺事作

大忠橋弔明督師大學士黃忠端公

杜茶村墓

乳山訪林古度故居

金陵歷代名勝志卷一（又名秣陵集）

錢塘 陳文述 退庵

冶城是吳王夫差鑄劍處

在上元縣治西今朝天宮是其遺址按陸游入蜀記稱天慶觀後爲冶城山天慶觀卽今朝天宮本南唐紫極宮故址世說注引丹陽記曰丹陽冶城去宮三里吳時鼓鑄之所以爲孫權所築或仍夫差之舊未可知也

斗閒雲氣望中原
賸有蛟龍劍血斑
歐冶干將俱寂寞
一痕青認冶城山
儘有人閒百鍊鋒
好從匣底臥芙蓉
韜光斂鏑英雄事
莫但延津說化龍

吳王劍池

在冶城山下

回首吳王鑄劍時
冶城遺蹟未參差
虎邱舊有題名在
又向金陵問劍池
（虎邱劍池石上余舊有戊午年題名）

越城是范蠡爲越王句踐築

越城一名范蠡城相傳蠡佐越王句踐謀楚周元王四年所築在江甯縣南劉涓林吳都賦注建業南五里有大長干小長干大長干在越城東小長干在越城西或謂今報恩寺前江甯縣丞廨卽其址俗呼爲

越臺六朝交兵在南者每據此爲要地故盧循之來衆軍修治越臺也

一樣興亡更可嗟長干枯樹噪啼鴉越臺爭似蘇臺好楊柳年年掃落花

如何謀楚計全非戰士還家空錦衣太息會稽山下路來唯有鷓鴣飛

石室陰謀慨霸才杜圻山色隱崔巍（杜圻山在太湖相傳有范蠡宅）扁舟已泛烟波去未必當年此築臺

金陵岡是楚威王埋金處

在上元西北龍灣路相傳楚人埋金於此以壓王氣舊志云金陵邑城周顯王三十六年楚威王所置孫吳卽其地築城曰石頭城卽今石城門近清涼門處戰國之金陵城或卽春秋之冶城耶建康志云宋靖安道閒有埋金碑云不在山前不在山後不在山南不在山北有人獲得富了一國周應合云耆舊指爲秦時古碑近年爲好事者取去按埋金是楚威王事則碑當亦楚人所立也

龍灣路繞碧峯陰落日蒼蒼帶遠林吳國當年曾鑄劍楚王何事此埋金秦關百二終難出越甲三千枉就擒野老不須誇王氣六朝遺蹟久銷沈

江樓望秦始皇所鑿諸山

盧龍馬鞍本一山秦分爲二天印石饋亦然天印一名方山卽淮水所從入也

六國平來鬢未斑東游江海不知還亡秦人在君王側辛苦翻勞鑿二山

王氣應知漸漸消六朝遺事又南朝四圍山色青如許長照秦淮水一條

秦淮是秦始皇東巡所鑿

輿地志丹陽記諸書皆言秦始皇用望氣者言鑿方山斷長壘以洩王氣導淮水入江是爲秦淮之始其源有二西源出溧水東廬山東源出句容茅山至方山合流至通濟門西流入城合東濠青溪運漕諸水出西水關沿石頭城以達於江

六王已畢阿房起祖龍東巡行不止赭衣辛苦開雲陽更向江乘鑿淮水淮水浩浩從西來兩源合併波濤洄金陵王氣洩不盡牛首天闕風雲開六代紛紛奈何帝別有真人皇覺寺二千年後英雄人何與當年乃公事影落春潮畫閣新疏窗金粉畫眉人夜深明月來相照淮水而今尙姓秦

後湖訪王莽大司馬甄邯墓

甄邯史不著其籍西漢末官奉車都尉以定策功封承陽侯王莽輔政邯主鑿斷有事使白太后居攝元年邯爲太保後承又爲輕車將軍槐里男子趙明霍鴻等起兵和翟義以邯爲大將軍受鉞高廟領天下兵左杖節右把鉞屯城外莽建國元年以邯爲大司馬承新公四年卒南史何承天傳劉宋時張永開元武湖遇古冢冢上得一銅斗有柄文帝以訪朝士承天曰此亡新威斗王莽三公死皆賜之一在冢外一在冢內時三台居江左者惟甄邯爲大司徒必邯之墓俄而冢內更得一斗復有一石銘大司徒甄邯之墓按王莽傳云邯爲大司馬邯卒以甯始將軍孔永爲大司馬南史云司徒未知孰是惜碑文不可得見

矣

承恩溯前漢佐命翊亡新都尉司宮日將軍把鉞晨石銘摹未得銅斗辯誰真豈獨
元言者鴻文解劇秦

鍾山漢秣陵尉蔣子文祠

干寶搜神記曰蔣子文廣陵人也嗜酒好色常自謂青骨死當爲神漢末爲秣陵尉逐賊至鍾山下賊擊
傷額因解綬縛之有頃遂死及吳先主之初其故吏見文於道乘白馬執白羽侍從如生平於是使使者
封子文爲中都侯次弟子緒爲長水校尉皆加印綬爲廟堂號鍾山爲蔣山六朝以來靈應甚著洵崇帝
號今父老猶奉爲土神祠一在雉亭山爲齊武帝射雉處即騎亭山以子文見神得名一在龍尾山卽蔣
山之麓子文死鍾山之陰故有蔣陵之號後湖亦名蔣陵湖也

靈旗落葉其飄蕭龍尾荒祠久寂寥志闕赤烏前代事魂歸白馬午時潮玉顏嬌嬾
憐三妹香火繁華閱六朝一角鍾山埋骨地傳芭不用楚詞招

青溪小姑祠

吳均續齊諧記曰會稽趙文詔宋元嘉中爲東扶侍廨在青溪中橋秋夜步月悵然思歸乃倚門唱烏飛
曲忽有青衣年可十五六許詣門曰女郎聞歌聲有悅人者逐月遊戲故遣相問文詔都不之疑遂邀暫
過須臾女郎至年可十八九許容色絕妙謂文詔曰聞君善歌能爲作一曲否文詔卽爲歌草生盤石下
聲甚清美女郎願青衣取篋篋鼓之冷冷似楚曲又令侍婢歌繁霜自脫金簪扣篋篋和之婢乃歌曰歌

繁霜繁霜侵曉暮何意空相守坐待繁霜落流連寔寢將旦別去以金簪贈文韶文韶亦贈以銀盃及玻
璃七明日於青溪廟中得之乃知所見青溪神女也異苑曰青溪小姑蔣侯第三妹也樂府神絃第六青
溪小姑曲曰開門白水側近橋梁小姑所居獨處無郎靈雀謝奩事祠在金陵牖

雉亭龍尾久荒蕪尚有叢祠祀小姑碧水未窺雙照影青山曾寫十眉圖雲衣花落
春惆悵翠幔香銷夢有無靈雀筵篔俱寂寞六朝明月夜來孤

附錄

錢塘女史 汪 端（小韞）

碧水潺湲繞戶流中宵疑奏細篔簹桂旗時拂三山雨蟬鬢猶籠六代愁涼月夢
回人似玉繁霜歌罷夜如秋更憐烟樹鍾山北寂寞無人祀蔣侯

附錄

錢塘女史 陳麗娥（茗仙）

門開白水近橋梁樂府神絃第六章曾否脫簪叩盤石可因侵幕感繁霜家臨玉
澗秋陰重夢斷青溪夜月涼莫信篔簹銀盃事小姑居處本無郎

諸葛武侯駐馬坡

在石頭城相傳武侯至吳駐此以觀形勝謂鍾山龍蟠石城虎踞卽此在今蟠龍里北收兵橋東又鎮淮
橋東北軍師巷有武侯祠江表傳云劉備之東宿於秣陵周觀地形勸權都之則昭烈亦嘗至其地也

石頭城上翠潺湲顏虎踞龍蟠在此閒形勝舊傳三國志風雲長護六朝山登高感慨

誰知已攬轡澄清亦等閒天遣艱難定西蜀峨眉萬里隔秦關

吳太初宮是長沙桓王初定江東軍府

三國志吳王傳赤烏十年權適南宮三月改作太初宮注引江表傳載權詔徙武昌宮材瓦更繕治之內有神龍殿

少年豪氣敵元龍如此江山有故宮佳耦大喬真國色同心諸弟並英雄眼前劉笮驅除後海內袁曹顧盼中功業未成身早死至今遺恨滿江東

勞勞亭是孫吳時送別之所

一統志云勞勞亭在應天府治西南吳時置太平御覽輿地志云丹陽郡秣陵縣新亭隴上有望遠樓又名勞勞亭宋改爲臨滄觀行人分別之所

黯然銷魂者惟別而已矣行行重行行千里復萬里驪駒南邁鴈北征送別自古難爲情柳縮旗亭花滿路此地猶傳送別處送別何勞勞落日浮雲驕羅裙紅粉燕趙妾寶劍白馬幽并豪古來送別凡幾輩此地猶留一亭在花殘月缺水東流空有春山碧於黛我欲山鏟林巒亭去梅喚取石尤迴舶趁不然車輪生四角

婁湖苑是孫吳輔吳將軍張昭舊居

張昭字子布彭城人少好學善隸書從白侯子安受左氏春秋博覽衆書與趙昱王朗皆發名友善弱冠

察孝廉不就刺史陶謙舉茂才不應漢末大亂徐方士民避難南土孫策創業命昭爲長史撫軍中郎將升堂拜母如比肩之舊文武之事一以委昭策臨亡以弟權託昭昭率羣僚立而輔之上表漢室下移屬城中外將校各令奉職劉備表權爲車騎將軍詔爲軍師權每田獵乘馬射虎昭切諫權於武昌釣臺飲酒以水灑羣臣之面昭正色不言出車上坐襪乃罷酒權置丞相衆議歸昭權不用昭乃上還官位及所統領更拜輔吳將軍班固三司改封婁侯嘉禾五年卒年八十一諡曰文侯湖爲昭所開因封婁故名婁湖也南史齊武帝紀望氣著言新林東府婁湖有王氣乃築青溪宮作新婁湖苑厭之約在今駐防城東南又沈慶之有園在婁湖一夕徙居之慶之應詔詩老朽筋力盡徒步歸南岡南岡卽今周處臺則婁湖宜在其左右而今無是湖舊志又云艦澳在江甯南十里梁武帝開以藏船水出婁湖今江甯亦無是湖蓋陵谷之變遷久矣

東吳張子布忠蹇有高名交誼同公瑾盟心比孔明（策臨亡謂昭曰若仲謀不任事者君便自取之見吳歷）著書人未老（昭在里宅無事乃著春秋左氏傳解及論語注見吳志）罷酒氣難平欲訪婁湖苑蒼茫白下城

落星樓是吳大帝饗軍處

落星樓在落星山在江甯板橋市西臨大江山有岡曰落星岡卽王僧辨連營拒侯景處近水者曰落星洲又曰落星磯吳都賦云數軍實於桂林之苑饗戎旅於落星之樓注云樓在建業東北十里景定志云吳大帝置三層樓以其高故名又引宮苑記云桂林苑在落星山夫數軍饗旅本屬一事樓與苑地必相近則落星樓亦必在落星山非第以其高也

當年饗戎旅曾建落星樓河漢青天夜江山赤壁秋東風弔棲雀西顧感牽牛指點
三山近降帆出石頭

吳偏將軍南郡太守周瑜宅

周瑜字公瑾廬江舒人孫堅起兵討董卓徙家於舒堅子策與瑜同年獨相友善推道南大宅以舍策升堂拜母有無適共從策攻橫江當利擊陵破笮融薛禮轉下湖孰江乘進入曲阿劉繇奔走還鎮丹陽與從父尚還壽春袁術欲以瑜爲將瑜知其無成求爲居巢長遂自居巢還吳策親自迎瑜授建威中郎將時年二十四吳中呼爲周郎策欲取荊州以瑜爲中護軍領江夏太守從攻濡拔之復進尋陽破劉勳討江夏還定豫章廬陵留鎮巴邱策薨權統事將兵赴喪與張昭共掌衆事破曹操於赤壁走曹仁於南郡拜偏將軍領南郡太守方圖取蜀卒於巴邱年三十六相傳江甯府治是其故宅遺址

憶昔周公瑾曾偕孫伯符江山自形勝軍旅共馳驅赤壁人今昔青山事有無（合
肥有周公山）南來問遺宅烟雨蔣陵湖

吳折衝將軍西陵太守甘甯墓

甘甯字興霸巴郡臨江人少好遊俠招合少年負既帶鈴羣聚攻劫依劉表不見進用轉託黃祖以凡人畜之後乃歸吳從權西伐遂禽黃祖後隨周瑜破曹公於烏林攻曹仁於南郡以功拜西陵太守從攻皖獲朱光拜折衝將軍曹操出濡須甯以百人夜斫其營從攻合肥壯氣毅然病卒權痛惜之墓在直濱山下

鈴聲帆影總難當亂世能知擇主良少日功名事游俠中原形勝論荆襄樽壘慷慨
生知己（謂救蘇飛事）鼓角縱橫入戰場太息當年埋骨處幾番陵谷變斜陽

吳偏將軍漢昌太守魯肅墓

魯肅字子敬臨淮東城人家富於財性好施與周瑜爲居巢長過肅求資糧肅指困贈之哀術聞其名就
署東城長肅知其無成乃就瑜與同東渡會孫策已薨瑜因薦肅於權說權與劉備併力以拒曹操周瑜
死以肅代之拜漢昌太守偏將軍轉橫江將軍建安二十二年卒年四十六墓在上河舊志不載王葑亭
金陵雜詠序云乾隆中婺源江姓買宅上河掘地得斷碑審爲肅墓有詩紀事

赤烏霸業定三分佐命英才復幾人品較子瑜兼有識味如公瑾覺尤醞艱難戰績
悲投子（投子山在桐城地志云是肅戰敗投子處有投子寺）慷慨交情見指困天
恐孤墳竟埋沒斷碑重見上河濱

吳大帝陵

大帝宮權字仲謀兄策既定諸郡權年十五爲陽羨長從征劉勳討黃祖建安四年策薨權嗣立十三年
破曹操於赤壁十四年劉備表權行車騎將軍領徐州牧十六年徙治秣陵明年城石頭改秣陵爲建業
十九年征皖城克之二十二年遣都尉徐詳詣曹操請降二十四年遣呂蒙襲荊州二十五年曹丕篡漢
權稱藩丕封權爲吳王加九錫黃武元年蜀兵來伐爲陸遜所破魏遣使來盟并徵任子權辭魏人出師
權遂改年臨江拒守使鄭泉聘劉備於白帝始復通八年改元黃龍又四年改元嘉禾元年遣使之遼東

又七年改元赤烏又十四年改元太元二年薨年七十一諡曰大皇帝葬蔣陵陵在鍾山陽孫陵岡自朝陽門至麒麟門相距二十里凡十三岡第三即孫陵岡也

旗鼓成三國江山領六朝霸才天塹險王氣秣陵消宰木神鴉聚荒陵石馬驕墓門
花草盡嗚咽上寒潮

步夫人塚

吳主權步夫人臨淮淮陰人與丞相隲同族漢末其母攜徙廬江爲孫策所破東渡江以美麗得幸於權寵冠後庭生二女長曰魯班少曰魯育夫人性不妒忌多所推進故久見愛待權爲王及帝欲以爲后而羣臣議在徐氏依違者十餘年然宮中皆稱皇后親戚上疏稱中宮及薨臣下緣權指請正名號乃贈印綬策命葬於蔣陵在孫陵岡吳大帝陵側梁何遜有詩

孫吳岡下路逶巡霸氣荒涼古水濱三國旌旗吳大帝六宮璽綬步夫人香銷玉冷
無銅雀水贖山殘有石麟何事後來恩太薄西陵家難最悲辛（謂步闈事）

直瀆是孫吳所鑿

舊志直瀆山在上元北二十里觀音山在上元觀音門外按觀音之名始見明南畿應天兩志不應瀆江大山險峻如此前志皆不言觀景定志論建康山水謂自臨沂山以至三山圍繞於其左自直瀆山以至石頭沂江而上屏蔽於其右今觀音山正江甯諸山沿江初起處其爲直瀆無疑則直瀆山即觀音門山直瀆即觀音門水是直瀆者古名觀音者明世俗稱耳伏滔北征記甘甯墓有王氣孫皓惡之乃鑿其後

爲直瀆其水東西流入大江按直瀆東渠水當由燕子磯下出今河道已不可辨其西流經明時建城隔斷全不可見矣

金陵王氣肯終埋辛苦經營水一涯試問孫吳開直瀆何如嬴政鑿秦淮
甘甯墓上草蕭蕭青蓋明年入落遙二百年來終割據匆匆東晉又南朝

天璽元年紀功碑

天璽元年紀功碑吳錄以爲華覈文東觀餘論以爲皇象書舊在段石岡元祐中移置漕臺後圃明初又移至江甯縣學尊經閣下碑毀於晉季石凡三段形如覆臼字列三面而虛其一字多蝕駁按吳志云天冊元年吳郡掘地得銀長一尺廣三分刻上有年月於是改元天璽又言臨平湖壅塞復開於湖邊得石函中有小石青白色長四寸廣二寸餘刻上作皇帝字八月又言歷陽山石文理成字凡二十云楚九州渚漢九州都揚州土作天子四世治太年始又吳興陽羨山有空石長十餘丈石室所在表爲大瑞於是改元天紀總孫皓在位十六年凡八改元言符瑞者累累未幾青蓋入洛廟社屋矣符瑞之事果何有哉碑字銛厲奇崛董廣川以爲漢隸楊東里以爲八分朱竹垞以爲在篆隸之間然不若謂之篆書爲確也近毀於火江甯太守余需元以舊榻本重摹勒石

楚九州渚漢九州都揚州土作天子四世治太平始太平之主非孤誰大帝逮孤四世矣臨平湖邊石函啓天冊改元作天璽歷陽山石燦文理天璽改元作天紀十五年中八改元童昏作事乃如此君不見代漢者當塗高石馬文大討曹西京讖緯此

流弊古來符瑞皆言妖乃祖遠迓羅陽王乃孫亦設平慮耶作法於涼古所訓赤烏之赤黃龍黃阿童戰艦方龍驤明年青蓋入洛陽

板橋弔吳丞相張悌墓

張悌字巨先襄陽人少有名理孫休時爲屯騎校尉魏伐蜀吳人問悌料魏必破蜀吳人笑其言既而蜀降於魏晉來伐吳孫皓使悌督沈瑩諸萬觀率衆三萬至牛渚沈瑩欲待晉師來與戰悌曰吳之將亡賢愚所知若如子計敵來君臣俱降無一人死國者不亦辱乎遂渡江戰敗諸萬觀欲牽與俱去悌曰仲思今日是我死日我爲兒童時便爲卿家丞相所識拔常恐不得其死負名賢知顧今日以身殉社稷復何遁耶遂死之見襄陽記吳丞相軍師張悌護軍孫震丹陽太守沈瑩帥師與晉師戰晉人敗吳軍於板橋獲悌震瑩等見于寶晉記夫以悌之忠義如此而吳志不爲立傳此承祚之所以不得爲良史也板橋在三山北悌墓在焉

料敵先幾遠談兵決策精四朝終喪亂一死見忠貞同難悲孫震成謀失沈瑩板橋埋骨處荒壘暮雲平

三山是晉龍驤將軍王濬平吳駐師處

濬字士治宏農湖人家世二千石博涉墳典不修名行晚乃變節恢廓有大志辟河東從事刺史徐邈以女妻之參征南軍事羊祜深知待之轉車騎從事中郎除巴郡太守轉廣漢太守遷益州刺史武帝謀伐吳詔濬修舟艦尋拜龍驤將軍監梁益諸軍事時朝議咸諫伐吳濬上疏明其當伐帝納焉太康元年濬

發自成都克丹陽二月庚申克吳西陵壬戌克荆門乙丑克樂鄉順流鼓棹徑造三山孫皓降於軍門初
王渾與濬同受命伐吳渾出橫江既破吳人畏不敢進濬將致秣陵渾嬰令暫過論舉濬舉帆直指報曰
風利不得泊也渾恥功出濬下表濬違節有司按檻車徵帝勿許濬亦上書自理以功拜輔國大將軍領
步兵校尉封襄陽縣侯博士秦秀等以濬功重報輕表訟濬屈乃遷鎮軍大將軍加散騎常侍領後軍將
軍又轉撫軍大將軍太康六年卒年八十諡曰武渾濬之爭也唐彬有殄敵之勳而稱疾以示不競范通
有外親之誼而進說以勸讓功論者韙之三山有二上三山在烈山東岸一曰仙人磯濬所至之三山在
江甯板橋浦西

萬里樓船下益州龍驤威望冠中流乘風帆影橫天塹破竹軍聲指石頭戰伐已收
三國勢江山漸起六朝愁當年渾濬爭功處賸有遙青幾點浮

魏司空太尉晉太保王祥墓

王祥字休徵琅邪臨沂人漢諫議大夫吉之後祖仁青州刺史父融公府辟不就祥性至孝繼母朱不慈
祥愈恭敬母嘗欲生魚天寒水凍祥解衣將剖冰求之冰忽自解雙鯉躍出母又思黃雀炙復有黃雀數
十飛入其幙復以供母鄉里驚嘆以爲孝感所致漢末遭亂扶母攜弟避居廬江隱居三十餘載不應州
郡之命年垂耳順徐州刺史呂虔檄爲別駕討平寇盜州界清靜政化大行累遷大司農高貴鄉公卽位
與定策功封關內侯拜光祿勳轉司隸校尉從討母邱儉遷太常封萬歲亭侯天子幸太學命祥爲三老
祥南面凡杖以師道自居天子北面乞言祥陳明王聖帝君臣政化之要聞者莫不砥礪拜司農轉太尉
加侍中封睢陵縣侯武帝爲晉王祥與荀顛往謁顛以爲當拜祥曰吾等魏之三公公王相去一階焉有

天子三司而輒拜人者顛拜祥獨長揖武帝踐祚拜太保進爵爲公以年老乞遜位詔以睢陵公就第位同保傳祿賜如前泰始五年薨明年策論曰元嗟乎祥之事親誠格魚鳥其孝可謂誠篤矣其仕魏也位登三公禮隆北面高不拜之節豈不偉哉惜乎鼎祚遷移拜爵異代曾無扶顛持危之義其賢於何曾諸人也幾何墓在江甯縣西南八十里何湖側按祥卒於西京墓不應在此景定志云當是南渡時丞相導奉之以來

能以三公抗晉王如何魏國任滄桑未應不肖如馮道卽論名儒亦孔光薄葬西芒遺令在廢塋南土墓田荒東來淮水清如許孝友家風奔世長

晉步兵校尉阮籍墓

阮籍字嗣宗陳留尉氏人父瑀魏丞相掾籍容貌瓌傑志氣宏放傲然獨得任性不羈博覽羣籍尤好老莊嗜酒能嘯善彈琴太尉蔣濟聞其才辟之不就曹爽輔政召爲參軍以疾辭宣帝爲太傅命爲從事中郎高貴鄉公卽位封關內侯徙散騎常侍籍本有濟世志屬魏晉之際天下多故名士少有全者籍由是不與世事酣飲爲常嘗遊東平樂其風土乞爲東平相聞步兵廚營人善釀酒乃求爲步兵校尉遺容世事雖去佐職恆遊府內朝宴必與會帝讓九錫公卿將勸進使籍爲其辭方據案醉眠使者以告籍便書按使寫之無所改又能爲青白眼禮法之士疾之若仇時率意獨駕不由徑路車迹所窮輒慟哭而返作詠懷詩八十餘篇爲世所重景元四年卒年五十四考阮籍當日與稽康齊名顧康以臥龍之姿不見容於典午而籍獨能託沈飲以自全此豈獨有天幸耶觀其恆遊府內朝宴必與勸進之文據案卽得當別有全身遠害之術後世徒以坦蕩淳至目之誤矣墓在鳳皇臺畔按籍卒於魏時墓不應在此舊志明萬

歷聞李昭掘得石碣有晉賢阮三字已又得半段曰籍之墓因以爲籍墓在此曰晉賢或爲後人所立籍卒於魏而書晉志晉也

巍巍鳳皇臺其下秋草綠草深沒孤塚伊人渺如玉魏晉昔多故篡奪繼殘局當道
凶頑踞接軫善類蹙名重張華死功高衛瓘族鶴唳陸機歎龍臥嵇康戮惟君嬰世
網深心託高躅詠懷八十篇醕酒三百斛懷古黍谷黍同志竹林竹辭昏既逃死好
色亦矜俗慷慨廣武嘆悲憤窮途哭高騫逸鸞鳳遠逝古鴻鵠一卷西晉書名德此
爲福可惜勸進表終古文章辱何不從孫登適然嘯空谷

孫楚酒樓

孫楚字子荆太原中都人祖資魏驃騎將軍父宏南陽太守楚才藻卓絕邁爽不羣多所陵傲無鄉曲之
譽年四十餘始參鎮東軍事嘗爲石苞作書與孫皓使臣不敢達參苞軍事以傲致嫌遂制施敬自楚始
也爲征西將軍扶風王駿參軍轉梁令遷衛將軍司馬龍覓武庫井中羣臣將賀楚上言乃止與同郡王
濟友善濟爲本州大中正狀楚曰天才英博亮拔不羣楚少時欲隱謂濟曰當欲枕石漱流誤云漱石枕
流惠帝初爲馮翊太守太康三年卒酒樓在城西白鷺洲上唐李白嘗飲於此

秋色三山雨江流六代烟偶談孫楚事因過酒樓前花月唐天寶風流李謫仙凭闌
同一醉高詠二千年

晉征南將軍山簡墓

山簡字季倫山濤季子性溫雅有父風初爲太子舍人出爲青州刺史徵拜侍中游至征南將軍都督荆襄交廣四州諸軍事假節鎮襄陽於時四方寇亂朝野危懼簡優游卒歲惟酒是耽諸習氏荆州豪族有佳園池簡每嬉遊多之池上置酒輒醉名曰高陽里兒童歌曰山公出何許往至高陽池日夕倒載歸酩酊無所知時時能騎馬倒著白接籬舉鞭向葛疆何如并州兒疆家在并州簡愛將也卒贈征南大將軍墓在雞籠山側

亦是東山意閒情寄出遊高名在荆土愛將說并州荒塚前朝失殘碑六代愁冷冷幽澗水還似習池秋

晉平原內史陸機宅

陸機字士衡吳郡人祖遜吳丞相父抗大司馬機少有異才文章冠世抗卒領父兵爲牙門將年二十而吳滅退居舊里作辨亡論太康末與弟雲俱入洛造太常張華如舊相識吳王宴出鎮淮南以機爲郎中令趙王倫輔政引爲相國參軍豫誅賈謐功賜爵關內侯倫將篡位以爲中郎將倫之誅也齊王冏以機職在中書九錫文及禪詔疑機與焉收付廷尉成都王穎吳王晏救之得減死徙邊時中國多難顧榮戴若思咸勸還吳不聽成都王穎以機參大將軍軍事表爲平原內史太安初穎與河閒王起兵討長沙王又假機後將軍河北大都督督北中郎將王粹冠軍將軍牽秀等諸軍機自以羈旅入官頓居羣士之右辭都督穎不許遂行自朝歌至河橋鼓聲聞數百里漢魏以來出師之盛未嘗有也長沙王又奉天子與機戰於鹿苑機軍大敗赴七里澗死者如積爲宦人孟玖所讒言其有異志牽秀等共證之穎怒使秀收機機嘆曰華亭鶴唳豈可復聞乎遂遇害於軍中年四十三子蔚夏同被害弟雲字士龍與兄齊名號曰

二陸入洛洛至中書侍郎成都王穎表爲清河內史張昌爲亂穎表雲爲使持節大都督前鋒將軍以討昌會伐長沙王乃止機之敗也并收雲江統蔡克等救之不得并遇害機雲之死也莫不歸咎於成都王之憤孟玖之譖牽秀等之證成似已獨不思祖父皆吳世臣與國同休戚既領父兵爲將晉師南下先張悌諸人致命遂志者宜莫如陸氏誠能斂節疆場則吳之機雲豈不媲美蜀之瞻尚哉亦既退居舊里矣果使蒲輪之徵元纁束帛之賁亦當婉辭以謝高段干不見之節也乃兄兄弟後相率入洛又闔於賢愚是非昧昧與人家國事亦既屢蹈危險矣曾不知難而退謬膺重寄長沙王奉天子既不辨順逆而抗之又毫無設施以二十餘萬之衆敗績於一戰孟超宦者之弟耳而違犯節度奪人麾下曾不能效穰苴之於莊賈按法行誅此而爲將其免於敗者幾何後世徒以文章之美嘆息於若人之不得其死不知其出處大節早謬於入洛之初即使僥倖成功全身保位亦無足稱重而況持身處世曾無一端之可取耶士先器識而後文藝故敘其顛末以爲後世負才躁進者戒且俾知人論世者有所宗焉宅在越城西有二陸讀書堂舊說以入洛後懷舊居賦卽此地也

冥冥高唳鶴孤飛三泖湖波隱翠微太息華亭山下宅當年何事不同歸
不歸或者爲君親韜晦何妨作逸民才略未成三世將文章先署兩朝人
卽論文章亦未工辨亡諸論說多窮三張聲價何勞減更有三都左太沖
從君折節讀書來慷慨觀戎好將才不死東吳死西晉城南可惜孝侯臺

麾扇渡是晉丹陽內史顧榮揮散陳敏兵處

顧榮字彥先吳丞相雍之孫神機朗悟弱冠仕吳爲黃門侍郎太子輔義都尉吳平與陸機兄弟同時入洛號爲三俊爲尙書郎廷尉正趙王倫子度長史齊王冏大司馬主簿懼禍及終日昏酣不親府事以爲

中書侍郎周誅封嘉興伯長沙王又爲驃騎將軍復以榮爲長史又敗轉成都王丞相中郎惠帝幸臨漳以榮兼侍中西遷長安徵爲散騎常侍以世亂不應還吳東海王越聚兵徐州以榮爲軍諮祭酒屬廣陵相陳敏反假榮右將軍丹陽內史敏欲誅諸士人榮說之免仍遣甘卓出橫江榮說卓與周玘紀瞻潛謀起兵攻敏榮登橋歛舟於南岸敏出不獲濟榮麾以羽扇其衆潰散事平還吳永嘉中徵拜侍中行至彭城見禍難方作念輕舟而還元帝鎮江東以榮爲軍司加散騎常侍六年卒官贈侍中驃騎將軍開府儀同三司諡曰元按榮與陸機兄弟皆東吳著姓弱冠登朝吳之亡也旣不能以身殉國而相率入洛均認出處之義榮麾扇之役幸而獲濟揆之君子之道不能無媿焉麾扇渡卽今毛公渡

當年入洛稱三俊白裕曾爲二陸哀試問出師諸將退何如破敵一麾來指揮如意
眞名士慷慨成功大將才今日晚涼湖上過秋蓮葉葉背風開

晉平西將軍周孝侯讀書臺

周處字子隱義興陽羨人父鮪吳郡陽太守幼孤未弱冠膂力絕人不修細行州曲患之因父老言入山射虎投水斬蛟入吳尋二陸厲志好學志子義烈仕吳爲東觀右丞孫皓時爲無難督又嘗以太常卿封禪國山吳平入洛遷新興太守撫和戎狄雍土美之轉漢廣太守以母老罷歸除楚內史拜散騎常侍遷御史中丞糾劾不避寵戚梁王彤違法處深文按之氏人齊萬年反朝臣惡其疆直乃使隸夏侯駿西征孫秀勸以母辭處曰忠孝之道安得兩全今旣辭親事君父母安得而子之乎今日是我就死所也旣而形爲征西大將軍都督關中諸軍事處知彤不平必當陷已自以人臣盡節不宜辭憚乃悲慨卽路志不生還賊屯梁山有衆七萬駿逼處以兵五千擊之軍多未食彤令速進而絕其後繼處知必敗自旦及暮

斬首萬計絃盡矢絕盧播解系不救左右勸退處按劍曰此吾効節授命之日何退之爲力戰而沒追贈平西將軍元帝爲晉王從太常賀循議論法執德不回曰孝遂以諡焉處策馬觀戎艱難百戰殉節於行陣之閒其死可謂烈矣然仕吳職兼文武列階卿貳以孫氏四世之澤豈無可與共殉國難者不死於吳而死於晉是可惜也作俑入洛者不能不歸咎二陸矣臺在南門外飲虹橋東抵城接赤石磯徐溫築城時猶全明初開拓城垣遂劈其半於城外今城內半阜有小菴建臺以存古跡

嗚呼周孝侯入山射虎水搏蛟爲謝父老吾改矣折節勵志真人豪嗚呼周孝侯東觀丞兼無難督明年青蓋入洛陽未免主憂臣亦辱嗚呼周孝侯郡守中丞各稱職頗使風俗敦古處儘有朝臣惡彊直嗚呼周孝侯奉詔西討齊萬年卽路悲慨謝老母自古忠孝難兩全初隸夏侯駿後隸梁王彤駿驕彤仇必見陷人臣盡節惟匪躬五千兵擊七萬衆後援不繼難爲中慷慨賦詩按劍怒太息策馬觀西戎効節授命在今日受命本出凶門凶執德不同諡以孝貞節克舉全其忠陽羨山中昔年住秣陵城南讀書處讀書當日事二陸定與清譚誦文賦當時若使從河橋或者戰功成一怒文人豪傑俱併命從此金行蹙國步三定江東宣佩賢將門功業昭南渡（孝侯子玘字宣佩三定江南）

晉太子洗馬衛玠墓

玠字叔寶晉司空瓘之孫風神秀異總角乘羊車入市見者以爲玉人及長好言元理妻父樂廣有重名議者以爲婦公冰清女婿玉潤爲太傅西閣祭酒拜太子洗馬以天下大亂扶輿母轉致江夏玠妻先亡征南將軍山簡以女妻之遂進豫章時王敦鎮豫章玠以敦好居物上非忠臣求向建業京師人士聞其姿容觀者如堵玠勞疾遂甚永嘉六年卒時年二十七人謂之玠被看殺葬於南昌咸和中改塋於江甯丞相王導教曰衛洗馬明當改葬此君風流名士海內所瞻可修薄祭以敦舊好玠嘗以人有不及可以情恕非意相干可以理遣故終身不見喜愠之容蓋君子也墓在新亭東

當年衛洗馬寂寞此山阿埋骨人長往言愁爾奈何婦翁空水鏡家國總銅駝東望長江水滔滔感逝波

晉豫章太守梅賾祠

賾嘗得古文尙書於大航頭自宋以來諸儒多疑其僞吳才老曰古文皆文從字順非若伏生書之詰曲聳牙朱子曰凡書易讀者皆古文豈有數百年壁中之物不譌損一字者伏生所傳皆難讀如何伏生偏記其所難而易者偏不能記又孔安國書傳是魏晉閒人作託安國爲名耳又曰孔傳並序皆不類西京文字似與孔叢子同出一手吳草廬以梅賾所增二十五篇體製如出一手采輯補綴雖無一字無所本而平緩卑弱殊不類先漢以前之文此皆疑古文爲僞者自此三說行而後人附和紛紛大概不越古文何以皆易讀今文何以皆難讀二語不知古文所以易讀之故本在史記儒林傳及安國書序中學者初不深求耳儒林傳曰孔壁有古文尙書安國以今文讀之安國書序曰科斗書廢已久時人無能知者以所聞伏生之書考論文義定其可知者隸古定以竹簡寫之增多伏生二十五篇由此以觀是安國本不

識古文以伏生之今文對讀始以意揣而識其字既識古文則今文所無者即以今文與古文相同之字讀之間有不識者則以文義貫穿之略如鳩摩羅什及房融等之譯經其義則原本其詞則有出於繙譯時之潤色者故與諸書所引尙書轉有參差不盡符之處且所譯之二十五篇體製如出一手職是故也蓋安國所傳古文原從科斗字譯出非字字皆科斗原文毫無改換也後人不於科斗轉爲隸字之處反覆推求但謂古文卽科斗原文因致疑於二十五篇文從字順謬矣閻百詩謂蕭何以六體試學童一曰古文卽科斗是漢初已使人習之何以孔壁中古文無人能識然衛恆書勢謂古文絕於秦漢與人不識故逸在祕府不立學官恆晉人去漢未遠其說必有所自當秦焚書書之科斗字者已盡在所焚中否則藏之壁莫敢習讀其所行者惟斯篆邈隸是漢初科斗之學已絕迨後壁書漸出如安國輩以今文讀之解識傳播始有識者至哀平閒劉歆好之欲立博士然窺非人人皆曉故諸儒皆畏難而不肯立況安國時去秦未久而謂人人皆識乎至今文尙書以出於伏生口授罕有疑之抑思盤庚等篇所以告諭愚民使之家喻戶曉豈轉作此艱澀不可解之語若謂當時語言本是如此則左傳國語所引夏書商書何以又多文從字順耶蓋伏生以九十餘歲老翁追憶少所記誦豈無遺忘加以齒豁口呿之年語音未免淆混又以土音授異鄉之人兼令女子傳述字句亦不免譌謬然則今文尙書亦未必皆孔氏原本正不必易讀而致疑難讀而深信也祠在梅岡六朝事蹟梅嶺岡因梅賾家於岡下得名在石子岡東近雨花臺舊志云賾爲豫章內史嘗營屯焉

諸儒莫怪訟紛紛又向航頭得古文故里尙傳梅內史叢祠惟說晉將軍金絲脊脊
恭王壁竹簡戎戎汲郡墳一樣遺書同壽世二千年後護靈芸

西浦是杜蘭香遇張碩處

杜蘭香者有漁父於湘江洞庭之岸聞兒啼聲四顧無人惟三歲女子在岸側漁父憐而舉之十餘歲天姿奇偉靈顏殊瑩迨天人也忽有青童靈人自空而下來集其室攜女而去臨昇天謂其父曰我仙女杜蘭香也有過謫於人間元期有限今去矣自後時亦還家其後於洞庭包山降碩家蓋修道者也蘭香降之三年授以舉形飛化之道碩亦得仙初降時留玉簡玉唾孟紅火浣布以爲登真之信焉事見塘城集仙錄西浦亦有蘭香遇張碩處西浦卽新林浦在白鷺洲或始過於西浦後乃降於包山歟輿地記云西浦在金陵晉桂陽張碩遇神女杜蘭香於此

新林花落影猶香仙蹟風流水一方神女來時春綽約美人去後月昏黃桂旗翠羽思浮洛瑤瑟冰絃怨夢湘悵我年來謫塵世玉天舊事總淒涼

附錄

錢塘女史 汪端小韞

斑斕翠節獨來遲西浦潮生月落時碧水相傳近桃葉鈿車想見侍萱枝巫峯夢雨瑤姬廟秦苑涼煙鳳女祠從古仙姝多小謫蕊珠舊侶定相思

附錄

錢塘女 史陳華嫩蓴仙

新林花影漾莓苔聞說仙蹤此地回天上青童何日去江頭玉女幾番來采鸞下降香留韻秦鳳雙飛月滿臺我在包山山下住訪君遺蹟更徘徊（洞庭西山亦有蘭香遺蹟余家洞庭故云）

金陵歷代名勝志卷二（又名秣陵集）

錢塘 陳文述 退庵

五馬渡是晉元帝渡江處

在幕府山下晉元帝與西陽汝南頓彭城五王於此渡江當時有五馬浮渡江一馬化爲龍之謠後人因建化龍亭於其地

海門東下暮潮迴建業山川慨霸才五馬渡來天塹闊一龍化後六朝開飄蕭白鷺江流古寂寞銅駝故國哀牛首崔巍啓雙闕青天彩翠共徘徊

盧龍山

在城北二十五里上元儀鳳門內晉元帝初渡江見此山形似塞北盧龍故名明初改名獅子山宋虞允文三宿巖在其下

漁陽形勝古盧龍莽莽青連一萬重遼海秋寒驕苜蓿秣陵春雨長芙蓉江南地僻驚千嶂塞北山多借一峯我向白狼河上見蒼然雲氣滿居庸

鴈門山

在上元東南建康志山勢連縣類北地雁門故名一名陽山今日孔山上有溫泉

笳聲吹得暮雲愁牧馬蕭蕭古石頭割取秣陵青一角西風殘照鴈門秋

鴈門何處鴈橫天萬木秋風響暮煙滿地衰蘭鏘碎玉更無人解說溫泉

迎擔湖

在石城後五里東晉初衣冠避難南來主客相迎於此遂以爲名齊書作額擔湖

荆棘銅駝付戰塵衣冠南渡此湖濱可憐經略中原事輸與嵩山鬻畚人

天闕

在城南三十里舊名牛首山雙峯秀起太興中議立雙闕王導弗欲陪乘出官陽門望牛頭山兩峯曰此

天闕也豈煩改作建康實錄注天寶初改名天闕山

雙闕橫天起蒼茫接石頭飛揚龍虎氣拱翊帝王州形勢齊中夏烽煙息上游大風

雲起處猶作晉時秋

幕府山是王導開幕府處

在城西北二十里上元縣神策門外晉初王導開幕府於此因以爲名上有仙人臺

過江第一王文獻佐命功高借箸籌已共琅邪卜東渡更羅豪傑聚南州仙人臺迥
羣峯立相府蓮開絕嶂秋周玘顧榮盡人望莫令裙屐比風流

新亭

一曰中興亭在城南石馬山之陰六朝時近江渚乃南來取臺城要道齊武帝所謂新亭既是兵衝者是

也新志以爲大約在大勝關世說過江諸人暇日輒至新亭周顛曰風景不殊舉目有河山之異王導曰當共戮力王室何至作楚囚對泣耶卽此

一灑新亭淚登高望石頭琅邪新帝子河朔舊神州慨慷資齊相淒涼弔楚囚於今風景好極目總悲秋

汝南灣感劉碧玉事

樂苑曰碧玉者宋汝南王所作也碧玉汝南王妾名以寵愛之甚所以歌之其辭曰碧玉破瓜時卽爲情顛倒芙蓉陵霜榮秋容故尙好又曰碧玉小家女不敢攀貴德感郎千金意慙無傾城色又曰碧玉小家女不敢貴德攀感郎意氣重遂得結金蘭又云碧玉破瓜時相爲情顛倒感郎不差卽回身就郎抱又云杏梁日始照薰席歡未極碧玉奉金杯淥酒助花色清商曲也灣當秦淮曲折處晉汝南王渡江家此故名

昔聞劉碧玉許嫁汝南王遺宅依淮曲無人話雒陽春花紅蛺蝶秋水紫鴛鴦樂府翻新調千金意不忘

陰山

在江甯西南二十里晉王導夢見陰山神於此因爲立廟

陰山山下草離離東下江聲似昔時空有灌壇神女夢更無鍾阜蔣侯祠寒烟榆葉邊人路霜月橙花野客詩（南宋周文璞詩陰山側畔月如霜不爲猿吟也斷腸折

得橙花無處賞帶枝分與權船郎文璞字野齋）我向北平城上望潮河秋水記相思（古北口在陰山潮河繞其下）

晉隱士郭文舉書臺

晉書隱逸傳郭文字文舉河內軹人少愛山水洛陽陷步擔入餘杭大滌山中窮谷無人之境倚木於樹苦覆其上居十餘年猛獸害人獨不害文區種菽麥採竹葉木實買鹽以自供食有餘穀輒恤窮匱嘗有猛獸張口向文視有橫骨乃以手探去之王導迎置西園朝士咸共觀之植然箕踞旁若無人温嶠嘗問曰饑而思食壯而思室人之情也先生獨無情乎文曰思由憶生不憶故無情又問曰先生獨處窮山若疾病遭命則爲烏鳶所食顧不酷乎文曰埋藏者亦爲螻蟻所食亦何異乎又問曰猛獸害人顧獨不畏耶文曰人無害獸之心則獸亦不害人居西園七年未嘗出入一旦忽求還山不聽逃歸臨安山中及蘇峻反破餘杭而臨安獨全人皆異之以爲知機病卒後葬於所居之處今朝天宮太乙壇卽書臺遺址

篤行管幼安奇節夏仲御早探華陰函偶倚餘杭樹何年居西園朱門等蓬戶晚歸臨安山前知憶吾素齋物等蟻鳶曠觀陋雞鷺當年讀何書無人識章句雲樹戀斜陽猶照讀書處

層樓是顧愷之舊居

愷之字長康晉陵無錫人常爲桓温參軍義熙初爲散騎常侍尤善丹青圖寫特妙謝安深重之以爲有蒼生以來未之有也世傳愷之有三絕才絕畫絕癡絕見晉書文苑傳嘗於宅內建層樓以爲畫所景定

志云在府治右南廂花行街按宋時名層樓街當卽今三山街之花市也

何處尙層樓當年顧虎頭寄書題破冢遺跡畫滄洲山海悲知己雲霞感舊游（愷之拜桓溫墓詩山崩滄海竭魚鳥將何依人問會稽山川之狀云千巖競秀萬壑爭流草木蒙籠若雲興霞蔚）維摩金粟影更憶瓦官秋（瓦官寺有愷之畫維摩像）

東冶亭是晉太元中送別處

在城東汝南灣西臨淮水焦竑云汝南灣當秦淮曲折處大約今東水關北接青溪是其地也又冶亭在冶城晉謝安爲揚州袁宏爲東陽郡祖道於冶亭羣賢畢至不知何時改建於此也

落日尋東冶靡蕪依舊生春風吹碧柳猶作六朝聲

西池

亦名樂遊池一名太子湖本吳太子登所創晉明帝爲太子時修西池養武士於內宋元嘉中作樂游苑池當入苑內謝混游西池賦詩云水木滿清華卽此其地應在覆舟山南也

繁囿曾阿歲月遷樂游池水失澄鮮苑留禊飲琴尊地人憶清華水木篇西下追師
停五騎東堂遺詔惜三年有人曾賦于湖曲惆悵黃鬚七寶鞭（于湖地名王敦屯于湖將舉兵內向帝微行至于湖陰察敦壘溫飛卿湖陰曲是誤讀也楊鐵崖作于湖曲正之）

石城弔晉宣城內史贈廷尉再贈太常桓簡公（彝）

彝字茂倫譙國龍亢人漢五更榮之九世孫少孤貧性通朗有人倫鑒識時人方之許郭少與庾亮深交雅爲周顛所重起家州主簿拜騎都尉元帝爲安東將軍版行遂逾令累遷尚書吏部郎王敦擅權以疾去職明帝將伐敦引爲散騎侍郎敦平以功封萬甯縣男以溫嶠薦爲宣城內史蘇峻之亂糾合義衆長史裨惠以郡兵寡弱請須後舉彝厲色曰見無禮於君者若鷹鷂之逐鳥雀今社稷危逼義無苟安遣將軍朱綽敗賊蕪湖彝尋出石頭會司馬流敗於慈湖賊長驅徑進彝以郡無堅城退據廣德尋王師敗績彝慷慨流涕進屯涇縣時州郡多遣使降峻裨惠又勸彝僞與通和以紓交至之禍彝不從遣將軍俞縱守蘭石師敗縱曰吾之不可負桓侯猶桓侯之不負國也遂力戰而死彝固守經年勢孤力屈將士多勸彝僞降更圖後舉彝辭氣壯烈志節不撓城陷爲峻將韓晃所害年五十三宣城人紀世和率義故收葬之賊平追贈廷尉諡曰簡咸安中改贈太常俞縱亦以死節追贈興古太守初彝與郭璞善嘗令璞筮卦成璞以手壞之彝問其故璞曰卦與吾同丈夫當此非命如何竟如其言子五人溫雲齡祕冲溫自有傳庾周引知己許郭鑿人倫豺虎威方噬鷹鷂氣獨伸圍城空百戰遺墓自殘春太息金城客雄才失蓋臣

白石壘是晉征西將軍陶侃討蘇峻監軍李根所築

陶侃字士行本鄱陽人父丹吳揚武將軍吳平徙家尋陽早孤貧爲縣吏廬江太守張夔因范逵之薦召爲督郵察爲孝廉至洛陽詣張華與語異之除郎中劉宏爲荊州刺史辟侃爲南蠻長史遣討張昌破之陳敏之亂宏以侃爲江夏太守加鷹揚將軍破敏弟恢以母憂去職服闋參東海王越軍事元帝加侃奮

威將軍遷龍驤將軍擊杜叡破之王敦表侃爲甯遠將軍南蠻校尉荊州刺史爲王貢杜曾所敗白衣領職旣而復之邁克長沙將還江陵爲王敦所留將殺之俄而意解左轉廣州破杜宏執劉沈斬王機獲溫卻以功封柴桑侯太興初進號平南將軍加都督交州軍事進號征南大將軍及王敦平遷都督荆雍益梁州諸軍事領護南蠻校尉征西將軍會蘇峻作逆京都不守平南將軍溫嶠侃向赴朝廷推爲盟主與庾亮等俱會石頭從監軍議立白石壘斬峻於陣又斬峻弟逸於石頭旋江陵以爲侍中太尉改封長沙郡公加都督吏廣甯七州軍事以江陵偏遠移鎮巴陵後將軍郭默矯詔襲殺平南將軍劉清輒領江州侃表討默執而誅之詔侃都督江州移鎮武昌拜大將軍劍履上殿入朝不趨讚拜不名上表固讓疾篤上表遜位臨津就船薨於樊溪年七十六追贈大司馬祠以太牢諡曰桓侃在軍四十一載雄毅有權明悟善斷決自南陵迄於白帝數千里中路不拾遺末年懷知足之分不與朝權尙書梅陶與曹識書曰陶公機警神明似魏武忠順勤勞似孔明陸抗諸人不能及也謝安每言陶公難用法而恆得法外意其爲世所推重如此白石壘在今上元縣西北神策門外之石灰山下南齊永明中移後琅邪城於此一名白下城輿地志云白下本江乘之白石壘也齊武帝以其依帶江山移琅邪郡居之唐書地志武德七年罷金陵縣築白下縣貞觀七年復舊治此城廢

柝靜嚴城靖武昌當年築壘此勤王登壇再誓朝賢在倫鼎同扶漢業光查浦近連江水闊蔡州遙指暮雲荒監軍踞險兵鈐勝誰與銘功話夕陽（士行疆場之勛見重史冊惟蘇峻之難以不與顧命爲恨溫嶠要侃同赴遣師復追比至石頭又因失利欲旋因嶠一再與書始克殄平淪鼎再甯不得以太真爲功首矣其築壘白石

也夜修曉訖屯兵踞險實爲破敵之要李根之功懋焉

四望山

在定淮門外西北溫嶠築壘於此以拒蘇峻

當年忠武屯兵處遺趾春深戰後耕白石近連李根壘沙門遙指蔡洲營千重山色屯雲勢一片江濤戰鼓聲今日登高空四望暮雅飛盡石頭城

晉贈侍中驃騎將軍卞忠貞公壺墓

卞壺字望之沛陰宛句人祖統琅邪內史父粹張華壻也仕至侍中中書令爲長沙王父所害壺遺家禍還里元帝鎮建業召爲從事中郎出爲明帝東中郎長史遭繼母憂旣葬起服舊職累辭不就服闋爲帝子師壺前後居師佐之任盡匡輔之節一府貴而憚之洊至吏部尙書王含之難加中軍將軍含滅以功封建興縣公遷領軍將軍明帝不豫領尙書令與王導等俱受顧命成帝卽位皇太后臨朝壺與庾亮對直省中共參機要王導稱疾不朝私送郗鑿壺奏以導缺法從私請免導官舉朝震肅庾亮將徵蘇峻壺固爭亮不納壺與溫嶠書策其必敗峻果稱兵詔以壺都督大桁東諸軍事戰於陵西爲峻所破峻進攻青溪壺時發背創猶未合力疾戰死年四十八二子旰飡同戰死峻平從尙書郎宏訥議贈侍中驃騎將軍開府儀同三司諡忠貞旰飡散騎侍郎旰奉車都尉參母表氏撫二子屍哭曰父爲忠臣子爲孝子復何恨耶其後盜發壺墓安帝詔給錢十萬以修塋兆第三子瞻位至廣州刺史史臣曰卞壺束帶立朝以匡正爲己任褻裳衛主蹈忠義以成名遂使臣死於君子死於父惟忠與孝萃其一門古稱社稷之臣忠貞

之謂矣墓在冶城朝天宮西歷代更修相傳明初立廟

金行南渡猶多難第一忠臣卞望之經國無才憐庾亮一時同志許桓彝易名屢重
當時議修墓猶深異代悲太息國殤同葬處青溪流水繞殘碑

晉丞相王文獻公導墓

導字茂宏光祿大夫憑之孫父裁鎮軍司馬導少有風鑒識量清遠年十四陳留高士張公識爲將相之器初襲祖爵卽邱子後參東海王軍事時元帝爲琅邪王與導素相親善帝在洛陽每勸之國帝鎮下邳請導爲安東司馬軍謀密策知無不爲徒鎮建康吳人不附導勸帝延賀循顧榮以來吳人百姓歸心焉洛京傾覆中州人士避亂江左導勸收其賢人君子與之圖事朝野傾心號爲仲父晉國旣建以導爲丞相軍諮祭酒俄拜將軍揚州刺史領中書監帝登尊號進驃騎大將軍儀同三司以討華軼功封武岡侯王敦反導從兄也率羣從詣臺待罪帝以導忠節有素特還朝服敦平封始興郡公進位太保司徒如故帝崩與庾亮同受顧命輔幼主亮將徵蘇峻導止之不從旣而難作導入宮衛帝峻不敢害旣而攜二子奔於白石賊平溫嶠議遷都豫章三吳之豪請都會稽導不可而止咸和五年薨年六十四贈櫬之禮依漢博陸侯及安平獻王故事中興名臣莫與爲比諡曰文獻史臣以夷吾體仁能相小國孔明踐義善翊新邦比之似矣特是導敦之從弟也逆臣賊子近出同族旣不能先事機以弭變又不能仗大義以滅親向使舉兵內向之日天不祚晉敦疾遽瘳子弟發悲竟成虛設則典午之祚琅邪易之導亦不過效安平之一慟耳春秋誅意不能不以觀望之罪爲文獻責矣墓在幕府山西

翊戴中興有遠謨琅邪東海藉匡扶竟支江左偏安局能奠強臣內難無後世史家

匹諸葛當年人望屬夷吾金刀淮水貽謀遠宰木繁霜未合枯

慈湖

在城南五十里石季龍寇歷陽趙允屯慈湖蘇峻敗司馬流於慈湖嘗此地

芳草連塍被陽夕慈湖烟水亦滄桑遙知一片春蕪綠曾是南朝舊戰場

晉句漏令葛洪故里

葛洪字稚川丹陽句容人祖系吳大鴻臚父梯晉邵陵太守洪少好學尋書問義期於必得尤好神仙導養之法從祖元吳時學道得仙號葛仙公以其煉丹祕術授弟子鄭隱洪就隱學悉得其法師事上黨鮑元見洪重之以女妻洪洪傳元業兼綜練醫術凡所撰著皆精覈是非而才章富贍太安中石冰作亂爲吳興太守顧祕將兵都尉攻冰別率破之遷伏波將軍見天下已亂避地南土參廣州刺史嵇含軍事含遇害久停南土元帝爲丞相辟爲掾以平賊功賜爵關內侯以千寶薦選爲散騎常侍領大著作辭不就聞交阯出丹砂求爲句漏令至廣州刺史鄧嶽不聽去乃止羅浮山中優游閑養著述不輟著子言黃白之術名曰內外篇自號抱樸子因以名書其餘著述篇章富於班馬死年八十一顏色如生體亦柔軟舉尸入棺輕如空衣世以爲尸解得仙云故里在今陶吳鎮

服食丹經總祕傳鮑元鄭隱各淵源羅浮山有煙霞宅抱樸書留內外篇久已新編
傳隱逸遂令國史志神仙初陽臺畔吾家在丹井激泓汲玉泉（錢塘葛嶺亦洪舊居其上有初陽臺）

洞元觀相傳是葛洪飛昇處

觀在天印山麓下有洗藥池鍊丹井

神山何必盡荒唐宮觀青山尙夕陽丹井自留泉脈古藥池猶覺水痕香初陽禮罷
臺仍在句漏歸來味較長笑我一官艱入手也思鸞鶴共飛翔

晉贈宏農太守郭璞墓

郭璞字景純河東聞喜人父瑗尚書都令史璞好經術博學有高才詞賦爲中興之冠好古文奇字從郭公受青囊洞五行天文卜筮之術京房管輅不能過也惠懷之際河東先擾璞避地東南王導引參軍事於時陰陽錯謬刑獄繁興璞屢上疏言事嘗著江賦南郊賦又以才高位卑乃著客傲以母憂去職末期起爲王敦參軍敦之謀逆也溫嶠庾亮使璞筮之對不吉復令占已吉兇璞曰大吉敦將舉兵又使璞筮璞曰無成敦固疑璞之勸嶠亮乃問璞曰卿更筮吾壽幾何對曰若問卦明公起事必禍不久若往武昌壽不可測敦怒曰卿壽幾何曰命盡今日日中敦怒收璞詣南岡斬之年四十九王敦平追贈宏農太守璞撰洞林新林卜韻注釋爾雅別爲音義圖譜又注三蒼方言穆天子傳山海經及楚辭子虛上林賦數十萬言又所作詩賦誄頌數萬言皆傳於世璞蓋文士中之抗節不屈者固東晉之第一忠臣也而史家以術數短之謬矣墓在元武湖中名郭仙墩與南岡殉節處相近

烏冊龜枚出郭公青囊奇術更誰同著書定合齊班固列傳知應並葛洪當日危言
排國難何年殘骨葬孤忠君看浮玉山前石元武湖波一水通（金山亦相傳有景

純墓)

晉前將軍溫忠武公嶠墓

溫嶠字太真司徒羨弟之子父愴河東太守嶠性聰敏有識量少以孝弟稱於邦族平北大將軍劉琨之妻嶠之從母也琨深禮之請爲參軍加建威將軍將兵討石勒屢有戰功二都傾覆元帝初鎮江左琨使嶠檄告華夷奉表勸進除散騎侍郎明帝卽位拜侍中轉中書令王敦請爲左司馬阻兵不朝嶠諫不從還都奏敦謀逆請先爲備加嶠中壘將軍破王含錢鳳事平封建甯縣開國公進號前將軍奏軍國要務多見納用與王導諸人同受顧命代應詹爲江州刺史鎮武昌蘇峻反遣師赴難庾亮來奔以太后詔進嶠驃騎將軍辭不受要陶侃同赴國難推爲盟主侃屢欲還嶠再三遣書要之慷慨登壇流涕誓衆卒以滅峻事平拜驃騎將軍加散騎常侍封始安郡公朝議留輔政嶠以導先帝所任固辭還藩卒於牛渚年四十二追贈侍中大將軍諡忠武初葬豫章朝廷追嶠勳德將爲造大墓於元明二帝陵之北陶侃表請止之其後嶠妻何氏卒子放之載喪還都詔葬建平陵北在幕府山陽

不是中興第一流誰扶王室奠神州劉琨奉表來河朔陶侃連營次石頭玉鏡臺前
姑女笑然犀亭下水官愁建平陵北遺墳在幕府山高老樹秋

金城是桓溫爲琅邪內史所居

溫字元子宣城太守彝之子生末期溫嶠見之曰是兒有奇骨異英物也彝以嶠所賞名之曰溫彝爲韓晃所害涇令江播與焉溫年十五枕戈復仇會播已終刃其三子於喪次及長姿貌甚偉面有七星劉恢

曰孫仲謀司馬宣王之流亞也尙南康公主襲爵萬甯男除琅邪太守累遷徐州刺史都督荆梁四州諸軍事永和二年伐蜀平之石季龍死溫欲北征上疏欲朝廷議水陸之宜久不報知朝廷殷浩抗已甚忿聲言北伐拜表便行順流而下行達武昌簡文帝時爲撫軍與溫書明社稷大計疑惑所由溫卽迴軍還鎮時浩至洛陽屢戰屢敗溫乃奏廢浩自此權一歸溫乃自襄陽征關中破苻生欲修復園陵移都洛陽不許進征討大都督自江陵北伐行經金城見少爲琅邪時所種柳皆已十圍慨然曰木猶如此人何以堪攀枝折條泫然流涕遂涉淮泗踐北境破姚襄繕復諸陵加侍中大司馬都督中外諸軍事假黃鉞陳便宜七事加揚州牧錄尙書事朝議召溫入朝參政溫行至赭圻詔止之溫遂城赭圻固讓內除移鎮姑孰溫以雄武專朝窺覲非望或臥對親察曰爲爾寂寂將爲文景所笑衆莫敢對旣而撫枕起曰旣不能流芳百世不足復遺臭萬載耶嘗行經王敦墓曰可人可人其心跡如此太和四年上疏悉衆北伐至枋頭敗於襄邑委罪西中郎袁真表廢爲庶人真據壽陽以叛溫旣負其才力久懷異志欲先立功河朔還受九錫旣逢喪敗名實頓減於是參軍鄒超進廢立之計乃廢帝而立簡文帝詔溫依諸葛亮故事溫多所廢徙威勢翕赫簡文帝崩孝武卽位徵溫入輔拜高平陵因而遇疾卒於姑孰年六十二進贈丞相子六熙濟韻禕偉元元襲爵纂晉僞諡溫曰宣武尋爲劉裕等所滅金城卽前琅邪城亦名宣武城晉初渡江僑立琅邪郡郡所治城也桓溫始爲琅邪內史居之後以其僞諡名城在上元東北金陵鄉地名金城成宋書地志及景定志引王隱晉書山謙之南徐州記皆云江乘南岸蒲州津有金城卽晉琅邪城世說桓公經金城見昔爲琅邪時所種柳卽此

己平蜀棧達秦關逸氣飛騰將略嫻處仲東來心叵測深源北伐事多艱樓臺寂寞

金城成歌舞銷沈白紵山賸有琅邪舊時柳西風憔悴不勝攀

投書渚是晉豫章太守殷羨投書處

在石頭城下殷羨字洪喬陳郡長平人爲豫章太守都下人因其致書者百餘函行次石頭皆投之水中曰沈者自沈浮者自浮殷洪喬不爲致書郵見子浩傳

洪喬不作致書郵儘使函書付碧流一片石頭城下水西風吹動鯉魚秋
相思尺素託征帆何事浮沈付馬銜一笑深源他日事答書辛苦達空函

晉鎮西將軍謝尙宅

謝尙字仁祖豫章太守鯤之子幼有至性神悟夙成鯤嘗攜之送客或曰此兒一座之顏回也尙應之曰座無尼父焉別顏回席賓莫不歎異及長開率穎秀辨悟絕倫善音樂博綜衆藝司徒王導深器之比之王戎呼爲小安豐辟爲掾襲父爵咸亭侯轉西曹屬遷會稽王友入補給事黃門侍郎出爲建武將軍歷陽太守建元二年以爲南中郎將轉西中郎將假節鎮歷陽大司馬桓溫欲有事中原使尙率衆向壽春進號安西將軍張遇據許昌叛討之爲所敗降號建威將軍尙之行也使濮陽太守戴施據枋頭會冉閔之子智與其將蔣幹來附使劉猗詣尙請救施止猗求傳國璽尙致諸京師符健將楊平戍許昌尙遣師襲破之永和十一年尙書僕射出鎮歷陽有政績表求入朝尋進號鎮西將軍鎮壽陽采招樂人並製石磬以備太樂江表有鐘石之樂自尙始也桓溫北平洛陽請以尙鎮以疾不行升平初進都督豫冀幽并四州徵拜衛將軍未至卒於歷陽贈散騎常侍衛將軍開府儀同三司諡曰簡無子以從弟崇子康襲爵宅

在竹格渡今當通濟門處永和四年捨造莊嚴寺宋大明中路太后另造莊嚴寺於城西南樂園改謝寺爲謝鎮西寺

早年神悟說顏回長比安豐一代才玉璽功名由敵至烏衣風氣自君開 尙於諸謝爲
長安萬石皆從弟也 虛窗脚歧清風美聯舫論詩夜月哀何處佛煙零落盡古祠猶說鎮
西來

謝公墩

在冶城北二里謝安與王羲之共登悠然遠想有高世之志羲之謂曰四郊多壘宜思自效而虛談廢務
浮文妨要恐非當今所宜即此明初築城分其半以爲城基自王安石作詩有我屋公墩之句於是城東
又有一謝公墩以圖經考之安石所爭當是城東築以象會稽東山之土山也

謝公遐想處遺蹟冶城秋逸少高風在俱爲第一流虛談箴廢務定難見前籌一笑
爭墩者空貽澗壑羞

冶城懷晉右軍將軍會稽內史王羲之

羲之字逸少司徒導之從子祖正尙書郎父曠淮南太守元帝之過江也曠首創其議羲之幼訥於言及
長辨膽以骨鯁稱善隸書爲中興之冠起家祕書郎庾亮請爲參軍上疏稱其清貴有鑒裁遷甯遠將軍
江州刺史既拜護軍求宣城郡不許乃以爲右軍將軍會稽內史時殷浩與桓溫不協羲之與浩書以誠
之又與會稽王牋陳浩不宜北伐東土饑荒輒開倉賑貸吳會賦役繁重上疏爭之事多見從雅好服食

養性初渡浙江便有終焉之志嘗與同志宴集蘭亭自爲之序性愛鵝爲山陰道士書道德經又在戴山爲老姥書六角扇自稱我書比鍾繇當抗行比張芝猶當鴈行也少與王述齊名而義之甚輕之述膺顯授義之恥爲之下遂稱病去郡於父母墓前自誓旣去官與東士人盡山水之遊語人曰我卒當以樂死年五十九卒贈金紫光祿大夫有七子知名者五人元之早卒凝之左將軍會稽內史死孫恩之難徵之黃門侍郎楨之大司馬史操之豫章太守獻之吳興太守冶城是謝安與義之登覽處義之入品在安上登覽數語所見遠過於安後人以謝公名墩而義之不及豈不以名位耶義之名蹟多在會稽在金陵者惟冶城之遊因題一詩以志嚮往

北伐論殷浩東還傲謝安宣城求未得蜀道不辭難經濟工書掩襟懷避世寬會稽
何處是東望詠崇蘭

桃葉渡

古今樂錄曰桃葉歌者王子敬之所作也桃葉子敬妾名緣相篤愛所以歌之桃葉歌云桃葉映紅花無風自婀娜春花映何限感郎獨采我又云桃葉復桃葉桃樹連桃根相連兩樂事獨使我殷勤又云桃葉復桃葉渡江不待槽風波了無常沒命江南渡樂府清商曲辭吳聲曲也隋書五行志曰陳時江南盛歌王獻之桃葉辭云桃葉復桃葉渡江不用楫但渡無所苦我自迎接汝後隋晉王廣伐陳置將桃葉山下及韓擒虎渡江大將任蠻奴至新亭以導北軍之應子敬獻之字也桃葉渡在秦淮晉王獻之迎妾桃葉渡江處其地在今利涉橋郡志以晉王渡江處爲桃葉渡按此乃童謠之類不得以桃葉山爲桃葉渡也

綠波春水易銷魂江草江花舊夢痕一樣嬋娟同打槳如何人不說桃根

與郎羞見是相思，憔悴能歌團扇詞。都是南朝好顏色，風流還有謝芳姿。
樂府匆匆短夢過，琅邪辛苦柰情何。可憐鐵騎橫江日，六代江山一曲歌。
我亦人閒過半生，南朝遺事譜新聲。意中也有人如玉，可許橫江打槳迎。

東山

在城東南四十里，謝安思會稽東山所築，與謝元圍棋賭墅處。

謝公高臥處，千載此東山。江海平生志，林泉終古閒。偶然攜伎去，時復賭棋還。誰識
凌霞志，高風著此間。

謝行別墅用溫飛卿謝公墅歌韻

在清風鄉黃城橋安石圍棋所賭，卽此。後屬檀道濟名檀城溫庭筠謝公墅歌云：朱雀桁南纔香陌，謝郎東墅連春碧。鳩眠高柳日方融，綺榭飄飄紫庭客。文楸方罫花參差，心陳未成星滿池。四座無喧梧竹靜，金蟬玉柄俱持頤。對局含嘯見千里，都城已得長蛇尾。江南王氣繫疎襟，未許苻堅過淮水。

冶城路繞東山陌，萬竹連山影春碧。秦軍百萬動地來，指揮嘯傲山林客。花閒絲竹
聲參差，仿佛夜讌芙蓉池。全局未闌一着勝，兒輩破賊翁解頤。鶴唳風聲一千里，眼
底吳頭連楚尾。一笑莓苔履齒痕，捷書已過長淮水。

朱雀橋

在鎮淮橋北晉咸康中作朱雀門立朱雀浮航南渡淮水長樂渡其遺址也

朱雀門前朱雀橋行人喚渡雨瀟瀟六朝遺事知多少流盡清淮水一條

野草溪花媚晚涼殘基猶說晉咸康殿淮橋北無遺址何處當時廿四航

烏衣巷

在城南內有烏衣園世說注引丹陽記烏衣之起吳時烏衣營處也乃王謝故居今翦子巷至武定橋是其遺址

蒼涼古巷問烏衣南渡高名世所稀當世風流盡裙屐諸郎功業半淮淝舊家門第斜陽改六代江山燕子飛莫向東山弔絲竹銅駝石馬已全非

邀遂步是王徽之邀桓伊吹遂處

伊字叔夏父萬仕至侍中丹陽尹伊有武幹標悟簡率頻參諸府軍事時符堅強盛朝議選能授伊淮南太守以綏御有方進督揚豫與謝元破賊別將封宣城縣子符堅南寇與元等破堅淝水封永修縣侯進號右軍將軍伊性謙素雖有大功而始終不替善音樂爲江左第一有蔡邕柯亭竹常自吹之王徽之赴召泊舟青溪側素不相識客曰此桓野王也徽之令人謂曰聞君善吹篳篥試爲我一奏伊是時已貴顯素聞徽之名便下車踞胡牀爲作三弄便上車去客主不交一言時謝安女婿王國寶構安於會稽王道子嫌隙已成帝召伊飲譙安侍坐帝命伊吹篳篥伊更請撫箏乃歌怨詩曰爲君旣不易爲臣良獨難忠信事不顯乃有見疑患周且佐文武金滕功不刊推心輔王政二叔反流青弊節慷慨俯仰可觀安泣下沾衫

乃越席而就之捋其鬚曰使君於此不凡帝甚有媿色伊在州十年綏撫荒雜甚得物情桓冲卒遷督江州荊州十郡豫州四郡軍事江州刺史將軍如故卒官贈右將軍加散騎常侍諡曰烈邀遂步在秦淮今上水關是也或云在竹橋側

秦淮明月六朝樹流水無聲晚潮去遂聲吹斷晉時秋此地猶存邀遂步當時擲笛誰擅場江左第一桓野王子猷看竹不問主放誕簡率殊相當爲我一奏亦不惡便停畫舫驕胡牀一弄風雲動流徵再弄林壑生清商三弄激楚裂金石江城片片梅花涼天清地曠變秋色主客蒼茫各胸臆誰識溪頭橫遂人泚水奇功冠南北嗚呼孝武之旣朝政蕪道子昏營國寶諛謝安功業在社稷主相漸使僉王誣南渡江山勢衰弱澄清尙未收河洛重臣危疑關國是那得會稽臥雲壑賢奸倒著心不平遂人吹笛臣撫箏怨詩入歌意慷慨一弦一柱皆哀聲君臣此際釋疑患東山絲竹全功名御伎奏遂豈逮此國步從此橫庚庚世人只解說三弄何異賭墅誇棋枰又聞此笛柯亭竹三百年來瘦寒玉可惜中郎焦尾琴何年劫火燒桐綠

晉太傅謝文靖公安墓

謝安字安石尙從弟也父裒太常卿安年四歲時桓彝見之謂曰此兒風神秀徹後當不減王東海及總角神識沈敏風宇條暢善行書少有重名寄居會稽與王羲之許詢支遁遊處無虛世意公府交辟並不

至有司奏禁鋼終身遂棲遲東土及弟萬慶黜始有仕進志年已四十餘矣爲桓溫司馬除吳興太守徵拜侍中遷吏部尚書中護軍受簡文帝顧命孝武帝時桓溫威振內外人情嚙啗安與王坦之盡忠匡翼尋爲尚書僕射領吏部加後將軍及中書令時彊敵寇境邊書續至安鎮以和靖德政旣行威懷外著人皆比之王導謂文雅過之又領揚州刺史進中書監驃騎將軍錄尚書事加司徒復加侍中都督揚豫徐兗青五州幽州之燕國諸軍事時苻堅強盛率衆百萬次於淮淝京師震恐加安征討大都督遣兄子元破之驛書至安方對客圍棋看書旣竟棋如故客問之徐答曰小兒輩遂已破賊其矯情鎮物如此進太保欲混一文軌上疏求北征進都督十五州諸軍事時會稽王道子專權而奸諂安出鎮廣陵以避之安雖受朝寄東山之志始末不渝及鎮新城盡室而行造泛海之裝欲須經略粗定自江道還東雅志未就遂遇疾篤詔遣中使慰勞遂還都聞當輿入西州門自以本志不遂深自慨失薨年六十六贈太傅諡曰文靖墓在梅隨岡陳始興王叔陵發安墓棄去安柩以葬其母彭氏後以作亂誅毀彭氏墳廟以還謝世之塋今上虞亦有謝墓相傳晉末其子孫遷葬會稽

桓溫竟死苻堅破社稷功高志一邱少日風神並東海有人慟哭過西州梅岡舊塚
殘碑失蘭渚遺墳古墅秋太息白雞催夢醒更誰江左繼風流

附錄

錢塘女史汪端小轡

梅岡花落古苔平遺塚猶太傅名坐
弈果能催勁敵清談原不誤蒼生
十年別墅無絲竹(弟萬死安十年不聽絲竹)一語新亭罷甲兵
聞道始甯遷葬去青山依

舊暮雲橫

杜姥宅

在官陽門內晉成帝杜后母杜父之妻裴氏所居

不數王家與謝家城南杜曲自清華宣陽里第今何在到處猶簪白柰花

晉廣州刺史吳隱之故居

隱之字處默濮陽甄城人魏侍中質六世孫博涉文史有清操丁父憂每號泣行路流涕哭臨之時雙鶴警叫祥練之夕羣鴈俱集洊至龍驤將軍廣州刺史領平越中郎將至石門酌貪泉賦詩曰古人飲此水一畝懷千金若使夷齊飲終當不易心清操逾厲下詔褒美進號前將軍盧循寇南海長子曠之戰沒城破陷賊循表朝廷以隱之黨桓溫宜加裁戮詔不許劉裕與循書令遣之隱之還歸舟之日裝無餘資妻齋沈香一片投於湖亭之水及至家數畝小宅籬垣仄陋內外茆屋六間不容妻子劉裕更爲起宅固辭尋拜度支尚書太常以竹蓬爲屏坐無氈席遷中領軍清儉不革義熙八年請老九年卒

當年吳處默持節廣州城氣以投香烈心因酌水清蓬屏留故事茆屋感生平試問簪紳客孤操孰比卿

西州橋

西州城卽石頭城西州門卽石頭城門也謝安志欲東歸因病還郡入西州門以本志不遂深自慨失羊曇泰山人受知於安過西州門以馬策搥門誦曹子建詩曰生存華屋處零落歸山邱慟哭而去附見安

傳西州橋在今朝天宮側景定志云宜在今筍橋西

人生恩義真無盡况是同時第一流楊柳銷魂水流恨至今腸斷古西州

謝將軍廟

謝元字幼度安西將軍弈之子安之姪少穎悟安嘗戒子姪因曰子弟亦何豫人事而欲使其佳元答曰譬如芝蘭玉樹欲使其生於庭階耳安悅少好佩紫羅香囊安患之而不欲傷其意因戲賭取卽焚之長有經國才略爲桓溫掾桓豁司馬領南郡相監北征諸軍事解戴遂彭城之圍破句難等於白馬又破之君川進號冠軍領徐州刺史以功封東興縣侯及苻堅率兵於項城衆號百萬詔以安爲征討大都督元爲前鋒與叔父石從弟爰及桓伊譚元戴熙陶隱等率衆八萬距之戰於淝水堅衆奔潰聞風聲鶴唳皆以爲王師乘堅喪敗經造渦潁經略舊都進伐青州又伐薊州三魏皆降以青兗司豫平加都督七州軍事封康樂縣公會稽遼張願舉郡叛元自以處分失所求解所職詔不許卽路於道疾篤疏十餘上乃轉授散騎常侍左將軍會稽內史元乃輿疾之郡十三年卒於官年四十六追贈車騎將軍開府儀同三司諡曰獻武子煥早卒煥子靈運嗣彭城之役致命而死者小將田泓也淝水之役先進破敵者劉牢之也在秦軍唱言師敗者朱序也乘全勝之勢以經略中原不難光復舊物而天不祚晉二郡背叛使戰勝之師不及鋒而用之史臣曰康樂才兼文武志兼匡濟淮淝之役勅寇望之而土崩渦潁之師中州應之而席卷方欲西平鞏洛北定幽燕廟算有餘良圖不足降齡何促功敗垂成豈不惜哉廟在鳳凰臺東宋乾道間建明正德間太常羅玘有記

軍聲鶴唳將龍驤志拓南都定北疆解說庭階生玉樹最宜風度賭羅囊襟期羊祜

原儒雅功業周瑜最慨慷留得當年棋墅在古祠斜日共蒼涼

東府城是晉會稽文孝王道子舊第

道子孝武同母弟謝安薨領揚州刺史錄尚書假節都督中外諸軍事崇信浮屠酣歌爲務官以賄遷政刑謬亂許榮范甯上書先後論之嬖人趙牙爲道子開東第築山穿池用功鉅萬帝旣冠道子歸政王國寶總權王恭舉兵討國寶道子斬國寶以謝恭道子子元顯年十六請討恭滅之遂奪父權因發兵討桓元不勝見害道子亦被酖晉書論曰道子地則親賢任惟元輔耽荒麴藥信惑讒諛遂使尼媪竊朝權奸邪制國命始則彝倫攸斃終則宗社淪亡元顯以童丱之年受棟梁之寄專制朝廷凌蔑君親奮庸瑣之長材抗姦兒之巨寇喪師殄國不亦宜乎斯則元顯爲安帝之孫強道子實晉朝之宰詔者也東府城在臺城東南世說注引丹揚記東府城西有簡文爲會稽王時第東則道子所居道子領揚州仍居東府按揚州廡在石頭城時人以道子爲刺史不居廡而居東故號東府其後多爲親王之居與石頭同爲臺城南蔽也

姒尼攘攘門成市奴隸紛紛賄拜官壑谷但爲長夜飲諫垣曾記列章彈空聞親誼
陳徐邈如此人才繼謝安何處當年舊東府晉陵雲樹不勝寒

西園卽冶城園本桓元別苑也

桓元字敬道一名靈寶桓彝之孫溫之孽子太元末補義興太守棄官歸國王國寶用事王恭招殷仲堪及元匡正朝廷國寶死兵罷以元爲廣州刺史不行恭討王愉元舉兵應之恭爲元顯所敗死以元爲江

州仲堪等推元爲盟主上疏理恭旣而襲仲堪走死遂平荆雍進督八州元顯伐之元至新亭元顯
潛見獲被害元遂入居太尉府領平西將軍豫州刺史出居姑熟諷帝禪位劉裕等起兵興復元師敗遂
逼乘輿西上又敗於嶧嶧洲爲益督護馮遷所誅梟首大桁自篡盜至敗凡八句先是童謠云長干巷巷
長干今年殺郎君後年斬諸桓郎君謂元顯也嗣後桓氏雖平晉室不競宋以代興史所謂肇金行之禍
難成宋室之驅除者乎

游觀何處冶城園尙有殘基說姓桓先業空稱師北伐民謠早識巷長干仲堪肇覺
機偏誤元子貽謀事本難太息宣城曾死國不將忠孝奉心肝

栽松峴

太平寰宇記蔣山本少林木晉時使諸州刺史罷職還者栽松三十株下至郡守各有差焉
定知鱗鬣傲蒼龍化後空餘落葉封如此青山好烟景雨中何不更栽松

晉陵

建康實錄云在雞籠山陽皆不起墳元帝建平陵明帝武平陵成帝興平陵哀帝安平陵今不知其處郡
志謂十廟所據四高阜疑卽其處按雞籠山卽鍾山南麓今日龍廣山在駐防城北自香林寺後西接太
平門爲明代建城歷爲城址者皆是其山後倚鍾山前面東田最爲山水勝處故雷次宗於此立學晉諸
陵皆建於此俗以雞鳴寺山爲雞籠山者誤雞鳴山寺正臺城北塹耳

西風吹上最高層落日青山弔晉陵出地雙鵝終喪亂渡江五馬竟飛騰金墉故國

悲多難玉璽新符卜中興今日雞籠山畔過更無窅石照魚鑿
夕陽亭下禍根芟太息金行百事乖三后神靈元石象八王兵甲洛陽街上陵無地
悲文景歸國何年弔愍懷爭似南來諸帝子墓田猶得傍秦淮
朱雀宮門舊跡湮金甍何處問重泉一杯自勸長星酒七寶空留帝子鞭六代江山
都似夢四朝陵寢總如煙只餘王謝風流在墓草荒涼石獸眠
天光分曜史填胸遺事南朝百感重割據三分吳大帝湖山一角宋高宗秋生牛首
山頭月夢醒雞鳴寺裏鐘爭似孝陵無恙在掖門雲擁萬株松

晉元帝廟

元帝諱睿字景文宣帝曾孫琅邪恭王覲之子年十五嗣位琅邪王元康二年拜員外郎散騎常侍累遷
左將軍東海王越之將兵下邳也假帝輔國將軍監徐州諸軍事鎮下邳俄進安東將軍都督揚州諸軍
事越西迎大駕留帝居守永嘉初用王導計始鎮建業及懷帝蒙塵司空荀藩等移檄天下推帝爲盟主
愍帝卽位加左丞相進丞相大都督中外諸軍事建武元年愍帝詔攝萬機羣臣請上尊號不許依魏晉
故事爲晉王六月司空并州刺史劉琨幽州刺史段匹裨等百八十人上書勸進優令答之大興元年愍
帝崩問至百僚上尊號遂登壇南嶽受終於文祖大赦改元四年改元永興閏月崩年四十七葬建平陵
廟號中宗本紀以元石圖牛繼馬後謂恭王妃夏后氏通小吏牛氏而生元帝宮闈祕密識緯渺茫羸呂
之疑似不免於附會焉廟爲唐天祐三年置在下將軍廟西宋嘉定二年黃度作新廟於石頭兩廡祀當

時名臣三十六人

夕陽回首舊金墉
雙闕天開作九重
一帝此閒曾渡馬
諸臣當日定從龍
江山形勝思京洛
將相功名誓鼎鐘
同是偏安更衰弱
臨安誰祀宋高宗

金陵歷代名勝志卷三（又名秣陵集）

錢唐 陳文述 退菴

新洲行弔宋武帝

宋武帝諱裕字德輿小字寄奴彭城縣綏輿里人姓劉氏楚元王交之二十世孫當晉氏東遷移居京口祖靖晉安東太守考郡功曹帝素貧惟琅邪王謐敬之嘗伐荻新洲見大蛇長數丈射之傷明日復至聞杵臼聲見童子數人青衣擣藥曰我王爲劉寄奴所射合藥傅之曰王神何不殺之答曰寄奴王者不死叱之皆散收藥而返初爲冠軍孫無終司馬孫恩作亂爲前將軍劉牢之參軍破恩於鬱洲破盧循於永嘉循走廣州帝加彭城內史桓元篡晉與劉毅等起義衆推爲盟主移檄都下破之於崢嶸洲終平元洊至司徒錄尚書事燕嘉容超掠淮北帝抗表請北征破之於臨朐徐道覆說盧循南下衆十餘萬舳舻千里帝破之於大雷劉藩孟懷玉斬徐道覆杜惠度斬循父子遂誅兇州刺史劉藩豫州刺史劉毅豫州刺史諸葛長民及荊州刺史司馬休之子文寶兄子文祖姚泓新立關中擾亂表伐關洛遂加九錫建宋國至洛陽王鎮惡克長安擒姚泓送建康晉帝晉宋公爵爲王加十郡欲息駕長安經略趙魏以劉穆之卒乃歸晉安帝崩琅邪王卽位徽帝入輔帝遂代晉以晉帝爲零陵王殂焉宋志也在位三載葬初甯陵謚曰武皇帝新洲今薛家洲

渡江化龍金運止草澤英雄京口里漢家苗裔劉將軍伐荻新洲射龍子龍子不作龍牙須大蛇當道形衙衙將軍彎弓一發中亦如魚服困豫且高皇昔有斬蛇劍帝

今乃有射蛇箭杵臼擣藥聲丁丁一叱青衣忽不見竹林寺中龍章明雲陽宮裏龍翼生桓家新婦有智鑿此人虎步兼龍行以龍遇龍龍孰真以龍遇蛇龍益神慕容姚泓並螻屈何況水仙旗鼓徒紛紛五星聚井義熙九北伐親臨五龍口二百年史魚羊驕十六國帝牛馬走北伐當年惜草草西夏未平歸太早辛苦功歸統萬城中原南北終雲擾銅鐘玉璽紛貢珍亦如龍氣吹成雲禪讓魏晉篡故事後來更有齊梁陳太息嵩神金一餅曲阿王氣消無影今日薛家洲上過滿陂蘆荻秋風冷

覆舟山是宋武帝破桓元處

在太平門外與鍾山支脈相連亦名龍舟山一名元武山今曰蒼山

積翠遠橫天江流去若煙當年宋武帝於此破桓元霹靂驚龍子風濤走水仙南朝數人傑留跡此山前

樂游苑

在覆舟山南本晉樂園宋元嘉改爲樂游苑十一年三月禊飲並餞江夏衡陽兩王顏延之爲序卽此地也藥園亦名藥園宋武帝時於此築壘以備廬循

仙苑年何有流觴或此間傳聞藥園壘近在覆舟山祖道應攀柳妍歌定秉簡當年光祿序文藻重人間

鳳皇臺

宋元嘉十四年鳳皇見都下改其地曰鳳皇里起臺於山李太白登黃鶴樓以崔顥題詩在上乃至金陵賦鳳皇臺也今在南門內新橋西上瓦官寺徐中山西園遺趾本名叢桂庵焦竑易名鳳游寺

元康曾紀鳳皇至（漢元康元年鳳皇集泰山後人因其地爲臺余登岱曾至其地）
元嘉又見鳳皇來白門已改鳳皇里青山更起鳳皇臺六朝江聲走浩蕩雙闕雲氣森崔巍搔首青天喚鷺鶯謫仙長嘯真奇才

祈澤寺訪龍女獻泉成池處

寺在府治東南三十五里高橋門外祈澤山劉宋時初法師始居此少帝建名祈澤治平寺明嘉靖中重修爲祈禱雨澤處

南朝鹿苑碧蓮開莫是生公說法臺龍女如花復如玉聽經歸去獻泉來
雲作奇峯靄遠空神龍低蟄學秋蟲風鬢霧鬢偏顛賴辛苦涇河鞭雨工

招隱館

在鍾山西巖下宋文帝築館居雷次宗處南史隱逸傳次宗字仲倫豫章南昌人少入廬山事沙門釋慧遠篤志好學尤明三禮毛詩隱退不受徵辟宋元嘉十五年徵至都開館於雞籠山聚徒教授置生百餘人會稽朱膺之潁川庾蔚之並以儒學總監諸生時國子學未立上留意藝文使丹陽尹何尚之立元學太子率更令何承天立史學司徒參軍謝元立文學凡四學並建車駕數至次宗館甚厚還廬山公卿以

下並設祖道後又徵詣都爲築室於鍾山西巖下謂之招隱館使爲皇太子諸王講喪服經次宗不入公門乃自華林東門入延賢堂就業二十五年卒於鍾山子肅頗傳其業

四學雖同立儒家解讀書譚經留舊地招隱有精廬史局承天領禪宗慧遠居何如太平館芝桂屬元璩（楮伯玉字元璩錢唐人少有隱操避昏居剡隔絕人物王僧達爲吳郡苦禮致之邱孫珍與僧達書曰楮先生滅景雲棲抗高木食有年載矣自非折節好賢何以致之昔文舉棲冶城安道入昌門於茲而三焉乃可暫致不可久羈僧達答曰楮先生從白雲游舊矣此談討芝桂若已窺煙液臨滄洲矣齊高帝卽位手詔吳會二郡迎遣辭疾敕於剡白石山立太平館居之）

蕭思話彈琴石

思話南蘭陵人宋孝懿皇后弟子幼未知書好騎屋棟打細腰鼓後折節工隸書善彈琴能騎射官青州刺史平司馬朗之亂爲南秦二州刺史走楊難當平漢中置戍葭萌游官至中書令丹陽尹散騎常侍嘗從文帝登鍾山北嶺中道有盤石清泉上使於石上彈琴因賜以銀鍾酒謂曰相賞有松石間意石在鍾山說法臺東

盤石旣磊磊清泉亦潺潺山中一尊酒相賞松石間
長史少年時折節頗攻苦試彈焦尾琴何如細腰鼓

弘景吹笙閣子猷邀遂步一樣六朝人風流杳然去

宋征南大將軍江州刺史檀道濟舊宅

舊說檀城本謝元別墅後屬檀道濟故名在上元東北清風鄉黃城橋金陵志引異苑云檀道濟居青楊巷是吳步闡所居按檀城檀橋青楊巷康樂坊謝元別墅其說不一新志注以檀城當是屯兵處宅當在青楊巷檀橋則自在青溪康樂坊自當爲謝元宅所在大約元宅在康樂坊道濟宅自在青楊巷至檀城則先爲謝元別墅後爲道濟別墅耳青楊巷不詳其處白楊巷約在東府城今通濟門左右則青楊巷當亦不遠也道濟高平金鄉人從宋武帝建義游官至司空與魏軍三十餘戰魏人憚其形以禳鬼文帝疾篤劉湛忌之彭城王義康矯詔收付廷尉及其子八人並誅道濟見收目光如炬脫幘投地曰乃壞汝萬里長城人歌曰可憐白浮鳩枉殺檀江州魏人聞之曰道濟已死吳子輩不足復憚自是頻歲南伐二十七年魏軍南伐至瓜步文帝登石頭城望甚有憂色嘆曰若道濟在豈至此

西征北伐幾時休萬里長城在石頭別墅至今同謝傳威名當日重江州韓彭功大終遭戮張衛名高枉見收此日龍山西畔過更無人唱白浮鳩

宋臨川內史謝靈運墓

在本業寺中寺在麒麟門外建康實錄梁天監中建本釋淨玉捨宅南唐保大間重修有唐乾德年碑靈運謝元之孫少好學文章之美與顏延之爲江左第一縱橫俊發過於延之性豪侈衣物多改舊制出爲永嘉太守郡有名山水肆意遨遊旣免官以父祖葬始甯並有故宅遂移籍會稽與族弟惠連荀雍何長

瑜羊璿諸人爲山澤之游因求湖爲田與孟顛有隙詣闕自陳文帝不之罪以爲臨川內史遊放不異永嘉爲有司所糾司徒收之靈運遂有逆志爲詩曰韓亡子房奮秦帝魯連恥本自江海人忠義感君子執送廷尉免死徙廣州後以宋齊受獲趙欽云靈運使買弓刀要合篡奪詔於廣州棄市猖狂不已自致覆亡蓋文人之紕謬者也

江左烏衣有舊家鎮西門第昔豪華衣冠所尙稱康樂山澤之游在永嘉似爾文章
原古雅祇憐蹤迹太奇邪才人覆轍應相戒龔李詩中噪暮鴉

宋法曹參軍謝惠連墓

在官義鄉與本業寺相近惠連方明子十歲能屬文族兄靈運嘉賞之云每有篇章夢惠連輒得佳句殷景仁愛其才言於文帝爲彭城王法曹參軍年三十七卒

謝家羣從好高麗見斯人詩夢悟靈運才名重景仁詠星渺雲漢賦雪感陽春我有
同懷客西堂覓句新

烽火樓是宋文帝登望魏師處

一名白馬城丹陽記云吳時舉烽火處亦見三國志在石頭西南宋文帝紀魏太武至瓜步帝登烽火樓極望不悅曰使檀道濟在不至此卽此樓也

隔江應見陣雲生惆悵高樓接舊京我國旌麾方北伐彼軍戎旅亦南征籌邊應置
三山戍臨敵空思萬里城今日時清烽燧息佛狸祠下暮潮平

南龍山訪宋孝武殷貴妃墓

貴妃本南郡王義宣女義宣敗帝密取之假姓殷氏及薨帝常見之遂爲通替棺欲見則引替觀屍並諷有司奏引春秋仲子之宮立廟都下有巫者說帝貴妃可致畧於帷中見形如平生乃擬李夫人賦謝莊作哀策帝流涕曰不謂當今復有此才都下傳寫紙墨爲之貴皆見南史本傳隧路抽陰巫山鬱雲中泉寂兮此夜深響乘氣兮蘭馭風皆哀册中語

通替棺何在巖阿訪古墳宮齊魯仲子賦擬李夫人隧路悽寒月巫山鬱暮雲中泉
弔蘭馭惆悵謝莊文

含章殿是宋孝武帝女壽陽公主梅花點額處

宋宮城承東晉之舊含章殿當在今臺城相近也

飛英隨意鞞宮鴉小影分明萼綠華從此六宮新樣好曉粧祇點玉梅花
玉樹瓊枝着意題含章古殿玉階西定知曾入羅浮夢花落驚回翠羽曉
一枝猶放壽陽春鏡裏嬋娟玉貌新解爲宮鬢添韻事南朝公主更何人

宋光祿大夫顏延之墓

延之字延年琅邪臨沂人少孤貧好讀書無所不覽文章冠絕當世性疎誕不能取容宋元嘉中以中書侍郎出爲永嘉太守甚怨憤作五君詠以見志孝武登祚以爲金紫光祿大夫有愛姬嘗盪延之墜床致損子竣殺之元妾爲祟病卒諡曰憲子延之與謝靈運齊名議者以爲自潘岳陸機之後文士莫及江右

稱潘陸江左稱顏謝焉來蘇鄉後顏村有顏尙書墓疑卽是也

當年顏謝方潘陸錦繡文章亦可觀七載屏來無俗駕五君詠後有騷壇曾因堂構
流芳譽未免房幃愴墜歡一事差應勝康樂青山歸骨墓門寒

宋司徒何尙之宅

尙之字彥德廬江潯人少頗輕薄及長折節蹈道以操立見稱初爲臨津令宋武帝領征西將軍補主簿
少帝卽位爲廬陵王義真車騎諮議參軍義真被廢入爲中書侍郎遷吏部郎甚爲文帝所知領丹陽尹
爲立宅南郭外立學聚生徒東海徐秀等慕道來游謂之南學遷尙書左僕射上欲於元武湖中立三神
山造華林園並改鑄當兩錢尙之皆切諫致仕方山著退居賦文帝不許曰羊孟尙不得告謝謂羊元孟
顛也袁淑乃爲眞隱傳以嗤焉元兇劾立三方興義將佐家在都者劾悉欲誅之尙之誘說百端皆得
全免大明中以左光祿開府議同三司卒年七十九贈司徒諡曰簡穆公

早年南礪聚生徒中歲華林有諫書慕道孔荀仍載酒（魯郡孔惠宣潁川荀子華）
同時羊孟未懸車空勞袁淑譏眞隱曾入方山賦退居記與延年共游覽西池評鷺
定何如（尙之與延之並短小同游太子西池路人謂延之曰彼似猴爾君乃眞猴）

後湖

在太平門外周四十里有舊洲新洲龍引洲蓮蓴洲按此湖本古桑泊見建康志引徐爰釋聞吳寶鼎二
年開城北渠引後湖流入新宮名始著見建康實錄元嘉中築隄壅水名北湖見文選注引丹陽圖經又

元嘉中黑龍見因名元武湖孝武大明中大閱水軍於湖因號昆明湖俗又呼爲飲馬塘宋天禧四年改曰放生池熙甯八年王安石奏廢爲田並見景德建康志明時將天下版籍盡貯後湖見計宗道過後湖記一名蔣陵湖亦名秣陵湖又名練湖見建康志並所引丹陽記

黑龍負舟紫雲聚鳳皇飛來集元圃已築青山署景陽更浚明湖應元武湖波浩淼湖間昏北隄亘立長虹蹲離宮別起上林苑馳道更立承明門休龍闕武恩波逮犀甲樓船輝幢鎧不似蕭家射雉場後人惟說鷄鳴埭漢家苑囿恢黃圖當時亦號昆明湖武帝旌旗久寂寞石鯨鱗甲秋風疎蔣山雲氣青溪柳落日臨湖一杯酒甄郗殘夢草蕭蕭欲起承天問威斗

湘宮寺

是宋明帝舊宅在青溪中橋北中橋常卽今四象橋也明帝捨宅爲寺嘗欲造十級浮屠而不能乃分爲二帝謂晁尚之曰卿垂湘宮寺未此是我大功德虞愿曰此皆百姓賣兒鬻婦錢所爲何功德之有見虞愿傳愿字士恭會稽餘姚人宋元嘉中爲湘東王國常侍明帝立以原藩國舊恩除太常丞尙書祠部郎通直散騎侍郎出爲晉安太守海邊有越王石常隱雲霧相傳云清廉太守乃得見愿往就觀清徹無所隱蔽蓋賢者也

何處湘宮寺青溪古路紆文章新著錄（明帝在藩時撰江左以來文章志見本紀）
功德幾浮圖廢苑梁碑失（簡文帝有碑）長橋宋苑蕪蕭家遺壘在嘯煞白門烏（

齊始安王遙光以東府城畔蕭坦之屯湘宮寺見南史

宋車騎大將軍司空沈慶之宅

慶之字弘先吳興武康人爲留遠中兵參軍平濱北諸蠻副王元謨北伐佐孝武誅元兕劬爲領軍將軍南兖州刺史平魯爽進鎮北大將軍竟陵王誕反以爲車騎大將軍討之誕平進司空慶之居清明門外有宅四所室宇甚麗又有園舍在婁湖一夜攜子孫徙居之上嘗歡飲令羣臣賦詩慶之不知書口授曰微生遇多幸得逢時運昌朽老筋力盡徒步還南岡辭榮此聖世何媿張子房坐衆並稱其辭意之美孝武晏駕與柳元景並受顧命廢帝無道衆勸之廢立及誅何適並忌慶之乃遣其從子攸之齎藥賜死贈侍中太尉諡忠武公慶之征蠻患頭風好戴狐皮帽羣蠻呼曰蒼頭公文帝將北伐慶之固陳不可上使徐湛之江滿難慶之慶之曰爲國嘗如家耕當問奴織當問婢今欲伐國而與白面書生輩謀之事何由濟卒如其言婁湖苑本吳張昭故宅南史齊武帝紀望氣者言新林東府婁湖有王氣乃築青溪舊宮作新婁湖苑以厭之當在今駐防城東南南岡在周處讀書臺下舊有光宅寺乃梁武故居六朝士大夫多家此今蟒蛇倉石觀音院諸處是也

八十高年尙服戎生平一節矢孤忠滿朝白面饒君輩百戰蒼頭讓此公賜藥真疑酬願命懸車虛說謝成功祇今徒步南岡路苑樹蒼茫夕照中

東山弔宋守尙書右僕射中領軍劉劭

建康志云上元縣有兩東山一在崇禮鄉晉謝安築土擬會稽舊隱卽與謝元圍碁賭墅處今去縣二十

里一在鍾山蔣廟東北宋劉勔常經始鍾嶺以爲棲息及造園宅名爲東山今去縣十五里南史勔字伯猷仕宋爲甯朔司馬從劉道隆平竟陵王誕之亂除龍驤將軍鬱林太守代費沈平陳攢致名馬珊瑚連理樹晉安王子勛爲逆豫州刺史殷炎叛勔內攻外禦戰無不捷及炎請降勔約三軍不得妄動士庶咸悅元徽初月犯右執法太白犯上將或勸勔避職勔曰天道微遠避豈能免桂陽王休範作亂戰死朱雀門贈司徒諡昭公卽孝綽曾祖也

朱雀門前路將軍舊建牙軍聲振溫嶠星變應張華老樹翔歸鶴空山噪暮鴉忠臣不避難戰血灑平沙

茱萸塢

在鍾山是宋道士陸修靜隱居餌茱萸處

陸公遺趾已荒蕪深塢迴環古路紆風雨滿城作重九却來此地餌茱萸

石頭城弔宋司徒袁粲

石頭城在上元縣西世說注引丹陽記曰石頭城吳時土隄後內山加甃因江爲池地形最爲險固又劉孝標以此爲漢以前秣陵治建康實錄引輿地志曰吳時江在石頭城下爲險要必爭之地南北戰伐咸據此爲勝負亦名石首見梁武紀按東府石頭皆有城爲臺城南蔽故凡有攻戰悉據二城石頭對東府晉嘗卽西州城也又嘗卽今旱西門祭字景倩幼孤祖哀之命曰愍孫少好學以操行見知仕宋至尙書僕射領吏部加中書令明帝臨崩與褚彥回劉勔並受顧命桂陽王休範爲逆與陳顯達等平之齊高帝

既居東府使祭鎮石頭及革命祭自身受顧命不欲事二姓與劉彥節王蘊諸人相結謀矯太后令攻齊高帝於朝堂舉泄被害齊永明元年詔令改葬

石頭城上江月明石頭城下江水平司徒當日此殉節疾風勁草垂英名早年讀書立志節風雨如晦歌鷄鳴狂泉設喻皎冰玉滄洲寄興懷蓬瀛秦豫之元受顧命一時劉(勔)蔡(興宗)蜚英聲蕭家鬪將龍虎氣建康威望先東征一日破賊十二壘桂陽定後功崢嶸蒼梧磨鋌本猜忌領軍大腹真佳棚龍驤赤躍夜入殿髯張日電誰敢撓敬則躍床拔刀怒長刀遮客心魂驚昇明雖立亦齊志篡奪早已萌驕盈司徒此時氣慷慨石頭出鎮無強兵新亭矯節欲反正皇興辛苦扶危傾彥節出奔伯興死(劉彥節走雒擔湖爲齊武帝擒斬卜伯興與王敬則共總禁兵爲敬則所害)大廈一木空支撐父作忠臣子策名兩舉抒丹誠陽源昔日抗凶劬高門奕世皆忠貞遺孤復死狄靈慶鬪場甕狗皆猙獰當時彥回並受託黃襪重寄尤恩榮西閣拒奔氣頗正別鶴鼓調神尤清如何往事引魏晉宋臣志欲爲齊卿(彥回欲引魏何曾以魏司徒爲晉丞相求爲齊官)願以鄙心寄公腹狙詐聊以欺同盟白虹貫日竟亡宋龍顏早識空目矐秀之兄弟晉姻戚輸心宋武如嫫嫫恭帝亦爲楮佛死坐使火德銷金行乃知逆悖亦家法豈特狡獪非人情名德不昌乃多壽彥宣讜

論橫庚庚宋室忠臣有君在史家立傳昭定評至今弔古說遺事甯爲粲死毋淵生君不見石頭城

芳林苑

本齊高帝宅在青溪永明五年三月禊飲王融爲序卽此帝姓蕭氏諱道成字紹伯小字鬪將南蘭陵人少從雷次宗受禮及左氏春秋自左軍中兵參軍洊至中領軍南兗州刺史平桂陽王休範之亂蒼梧被殺順帝立進位相國封齊公遂受宋禪芳林本曹魏舊名後以避齊王諱改稱華林此沿其名永明中築青溪舊宮或卽其地

又值春修禊芳林繞畫隄文儒出東府詩序重南齊靈沼宣猷北華桐博望西祇今餘曲水煙雨暗青溪

靈和殿遺趾懷齊常侍張緒

張緒字思曼吳郡人張裕孫少清簡寡欲叔父鏡比之樂廣袁粲言於宋明帝曰張緒有正始遺風遷吏部郎洊至太常卿領國子祭酒齊武帝卽位轉吏部尙書遷散騎常侍緒吐屬風流聽者皆忘饑疲見者肅然如在宗廟雖終日與居莫能測焉劉俊之爲益州獻蜀柳數株枝條甚長狀若絲縷當時舊宮芳林苑始成武帝以植於太昌靈和殿前常賞玩咨嗟曰此楊柳風流可愛似張緒當年其見賞愛如此

何處靈和柳芳林問舊宮當年張散騎正始有遺風雅度人難似清談語最工長條攀不盡披拂暮煙中

雞鳴埭

在後湖畔齊武帝出獵至此始聞雞鳴故名齊武帝於六代之君始爲奢侈永明中宮女萬餘人數琅邪爲獵夜發宮中曉至元武湖北因有雞鳴埭之稱明初於臺城北塹立雞鳴寺後人誤以爲卽雞鳴埭不知埭在湖北今寺在湖南不相涉也以地形論之當在今邁高橋左右耳帝諱頽字宣遠高帝長子

銀河未斜月未落龍兒夜出壽昌閣璫瑁帖箭媒翳驕如夢青山抱西郭宮車駕時
鷄未鳴鷄鳴早見宮車行宮人曉粧起更早景陽夜半催鐘聲萬戶狂塵昏未起五
彩斑斑驕雉子將軍空說邯鄲超諫書朝陳夕賜死聞鷄起舞河朔吞昔有祖逖同
劉琨南北雲擾正逐鹿網羅惜未橫中原琅琊肆武潮溝渡不數前朝潘岳賦寶卷
家法立長圍射雉埭增三百處

附錄

蕭掄（樊村）

景陽鐘鳴天曉矣六宮美人起梳洗君王不待美人來宮漏未終魚鑰啓魚鑰啓
宮車行行埭上聞鷄鳴未明求衣天下理可惜君王只射雉

雉亭山

是齊武帝射雉處在城東北太平門外四十里吳大帝時蔣侯見形於此亦名騎亭山

閱武堂前勞酒餘新林苑裏落花初封章一上將軍死辜負相如諫獵書（將軍邯

鄆涪表諫射雉書奏賜死涪一作超

九日臺

齊武帝九日讌羣臣處卽商廳館在朝陽門外孫陵岡

雀羽龍文入夢來新宮舊苑一時開請看白下商廳館何異彭城戲馬臺（帝作青溪舊宮新婁湖苑以厭王氣）

博望苑

齊文惠太子立在臺城東鍾山下本傳太子引晉明帝立西池事求於東田起小苑並見南史齊鬱林王紀謝眺詩魚戲新荷動鳥散餘花落卽此地漢時有博望苑文帝借以名其園耳太子名長懋字雲喬小字白澤武帝長子以東田壯麗見責永明十一年卒子鬱林王立追尊爲文帝葬夾石曰崇安陵

臺城迢遞蔣山邊修竹依然隱暮煙已立宣猷齊北塹（太子宮內殿堂雕飾過於上宮開拓元圃與臺城北塹等慮上宮內望見乃旁列修竹外施高障宣猷堂在元圃卽太子宮也）更開博望起東田史留家令郊居賦人話山靈鑿佛年更闢荒蕪尋夾石崇安陵上草芊芊

齊竟陵王子良宅

舊說在蔣山引子良行宅詩訪宅北山阿卜居西郊外謂當近幕府山按本傳云五年正位司徒移居雞

龍山西邸集學士抄五經百家依臬覽例爲四部要略千卷招致名僧講論佛法造經眼新聲道俗之盛江左未有則自當以雞籠山爲可信且以當日城邑形勢論之北山西郊亦復相合蔣山幕府山皆不足據也子良字雲英武帝第二子

竟陵慕文學西邸近山開學士抄經入名僧造頌來上書空有志輔政幸無才要略
今何在殘碑沒草萊(建武中故吏范雲表請立碑事不行)

芳樂苑弔齊潘淑妃

東昏紀卽閱武堂爲芳樂苑又於苑立店肆自爲市魁命潘妃爲市令百姓歌曰閱武堂種楊柳至尊屠肉潘妃沽酒別爲潘妃起神仙永壽玉壽三殿鑿金爲蓮花以帖地令潘妃行其上曰此步步生蓮花也東昏敗妃爲梁武帝所誅按南史王茂傳曰東昏妃潘玉兒有國色武帝將留之以問茂茂曰亡齊者此物留之恐貽外議帝乃出之軍主田安啓求爲婦玉兒泣曰昔者見遇時主今豈下匹非類死而後已義不受辱及見縊絮美如生觀此則妃之容色義烈自足見重不得因東昏之故連類置貶哀簡齋詩玉兒一死千秋重洵通論也

吳苑春如夢齊宮夢裏春屨廊遺響後又見步蓮人

弓彎與新月貼地總堪憐試問朝朝樹何如步步蓮

射雉人何處蕭郎有舊家至今芳樂苑楊柳尙飛花

閱武堂前樹年年烏夜啼美人能殉國不獨數青溪

倪塘訪齊散騎常侍柳世隆墓

世隆字彥緒宋丹陽尹元景弟子仕齊至江夏內史平沈攸之之亂及湘州蠻淳官至尚書令性情廉靜惟事墳典少立功名晚專以談義自業善彈琴世稱柳公雙瑣常自云馬稍第一清談第二彈琴第三曉術數於倪塘刼墓與賓客踐履常坐一處後墓工圖墓正取其坐處焉以永明九年卒諡曰忠武倪塘在方山下

清談馬稍冠平生雙瑣彈琴第一聲盛事典墳資祕閣命題歲月在簾旌拂龜自有前知術揮塵應貽後世名大好倪塘埋骨地二龍才望總公卿

攝山棲霞寺是齊處士明僧紹故居

僧紹字休烈又字承烈平原高人孟明之後以名爲姓祖玩侍中父略給事中宋元嘉中再舉秀才有儒術永光中鎮北府辟功曹並不就隱長廣郡嶗山聚徒立學魏尅淮南乃渡江昇明中齊高帝爲太傅辟爲記室參軍不至僧紹弟慶符爲青州從至鬱洲住龔榆山棲雲精舍欣玩水石不入州城齊建元初徵爲正員郎不就慶符罷任僧紹隨歸住江乘攝山建棲霞寺居之齊高帝賜以竹根如意笥籙冠嘗至定林寺候沙門僧遠太祖欲出寺見之僧紹謂僧遠曰山數之人政當鑿坏以遁若辭不獲命便當依戴公故事耳卒不見永明中徵國子博士不就卒子元琳仲璋山賓並傳家業

棲雲精舍棲霞寺不是榆山卽攝山高臥偶邀如意賜鑿坏曾向定林還江山大好風雲近林壑無人水石閒欲訪幽居幽絕處六朝高節不勝攀

周氏草堂訪周彥倫隱處

周彥倫晉左光祿大夫七世孫解褐海陵國侍郎益州刺史蕭惠開攜之入蜀爲厲鋒將軍帶肥鄉成都二縣令仍爲府簿元徽中詔爲劾令建元初爲長沙王後軍參軍山陰令還爲文惠太子中軍錄事參軍彥倫長於佛理著三宗論於鍾山西立隱舍轉太子僕兼著作撰起居注遷中書郎得衛恆散隸書法學之甚工雖有妻子獨處山舍王儉問山中何所食答曰赤米白鹽綠葵紫蓼文惠太子問菜食何味最勝答曰春初早韭秋末晚菘問精信佛法如何允答曰三塗八難共所未免周妻何肉亦各有累轉國子博士始著四聲切韻草堂在鍾山彥倫捨宅爲寺名草堂寺鍾山舊有寺七十所至宋王安石併諸小刹於太平興國寺遺址半蕪明以其地爲孝陵父併於靈谷寺悉歸禁垣內矣孔稚圭作北山移文卽此猿驚鶴怨去冥冥留得參軍廢宅扃習靜偶從南郭遁移文應向北山聽秋松春韭全家味八難三塗一卷經我亦生平妻肉累元言來叩草堂靈

附錄

錢塘女史汪端小韞

清節蕭齊重彥倫鍾山無恙草堂春可憐後世終南路多少功名捷徑人
稚珪高致亦翩翩託諷才人仕隱間爲濟蒼生棄林壑前賢已有謝東山

東籬門園訪齊處士何點舊居

點字子皙何求弟何尚之曾孫也宋齊累徵不就門世信佛從弟遜以東籬門園居之園有卞忠貞塚點植花於冢側每飲必舉酒酌之梁武帝與點有舊及踐祚召入華林園徵爲侍中點捋帝鬚曰乃欲臣老

子辭疾不就園今無趾以家度之當與朝天宮相近耳

何處籬門有舊園冶城雲樹自成村隱君門巷忠臣墓指點斜陽酌一樽
孝隱蕭然寄法輪紛紛徵辟等浮塵捋鬚笑謝蕭郎去始信巖陵有替人

飛泉學舍又林皋南澗棲遲亦自豪我向武邱山下住每尋林壑話三高（點兄求
字子有寄住南澗寺歸隱武邱山弟胤字子季隱居泰望山山有飛泉乃啓學舍世
稱何氏三高）

檀橋訪劉瓛故宅

劉瓛字子珪沛郡相人晉丹陽尹惔六世孫年五歲聞舅孔熙先讀管甯傳曰此可及也舉秀才除奉朝
請不就袁粲薦爲祕書郎不見用拜安成王撫軍行參軍公事免瓛素無宦情自此不復仕齊高帝踐祚
召入華林園問以政道答曰政在孝經帝咨嗟曰儒者之言可寶萬世欲用爲中書郎辭不就以母老闕
養拜彭城郡丞竟陵王請爲征北司徒記室瓛與張融王思遠書不拜瓛姿狀短小儒業冠於當時當世
推爲大儒以比古之曹鄭瓛有至性母孔氏謂親戚曰阿稱便是今世曾子稱瓛小字也年四十餘未有
婚對建元中高帝與司徒褚彥回爲娶王氏穿屐挂壁上落孔氏牀上孔氏不悅瓛卽出其妻及居母憂
住墓下不出廬足爲之屈杖不能起山有鸚鵡烏瓛在山之年不敢來梁武少時嘗經服膺及天監元年
下詔爲瓛立碑謚曰貞簡先生所著文集行於世瓛住檀橋瓦屋數間上皆穿漏學徒敬慕不敢指斥呼
爲青溪焉竟陵王子良親往修謁表武帝爲瓛立館以楊烈楡故主第給之又蘆蕪澗在青龍山瓛居此

爲儒林之宗

流水青溪第幾灣蒼苔石壁面龍山當年立館知何處可在檀橋瓦屋間

靡蕪澗上靡蕪草春雨浮香澹暮煙我向海禺山下過一泓清酌柳孃泉（虞山河東君墓後有泉余名之曰靡蕪泉）

夢筆驛

江淹字文通濟陽考城人少孤貧慕司馬長卿梁伯鸞之爲人起家南徐州從事轉奉朝請從宋建平王景素在南兗州因廣陵令郭彥文得罪繫獄上書得釋景素爲荊州專據上流謀舉事淹從容進諫贈詩十五首以諷焉黜爲吳興令齊高帝輔政召爲尙書駕部郎相府建補記室參軍高帝讓九錫及諸章表皆淹製也齊受禪後爲驃騎豫章王嶷記室參軍建元置史官與檀起共掌其任又爲東武令拜中書侍郎永明三年兼尙書左丞襄陽人開古冢得竹簡古書淹以科斗字推之則周宣王之簡也少帝初兼御史中丞奏彈謝朓王績諸人內外肅然東昏末以祕書兼衛尉梁武至新林微服來奔位相國右長史天監元年爲散騎常侍左衛將軍封臨沮縣伯改封醴陵侯卒謚曰憲淹少以文章顯晚節才思微退始泊禪靈寺渚夢張景陽索還斷錦自是文章躓矣淹又嘗宿於冶亭夢郭璞索五色筆爾後爲詩絕無美句時人謂之才盡凡所著述自撰爲前後集并齊史十志並行於世嘗欲爲赤縣經以補山海之缺竟不成

夢筆驛在冶城

南朝自古多才子未必文通遜景純雜體詩成多美句筆端五色夢中春

冶城西畔雨絲絲又是江郎入夢時拚得文章才亦盡更餘殘錦付邱遲

爾雅臺高釋巖巖注成山海紀神靈夢中索筆君何早未著當時赤縣經
清平一曲至尊前醉解金貂喚謫仙夢裏筆花開一笑後來只有李青蓮

新林浦向板橋是謝朓吟詩處

謝朓字元暉左衛將軍述之孫正員郎緯之子少好學有美名文章清麗爲齊隨王子隆鎮西功曹轉文學因事求還除新安王中軍記室兼尚書殿中郎明帝輔政以爲驟騎諮議領記室掌霜府文筆轉中書郎出爲南東海太守行南徐州事啓王敬則反謀帝甚嘉焉遷尚書吏部郎上表三讓優荅不許善草穎長五言詩沈約常云二百年來無此詩也東昏失德江祚欲立始安王遙光朓自以受恩明帝不肯答爲祚所搆下獄死好獎人才自折簡寫孔顛爲孔珪讓表謂珪曰士子聲名未立應共獎成無惜牙餘論素與梁武帝以文章相得帝以第二女永世公主適朓子謨意薄謨以更適張宏子策策卒又以與王志子謹謨不堪歎恨爲書狀如詩贈主主以呈帝甚蒙矜歎而婦終不得還新林浦又選謝朓詩注引水經注曰江水經三山又幽浦出焉水上南北結浮橋渡水故曰板橋浦江又北經新林浦浦按今三山東有一小溪可通板橋鎮者當卽古板橋浦而新林浦者蓋卽今大勝關也建康志板橋在西南三十里許新林在城西南二十里所言里數正合又云新林源出牛頭山西七里今單橋水正出牛頭旁觀子山下通大關其爲新林益可信矣

天際識歸舟雲中辨江樹指點新林向板橋分明小謝題詩處旅思孤游疑是非歸
流東北幾時歸極目金陵城下路長教太白憶元暉

齊景陽樓遺址並題金雲門女史（禮贏）畫景陽樓圖

宋元嘉中興景陽山於華林園孝武大明元年紫雲出景陽樓詔改景陽爲慶雲樓齊武帝於六代之君始爲奢侈永明中宮女萬餘人帝數幸琅邪爲獵宮女常夜起嚴粧從之去端門遠者不聞鐘漏故於中園作鐘以警宮女景陽井在其下卽陳宮燕支井也華林園本京洛舊名南渡置於臺城東元嘉中更新廣之前琅邪城卽金城晉初渡江僑立琅邪郡所治亦名宣武城桓溫始爲琅邪內史居之後以謚名其城世說所載溫經金城見昔爲琅邪所禳柳卽此在上元東北金陵鄉地名金城戍宋書地志及地志引王隱晉書山謙之南徐州記皆云江乘南岸蒲州津有金城卽晉琅邪城是也後琅邪城一名白下城齊書地志琅邪本治金城永明移治白下今神策門外之石灰山當是其地輿地志云白下本江乘之白石壘齊武帝以其依帶江山移琅邪郡居之本紀永明七年駕幸琅邪城講武卽劉係宗所修之白下城故曰係宗爲國家得此一城永明旣徙郡治之後則故城廢壘狐兔居之故齊武帝得數幸琅邪城爲獵也景陽鐘其說不一定林靈谷皆稱有之竊意景陽近在臺城無因移至數十里外今神策門鼓樓崗側鐘廠旁別有大鐘二非鐘樓舊物與臺城道里較近相傳以爲景陽鐘較可信耳

昔年齊武帝重築景陽樓一誦華林賦長爲清夜游虞人宵肅駕宮女夜梳頭當日
催妝處苔花臥古邱

雲門賢內史（王仲瞿李廉繼室）解畫景陽宮院落春簾白樓臺夜燭紅圖函金匱
匪詩寫王玲瓏閒話南齊事鷗波語最工

金雲門女史畫景陽宮圖

鏡塘女史宮 筠湘王

景陽樓上催曉鐘景陽樓下春煙濃雲門仙人人工界畫妙筆寫此南齊宮宮漏沉
沉人悄悄長夜如年不知曉鳳華西殿壽昌南銅輦秋衾催起早宮鴉未動露未
消百官前殿應早朝明鏡熒熒曉粧畢彷彿雲外鐘聲飄雞鳴埭口春城影誰喚
六朝春夢醒後來狎客唱臨春還有陳宮景陽井

定林寺古鐘相傳齊景陽宮鐘也

寺在高橋門外方山按定林寺舊在鍾山日齊書祥瑞志宋乾道間因鍾山寺廢移額於此即齊武帝欲
起離宮處也方山即天印山鐘乳百八乳乳異聲齊武帝紀置鐘於景陽樓上宮人聞鐘聲早起粧飾相
傳卽此詳見景陽樓注

昭陽春色風華秋日斷琅邪翠輦游新苑舊宮盡零落更無人識景陽樓
漏遠宮門覺夜長南朝遺事話滄桑翠華未動鐘聲起多少宮人盡曉粧
記取君王舊姓蕭娥娥粉黛却灰銷樓臺煙雨蒼涼甚一杵鐘聲動六朝
夜深風定隔江圓古寺蕭條伴佛煙綠盡苔花不成字山僧猶說永明年
博士昭華各有司求衣屢問夜何其朝來偶過雞鳴埭猶說君王射雉時
殘夜嘒烏過石城秣陵花月可憐生紅樓兒女昏如夢敲盡寒宵百八聲

莫愁湖

唐書樂志曰莫愁樂者出於石城樂石城有女子名莫愁善歌謠石城樂和中後有忘愁聲因有此歌古今樂錄曰莫愁樂亦云鬱樂舊舞十六人梁八人樂府解題曰古歌亦有莫愁洛陽女與此不同樂府清商曲詞西曲歌莫愁樂云莫愁在何處莫愁石城西艇子打兩槳催送莫愁來又云聞歡下揚州相送楚江頭探手跑腰看江水斷不流今莫愁湖在水西門外相傳南齊時盧莫愁居此

樂府清商舊有名美人家在石頭城從今莫唱襄陽曲湖雨湖煙過一生
煙柳絲絲白下門湖波風澹不生鱗石城一角青山影憶煞煙波打槳人
芙蓉香澹蓼花秋彷彿嬋娟載月游兩字莫愁空記取六朝山色向人愁
澹煙疎雨似瀟湘燕子飛飛話夕陽何處紅樓遙問訊盧家少婦鬱金堂
花外紅闌一曲橫清涼山對小樓青江山功業湖山樂第一英雄是武甯
何處埋香弔綠蕪行人猶說莫愁湖秦淮河上如花女問有眉痕似爾無

擬梁武帝河中之水歌莫愁湖上詠盧莫愁事

梁武帝河中之水歌云河中之水向東流洛陽女兒名莫愁莫愁十三能織綺十四採桑南陌頭十五嫁爲盧家婦十六生兒子阿侯盧家蘭室桂爲梁中有鬱金蘇合香頭上金釵十二行足下絲履五文章珊瑚掛鏡爛生光平頭奴子擎履箱人生富貴何所望恨不早嫁東家王金陵馬十圖云莫愁舊有數說梁武此詩乃指劉宋時洛陽美女名莫愁者遠嫁江東之盧家借河水東流不返譬其獨離鄉土歌末謂雖

處富貴歡會實稀何如早嫁故鄉東家之爲得也此用其意

河中之水何泱泱河中鯉魚尺半長女兒遠嫁別鄉縣河水東流辭洛陽廬家蘭室
桂爲梁鬱金花開蘇合香石城艇子打兩槳楚山相送煙波蒼金釵挂壁鏡失光絲
履委地塵掩箱人生貧賤慕富貴富貴還復思故鄉君不見沛中漢皇歌風臺又不
見安陽魏公畫錦堂

鬱金堂題壁

在莫愁湖上華嚴菴後其上卽勝棋樓

美人何處久埋香門外青山澹夕陽草色祇今迷
蚊蜨湖波依舊俗鴛鴦真孃吳地
誰知已蘇小錢塘我故鄉一樣南齊舊時事
盧家少婦鬱金堂

汝南灣訪南齊劉瓛陸慧曉張融故居

陸慧曉與張融並宅其間有池池上有楊柳二株何點嘆曰此水便是醴泉此木便是交讓
慧曉清介方正張緒稱之曰江東裴樂也

劉氏溪邊屋張家岸上船買鄰推二族並宅有二賢楊柳名交讓清池亦醴泉江東
此裴樂慧曉更堪傳

金陵歷代名勝志卷四（又名秣陵集）

錢塘 陳文述 退庵

鐵冶溝

是梁武帝使康絢作三壩堰淮水以灌壽陽者三壩一於壽州一於荆山一於盱眙棄所聚之餘鐵於此在上元馬鞍山下南史康絢傳天監元年魏降人王足陳計求堰淮水以灌壽陽足引北方帝使陳長伯祖暄地形以沙土剽輕不可就帝弗聽假絢都督淮上諸軍事發徐揚人二十萬築之於鍾離南起浮山北抵巉石依岸築土合脊中流淮水剽疾復潰決或謂江淮多蛟決壞崖岸因是引東西二冶鐵器數千萬斤沉於堰所猶不能合乃伐樹爲榦填以巨石加土其上百里以內岡陵木石巨細皆盡夏日疾疫死者相枕冬寒甚淮泗盡凍士卒死者十七八十五年四月堰成其長九里下闊一百十丈上廣四十五丈高二十丈深十九丈五尺水之所及夾淮方數百里魏壽陽城戍稍徙頓八公山初堰起徐州界刺史張豹子謂已必司其事既而絢以他官來監作豹子譖絢與魏交通事舉徵還豹子不修堰秋淮水暴漲堰壞奔流於海殺數萬人夫淮水爲凶瀆之一神禹之所疏鑿天地所以節宣也梁武承齊之後與魏人勢均力敵既無武功以震疊之又無文德以懷柔之保境息民可也乃偏聽降人之言違諫任性妄興大役既集事矣又因譏譖不爲鉅工圖善其後使兩境之民廬舍漂沒家室流徙雖始則有袁昂之慰勞繼則有祖暄之下獄亦何益哉君子以是知梁祚之不長也

荆山爲上格浮山爲下格潼沱爲激溝并注鉅野澤督者誰康長明相者誰陳承伯

南起鍾離北巉石依岸築上中合脊生者奔潰死枕藉蛟龍風雨水漂疾填石無功
更冶鐵鑄錯不成鑄隄立四瀆節宣肯久塞青絲白馬壽陽來鐵隄未立金甌缺

郗氏窟相傳梁武帝后郗氏化蟒處

在周處臺後舊傳有迴光寺卽蕭帝寺寺內有郗氏窟又蕭帝泉在蟒蛇倉石觀音院建康志引六朝記
梁武帝后投殿庭井化毒龍帝冊爲龍天王使井上立祠自梁訖陳享祀不絕陳滅遷於京城道德寺
大業初又置於舊處按南史武德郗皇后傳后諱徽幼明慧善隸書讀史傳女工之事無不閑習武帝雍
州刺史終於襄陽官舍歸葬南徐州武進縣東山里則后不死於建康記所云可謂妄矣然本傳云后酷
妬忌及終化爲龍入於後宮通夢於帝或見形光彩照灼帝體將不安龍輒激水騰湧於露井上爲殿衣
服委積常置銀轆轤金瓶灌百味以祠之改帝不置后則祠后井上之說事誠有之今考蟒蛇倉不在梁
宮城內按梁武以三橋舊宅爲光宅寺在同夏里今周處臺下舊有光宅寺則蕭帝泉或在梁武舊居龍
天王井則仍當於梁宮求之

噩夢深宮事豈真再來證取蟒蛇身便教禮盡梁王懺難懺當年妬婦津
同夏三橋失舊居里山遺塚亦荒蕪龍天王井今何在尙有金瓶百味無

江潭苑用李賀追賦畫江潭苑韻並效其體

舊志云江潭苑在新林路西梁大同初立輿地志云武帝從新亭鑿渠通新林浦又爲池通大道一名玉
游未成而侯景亂事寢蔡宗旦金陵賦云仿江潭之大苑惟蕭溝之名存唐李賀追賦畫江潭苑詩云吳

苑曉蒼蒼宮衣水濺黃小鬟紅粉薄騎馬佩珠長路指臺城迥羅薰袴褶香行雲霏輦今日事襄王又
云寶襪菊衣單蕉花密露寒水光蘭澤葉帶重剪刀鏡角暖盤弓易鞞長上馬黼淚痕霑寢帳勻粉照金
鞍又云翦翅小鷹斜綰根玉鏃花鈿垂裝鈿粟箭服釘文牙鸞嚙深竹鳩鵲老濕沙宮官燒蠟火飛燼
汚鉛華又云十騎簇芙蓉宮衣小隊紅練香薰宋鵲尋箭蹈盧龍旗濕金鈴重露乾玉鐙空今朝畫眉早
不待景陽鐘蓋內人較蠓之所

別殿楚雲蒼鴉啼苑柳黃鐘聲宮月落騎影禁林長躡莫雕弓輭飄花翠鐙香從行
不辭遠輦路識君王

舞袖越羅單花開水殿寒碧波牽荇帶錦石綴苔錢漢苑當熊易秦城逐鹿難夜天
星靨靨燈火照歸鞍

舊夢玉鈎斜新聲玉樹花雉場圍翠黛鳳吹摩紅牙椒壁螢棲殿蒲塘雁唼沙雕文
照鬢影潭鏡湛清華

湘露濕芙蓉晨霞漾日紅蘭纓靜盧鵲桂檝避魚龍金海遺編燼青絲舊識空玉遊
殘趾在一杵動疎鐘

昭明太子讀書臺

在定林寺後北高峯上一名太子巖寺在高橋門外天印山昭明太子統字德施小字維摩武帝長子母
丁貴嬪以齊中興元年生於襄陽時徐元瑜降蕭穎胄暴卒時人謂之三慶生而聰叡三歲受孝經論語

五歲徧讀五經悉通諷誦性仁孝自出宮恆思戀不樂帝知之每五日一朝多使留永福省太子美姿容善舉止讀書數行並下過目皆憶游宴祖道屬思便成素信三寶徧覽衆經於室內別立慧義殿自立三諦法義貴嬪薨水漿不入口哭輒痛絕體素壯腰帶十圍至是減削過半引納才學之士愛賞無倦東宮有書幾三萬卷名才並集文學之盛晉宋以來未之有也性愛山水於元圃穿築更立亭館與朝士名素嗜游其中普通中大軍北侵都下米貴菲衣減食霖雨積雪遺腹心左右周行閭巷密加振賜又出主衣絹帛多作襦袴以施寒者中大通二年詔遣前交州刺史王弈發吳興信義三郡人丁開漕溝渠導洩震澤統上疏請停帝優詔諭焉三年三月游後池乘雕文舸摘芙蓉姬人蕩舟沒溺而得出癡疾四月乙巳薨年三十一諡曰昭朋葬安寧陵所著文集二十卷又撰古文典語文言爲正序十卷五言詩之善者爲英華集二十卷文選三十卷

六朝金粉繁華地一角青山定林寺廢址閒尋梁苑基殘碑猶說蕭家事蕭家梁苑事成煙永福趨朝最少年作賦陳思人似玉吹笙子晉貌如仙宮內藏書三萬卷風流不數金華殿招隱能諧山水音愛才徧訪東南彥一卷東宮張鏡儀有時劇韻亦吟詩澄江映月清如水曾照維摩夜讀時錦帶書成拾芳葢跌宕風騷競文采異代新書序玉臺乃公餘力編金海慧義譚經甘露濃天花寶雨頌深宮當年若闡重雲義定有高文冠普通彫舫芙蓉蕩碧波王筠哀册愁何修羅合避臺城劫不爲陵園瘞螭鵝一時文藻流芳譽集纂英華盛詞賦文選樓頭著錄時金蘭橋上同行處

九華山翠映徘徊秋水琴河一道回都是生平憑弔處千秋一望讀書臺（文選樓在揚州金蘭橋在泰州乃昭明與邵陵王別處池州及虞山皆有昭明讀書臺並余游跡所及）

梁金華宮

在青溪東去臺城三里昭明太子蔡妃別居於此南史昭明傳云蔡妃供侍一同常儀惟別立金華宮爲異是也宋府治有金華石相傳爲金華宮中物北宋府治卽南唐宮城南宋高宗駐蹕以府治爲行宮徙府治於東錦繡坊卽今舊內則金華宮不越此二處矣

山水清音奏此中蕭家元圃碧池通芙蓉雕舸諸姬在何事金華更立宮

燕雀湖

在城東二里昭明太子葬安寧陵在城東北四十五里元帝時爲杜前所發或發後改葬於此相傳改葬時闍人竊其琉璃盃紫玉杯有燕雀數萬擊之封墳之際燕雀啣土以增其上墳側有湖後人因以燕雀之名又名前湖明初因築城填爲大內當我今駐防城內也

後池亭館草闌珊遺塚安寧不可攀莫爲滄桑起惆悵茂陵金盃出人間
南山石槨事全非陰火魚鐙隧道微何處橫風翔燕雀金鳧銀雁滿天飛
一角臺城隔暮雲前湖流水碧云修陵武帝陵名今亦同疑塚何處南朝帝子墳
金陵王氣規模改絕塹橫堙飛雉過莫愁湖波換平陸六朝碑石盡消磨

山邱華屋晚啼鴉小粉場西問舊家夢裏六朝人似玉繡衣香滿白梅花（錢塘汪氏掘地得梁天監年甄先一日夢美少年自云梁武帝第四子南康王蕭績也乞保遺塚乃掩之小粉場汪氏所居）

鳳云秦臺往事空更無遺事說湘東妙嚴公主墳猶在曾踏殘香弔嬪宮（妙嚴公主武帝女墓在吳門閭邱坊巷今爲錢氏息園有妙嚴臺遺址）

永慶寺是梁永寺公主舊宅

在城內北門橋鐵塔寺後梁天監中永慶公主香火因名寺有塔又名白塔寺明洪武間重修賜今名寺左數十武卽謝公墩今有僧寺額曰地因樓勝俗稱地樓疑卽是也

西竺金仙宅南朝玉女家宮鬢消寶鏡舞袖失天花秦苑無翔鳳臺城有暮鴉幾番憑弔處惆悵晚天霞（合肥定林寺吳門妙嚴臺皆有梁公主墓瓜步有蕭梁公主詞並余所經）

隨鹿谷是阮孝緒母病求葠處

阮孝緒字士宗陳留尉氏人幼至孝性沉靜屏居一室非定省未嘗出戶裴子野荐之徐勉言其年十餘歲論其志行粗類管幼安章采似皇甫謐天監中傅照上疎薦之徵不至答袁竣曰昔周德維雖與夷齊不厭薇蕨漢道方盛黃綺無悶山林爲仁由已何關人世筮卦得肥遯乃著高隱傳湘東王著忠臣傳丹

陽尹錄研神記並先簡孝緒而後施行外兄王晏貴孝緒度其敗必聞其笱管穿籬逃匿鄱陽王妃孝緒姊也王常命駕欲就之遊孝緒鑿垣而逃任昉尋其兄履之欲造而不敢望而歎曰其室雖邇其人甚遠殷芸欲贈以詩昉曰趣舍既何必相干乃止大同二年正月孝緒自筮卦曰吾壽與劉著作同年及劉沓卒孝緒曰劉侯逝矣吾其幾何其年十月卒年五十八門徒追論德行諡曰貞文先生所著七錄削繁等一百八十一卷行於世嘗於鍾山聽講母王氏有疾兄弟欲召之母曰孝緒至性寔通必當自到果心驚而反合藥須得生人侵舊傳鍾山所出孝緒躬歷幽險忽逢一鹿感而隨後果獲此草母疾遂愈皆其孝感所致

章采皇甫謐志行管幼安皎皎阮士宗七錄能削繁手著高隱傳三品貞盤桓鑿垣與穿籬遜世學段干鹿牀一精舍彷彿瀛海寬植品既以高篤行尤不刊嚙指感母采采藥青山端三極產何地鍾阜如龍蟠白鹿導引之靈根愈沉痾純孝與高節伊古人所難六代罽麈網逸翮鷺鴻鸞揮手驂麇懷古生長歎

梁隱士貞白先生陶隱居故里

陶弘景字通明丹陽秣陵人十歲讀葛洪神仙傳有養生之志讀書萬餘卷一事不知以爲深恥齊高帝作相引爲諸王侍讀永明十年脫朝服挂神武門止於句容之句曲山云此山下是第八洞宮名金陵華陽之天乃中山立館自號華陽陶隱居人間書札卽以隱居代名永元初更築三層樓自處其上弟子居其中賓客至其下與遂物絕本便馬善射晚皆不爲惟聽吹笙而已特愛松風庭院皆植松每聞其響欣然自樂惜景光老而彌篤尤明陰陽五行風角星算山川地理方圓物產醫術本草帝代年曆慕張良之

爲人梁武早與之游卽位後恩禮愈篤國家每有吉凶征討大事無不諮詢時人以爲山中宰相屢加禮聘並不出帷畫作兩牛一放水草之間一着金龍頭有人執繩以杖驅之帝曰此人欲效曳尾之龜豈有可致之理仙書云方眼者壽千歲弘景末年一眼有時而方大同二年卒年八十五詔贈大中大夫諡曰貞白先生所著學苑孝經論語集注帝代年歷本草集注效驗方肘後百一方古今州郡記圖象集要及玉匱記七曜新舊術疏占候合丹法式共祕密不傳及撰而未訖又十部惟弟子得之故里在石城鳴今其地名陶家渚墓在句容雷平山

山中宰相世間名作到神仙事亦平滿院松風人不到三層閣上聽吹笙
仙相方瞳入道年獻丹進讖亦因緣隱居別有樓元處句曲華陽第八天
入夢香爐事有無慕仙慕佛豈全虛一編學苑分明在何事仙人亦著書
金澗東頭石氣青臨池妙墨仿黃庭橫江欲訪焦仙閣親拓當年瘞鶴銘

辟支洞

在仙窟卽牛頭山也相傳辟支佛出處梁武帝於此建仙窟寺

蕭梁奉佛法示見證亦頗雨花雲光奇獻泉曇隱歌達摩去太愬寶誌讖何瓊茲山
去辟支石鉢此安坐仙窟有遺寺當時盛香火可憐同秦贖不救臺城禍依舊青山
高雙闕森礫砢我家錢塘西地稱七佛影鐘梵響雲山琳宇高駮娑欲參第一義見
佛卽見我我學大乘禪不墮聲聞果

達摩洞

在幕府山側西北有夾蘿峯卽折蘆渡江處按菩提達摩南天竺人普通七年自西域達南海廣州武帝遣使迎赴京師車駕爲之出郊延居別殿問曰朕卽位以來寫經度僧不可勝紀有何功德答曰此人天小果有漏之因如影隨形雖有非實帝不領悟達摩知機不契折蘆渡江嵩山少林是其九年面壁處也

寫經造寺知何益小果人天有漏因從此折蘆渡江去西歸隻履更何人
衣鉢當時孰解傳西來大意闡人天知君北去嵩山寺面壁空山更十年

雨花臺

在南門外梅岡上高座寺晉永嘉中名甘露寺西竺僧尸黎密來中國爲王導所敬因號所居爲高座旣卒於冢側立剎謝鯤仍名爲高座寺梁時寶誌主其寺有雲光法師坐山巔說法感天雨寶花唐盧襄名之曰雨花臺有誌公手植松中孚塔甘露井又梁武帝同夏里三橋舊宅舍爲寺名光宅雲光禪師講法華經於此有天花如雨沈約簡文帝皆有碑銘及詩宋治平間移建牛首山東北賜古光宅寺額明洪武間重修賜額慧光寺則雲光之講經雨花非一處矣

示疾曾聞散花室談經復有雨花臺法從七寶座間說香自九重天上來慧業因緣
三竺問禪機微妙六朝開淨居不救臺城禍白馬青絲枉自哀

靈谷寺弔梁高僧寶誌

寺本在城東北鍾山左獨龍岡梁天監中爲誌公建於鍾山玩珠峯前前名開善精舍後爲開善寺宋改名太平興國寺後名蔣山寺明太祖以寺基爲孝陵敕改寺於東五里賜額靈谷寺有大靈谷寺記寺內有誌公塔景陽鐘元時所鑄也三絕碑卽誌公象吳道子畫李太白贊顏真卿書也八功德水梁僧曇隱禮懺所得明初寺遷泉亦隨徙也及琵琶街梅花隴 國朝屢修寺尙完好按鍾山舊有寺七十所齊梁以降遞有廢興至宋王安石併諸刹於太平興國寺而紺宇金界半爲邱墟明以其地爲孝陵乃悉歸併靈谷寺昔之棋布星列者均在禁垣內矣其名之見於史傳志乘者曰飛流寺見梁元帝碑銘曰開善寺曰法雲寺見南史張諒傳曰延賢寺杯渡和尚所住見高僧傳曰靈味寺釋寶亮住見南史寶誌傳曰興皇寺陳釋法朗住見孫瑒傳曰竹林寺見宋武帝紀曰大愛敬寺見梁武帝紀曰雲居寺庾信有詩曰明慶寺姚察王褒江總有詩曰道林寺陳建徐伯暘有詩曰定林寺見劉勰明僧紹等傳曰鍾山寺曰草堂寺周彥倫捨宅建曰幽棲寺曰淨名寺曰悟真院八功德水舊在其後曰定巖寺曰翠微寺曰興教寺曰宋熙寺見南史劉盱傳曰白蓮庵曰裁松峴卽晉時刺史罷還令裁松處曰崇禧萬壽寺元時爲誌公建於寺鑄大鐘者也南史隱逸傳寶誌不知何許人有人於太始中見之齊宋之交稱顯靈跡齊武帝忿其惑衆收付建康獄以呂文顯言乃迎入華林園梁武帝尤深敬事雖剃鬚髮而常冠下裙帽衲袍故俗呼爲誌公好爲識記所謂誌公符也天監十二年卒勅王筠爲碑

萬松深谷暮雲停符讖當年信可徵史傳有人書隱士名山何幸葬高僧衲袍布繳
留遺像虎踞龍蟠讓孝陵三百賜莊今在否六朝如夢澹秋鐙

八功德水

在靈谷寺梁天監中僧曇隱卓錫山龍獻之明初遷寺東麓水亦隨往

曇隱當年卓錫時八功德在一清池果然佛法難思議峯解飛來水解移
中年我亦耽禪悅借取軍持半勺嘗不羨華池八功德祇求塵海亦清涼

說法臺

在鍾山孝陵衛東北梁寶誌說法處

生公遺跡在姑蘇海湧峯前夜月孤此地誌公會說法不知頑石點頭無

迴光寺即梁武帝蕭寺遺址

在城南隅周處臺前梁武帝命蕭子雲飛白大書蕭字唐李約購取建蕭齋後人妄以皇族目之即此類也南唐名法光寺宋曰鹿苑寺明永樂間有迴光大士自西域至居此改賜今額唐劉長卿將赴嶺外留題蕭寺自注寺即梁朝蕭內史創蕭子雲爲臨川內史然則寺即子雲所建或即其舊宅歟

同泰光嚴久寂寥六朝歷盡又南朝子雲飛白歸何處猶說君王舊姓蕭

臺城西訪華林園遺址書庾蘭成三月三日馬射賦後

六朝時華林園凡三處在洛陽者裴松之魏志注及魏略云本東漢芳林園魏明帝於中起陂池及土山後以避齊王芳諱改爲華林北魏孝文帝遷洛又葺之其後爲講武聽訟宴餞臣僚之所在鄴都者晉載記石虎使鄴郡男女十六萬人築華林園於鄴北蓋仿洛陽爲之後東魏遷鄴仍以爲游幸之所在建業者本吳西苑舊址在臺城內晉南渡後仿洛陽園名葺之宋文帝於園內築景陽山梁武帝於此總集釋

典簡文帝游華林謂左右曰會心處不在遠翳然林木便自有濠濮間想卽此信馬射賦乃入北周所作北周都關中無華林或至鄴中作也

一樣青宮擅逸才華林深處水雲開游蹤我亦親魚鳥閒話蕭梁帝子來
六朝遺事散啼鴉林木依然入暮霞會得莊生濠濮意一編祇合誦南華
長楸馳道曉鶯聲雲樹蒼茫繞禁城解誦落花芝蓋句當年誰似庾蘭成
庾信文章最可憐六朝南北總雲烟哀江南賦同悽絕回首華林馬射年

徐勉宅

勉字修仁東海剡人幼孤貧早勵清節仕齊至領軍長史梁武至建業謁於新林游至尚書僕射中衛將軍受詔知撰五禮不營產業俸祿分贍親族之貧乏者答人曰人遺子孫以財我貽以清自爲書戒子曰聊於東田開營小園此逆旅爾常恨人謂是我宅普通末武帝賜後宮吳聲西女各一卽大通中特授光祿大夫卒諡簡肅子排晉安內史

穿池種樹寄情賞聚石移花託性靈誰作東田小園賦清明門外蔣山青
謝公絲竹桓歌舞前輩風流尙可尋西曲吳聲並華妙不教山水擅清音
石渠舊簡失江東荀摯遺文劫火空曾與諸生習繇叢漢家自有叔孫通
彷彿襟懷比二疏高門貧素得安居傳家清白名言在留得南朝誠子書

伏挺泉

挺字士操平昌安邱人梁臨海太守曼容之孫豫章內史嘔之子幼即敏悟爲詩效謝康樂體父友任昉歎曰此子日下無雙齊末舉秀才策爲當時第一梁武帝至迎謁新林帝謂之顏子引爲征東行參軍居宅在潮溝於宅講論語聽者傾朝三世同時聚徒教授罕有其比除南臺書侍御史因事納賄被劾懼罪乃變服出家名僧挺邵陵王爲江州攝挺之鎮不堪蔬素因此還俗侯景亂中卒今城北小桃園有伏挺泉當是其遺宅也

三世傳家學當時第一流酒壚藏夏馥僧寺識湯休品藻任公重詩篇謝客適清泉 渺何處遺宅問潮溝

皂莢橋是曹景宗屯兵處

梁武帝紀大軍次新林建康土庶傾都而至命王茂進據新城曹景宗據皂莢橋本傳景宗字子震父欣之宋徐州刺史景宗以膽勇聞頗愛史書讀穰苴樂毅傳慕其爲人仕齊以軍功累加遊擊將軍梁武爲雍州刺史景宗深自結納梁臺之建景宗之力爲多破魏中山王英於劬陽洲走楊大眼於瀘水游至侍中領軍將軍嘗於華光殿侍宴賦詩乞韻僅餘競病二字其辭曰去時兒女悲歸來笳鼓競借問行路人何如霍去病朝賢驚嗟嘗自言曰昔在鄉里騎快馬如龍與年少輩數十騎拓弓弦作霹靂聲箭如餓鷄叫平澤中逐麋數肋射之渴飲其血飢食其胃甜如甘蔗漿覺耳後生風鼻端出火此樂使人忘死今來揚州作貴人閉置車中如三日新婦邑邑使人氣盡後爲江州刺史卒於道贈雍州刺史開封儀同三司諡曰壯

鼻端出火耳生風曾建梁臺第一功居士壘邊諸將合道人洲上一軍雄風雷氣動
神能助競病詩成韻最工回首行春橋畔路青山無恙夕陽中

沈約郊園

在鍾山下謝朓有和沈祭酒行園詩約立宅東田瞻望郊阜嘗爲郊居賦以序其事本傳約字休文武康
人工於文筆撰四聲譜齊時爲竟陵王客洛官東陽太守明帝時徵爲五兵尙書遷國子祭酒永元中復
爲司徒左長史進號征虜將軍南清河太守佐梁武帝受齊禪並勸害和帝洛至尙書令領太子少傅轉
左光祿大夫尋加特進遷中軍將軍丹陽尹侍中卒諡曰隱初諡曰文武帝曰懷愴不盡曰隱故改爲隱
則當日已有定論矣

太息南朝沈隱侯郊居曾此息林陬四聲辨韻新留譜八詠登高舊起樓大好江山
石城路無邊雲樹秣陵秋不堪更問齊梁事淮水東南日夜流

梁豫州刺史裴邃墓

邃字深明魏冀州刺史徽之後南歸以戰功洛至豫州刺史督征討諸軍略地汝潁走河間王元琛於壽
陽卒於軍墓在光宅寺西松柏鬱茂范雲墓在三橋蓬蒿不翦梁武帝祀南郊經二墓歎曰范爲已死裴
爲更生

北伐威名冠衆軍淮淝志欲立奇勳墓門松柏參天色何處蓬蒿作范雲

三橋弔范雲墓

雲字彥龍南鄉舞陰人六歲讀毛詩日誦九紙起家郢州西曹書佐齊建元初爲竟陵王府主簿從登秦望山誦秦始皇石刻以爲上賓久爲府僚甚見恩遇遷零陵太守百姓悅之又爲始興內史有善政爲帝所賞遷廣州刺史平越中郎將遣使祭孝子南海羅威唐頤蒼梧丁密頓琦等墓初梁武與雲俱在竟陵王西邸情好歡甚梁武卜居東郊雲亦築室相依盡心推事梁武至石頭雲與沈約同心翌贊超居佐命雲本大武帝十三歲少申四海之敬梁武勅臨川王範鄱陽王恢代呼爲兄洊遷尙書右僕射卒諡曰文有集二十卷子孝才嗣南史裴之禮傳裴遠廟在光宅寺西堂宇弘敞松柏鬱茂范雲廟在三橋蓬蒿不翦梁武帝南郊道經二廟顧而嘆曰范爲已死裴爲更生三橋梁武舊宅所在通鑑注梁武以三橋舊宅爲光宅寺在同夏里建康實錄云梁武生於同夏里大同三年置縣因城焉王荊公詩今知光宅寺牛首正當門又云翛然光宅淮之陰則同夏城當在淮水之南或云今周處臺下舊有光宅寺乃梁武舊居六朝士大夫家多居此又名南岡梁武評書南岡士大夫徒尙風軌沈慶之詩徒步歸南岡卽此今名花蓋岡舊志云范雲宅在城東南七里臨秦淮何遜有詩

沈詩任筆外八友爾尤親齊邸論文客梁臺佐命人推恩頻話舊佐命樂維新當日
三橋路蓬蒿已不春

青塘弔梁散騎常侍贈護軍將軍韋忠貞公(粲)

南史韋粲傳粲字長倩京兆杜陵人祖叡父放皆有傳粲以右衛率領直出爲衡州刺史召爲散騎常侍侯景作逆陪道赴援豫章內史劉孝儀以無勅爲疑爲粲置酒粲怒以杯抵地曰賊已渡江便逼宮闕水陸阻斷何由有報假令無勅豈得自安韋粲今日何情飲酒卽馳馬出部分偕諸軍至都屯於張公洲說

豫州刺史裴之高推司州刺史柳仲禮爲大都督進軍新亭仲禮令絜頓青塘當石頭中路昏霧失道比及青塘夜已過半壘柵至曉未合景登禪靈寺門望絜營未立便率銳卒來攻左右高馮牽絜避賊絜不動兵死略盡遂見絜絜子尼及三弟助警構從弟昂皆戰死親戚死者數百人詔贈護軍將軍元帝平侯景追諡忠貞按禪靈寺在今陡門橋西北禪靈寺橋景定志云對禪靈渚卽今陡門橋則青塘當近今水西門也又陳後主紀羣鼠無數自蔡州岸入石頭渡淮至於青塘兩岸又絜傳曰青塘立柵追近淮渚蔡州岸石頭西岸也青塘兩岸或卽青溪之塘耶

溫嶠勤王日桓彝赴難晨一門同殉國百戰竟亡身淮渚波終古新亭草不春青塘遺壘在弔古更無人

望國門是梁冠軍將軍羊侃屯兵處

侯景犯關令侃屯望國門侃行至新林追侃入則望國門當在新林之南也侃字祖忻泰山梁父人仕魏征東大將軍東道行臺領泰山太守進爵鉅平侯初其父祉使侃南歸乃濟河以成先志以大通三年至建業授徐州刺史洊至侍中會大舉北侵以侃爲冠軍將軍侯景反攻歷陽乃令侃屯望國門復追入副宣城王郁督城內諸軍事也侯景攻臺城侃多方應之尋以疾卒贈侍中護軍將軍侃少雄勇嘗於兗州堯廟踴壁直上五尋橫行七跡又於樂游苑試新造刀稍特盡其妙又卽席應詔答武宴詩三十韻性豪侈善音律自造采蓮棹歌兩曲姬妾列侍有彈箏人陸大喜儂人張淨琬孫荆玉敕齊歌人王娥兒屈偶之並一時無對常於兩艇騰起通梁水齋乘潮解纜臨波置酒綠塘傍水觀者填咽侃以北人歸南略似侯景而忠邪判然侃不死臺城或不破也

踢壁聲名話泗橋
艤錦纜解乘潮
美人歌舞嬌南國
壯士弓刀謝北朝
免胄威名人盡懾
築圍軍壘敵空驍
將軍一死臺城破
極目新林舊路遙

臺城行弔梁武帝

在上元縣治西北本吳秣陵晉建業故城阨晉元帝渡江因修居之世說載王導營建康或於舊城稍加增廣魏晉謂天子所居禁省爲臺故遂名爲臺城當時草創不備郛城之制所立門闕用西京宮掖之舊名遠指牛首不立雙闕其意猶以臺城之居爲暫託也及謝太傅於孝武時改建宮室制度明備宋齊以後遂爲都城晉成帝時蘇峻之亂宮闕灰燼咸和五年始繕苑城作新宮一曰建康宮卽吳太初宮址孝武太元三年因敵壞更作梁承宋齊之舊宮殿皆在臺城以形勢度之臺城當北倚山崗崗外爲苑苑外爲湖今北極開鷄鳴寺正其北城所屆故雞鳴寺東猶存一段古城城下有門俗曰臺城門意此卽古北掖門矣宮城西北爲華林園園中有景陽山其前有宣陽門朱雀門門向朱雀航二門皆有樓蓋在當路而非城門也臺城右爲石頭城亦稱西州其左東府城兩城墟地皆不多故世說載會稽王繞東府行散也兩城皆前臨淮而淮又曲繞石頭西入江六朝凡兵自南來者先取石頭東府自歷陽來者直先取臺城矣侯景字萬景魏懷朔鎮人學兵法於慕容紹宗與高歡甚相友好仕魏爲河南大行臺位司徒歡使擁兵十萬專制河南杖任若己之半體歡疾篤世子澄矯詔召之景懼用王偉計使丁和上表求降帝召羣臣議謝舉等皆言納景非便帝不從納之封景河南王大將軍使持節督河南北諸軍事大行臺承制如鄧禹故事高澄以書喻景許以豫州刺史終其身并還寵妻愛子景不從請於帝大舉兵伐魏以貞陽侯蕭明爲都督明軍敗見俘魏使慕容超宗追景戰於湍陽爲景所敗又敗斛律光景士卒並北人不樂

南渡其將暴顯等各帥所部降超宗景軍潰入壽陽以敗聞自求貶削授南豫州刺史本官如故魏人求和景僞作鄴中人書求以貞陽侯換景帝許之又請娶於王謝勿許遂萌反志多所徵求鄴陽王休範司州刺史羊鴉仁累啓稱景有異志朱異抑不以聞景知臨賀王正德怨望結爲內應遂殺兵反以誅朱異徐麟諸人爲辭襲譙州進攻歷陽正德遣船迎之自采石濟江都下勿之覺遂至朱雀航乘勝至闕下立正德爲帝陷東府城敗韋粲於青塘攻圍臺城久不拔及糧不繼乃僞乞降旣運東城米於石頭乃乞廣陵譙州百道攻城邵陵王世子子堅於城西北樓納賊景旣破臺城乃入見帝自爲大都督錄尙事裁抑御膳帝以餒終于文德殿景後爲王僧辨所滅事詳南史

鷄籠山畔雉堞平南朝遺事悲臺城蕭家老公作事好梁臺初建稱豪英八要六貴盡伏法扶南婆利皆來庭無碍會設同泰寺重雲殿上譚金經羣臣輸錢逾萬億七廟時饗無犧牲戊夜燃燭撰通史類略賅博金海精諸臣奉表質疑問士林立館博士榮山家小兒掘尾狗疎眉秀目一足鬻專制河南杖半體矯詔懼禍期偷生丁和奉表乞內附謝舉發難勞廷爭青絲白馬壽陽至有衆十萬驕韓彭南土擅命立正德北朝樹黨歸元貞芙蓉樓高土山峻僧騰有客排烏筮輪攻墨守數羊侃雉尾炬熱樓車甸金花燭冷蓮唱斷將星夜落長城傾仲禮力戰韋粲死青塘南苑紛援兵御廚乾苔殿堂鷓並充軍食如侯鯖飛輪無轍有詩讖鄱陽諸將空支撐北軍久集江潭苑南軍空屯朱雀桁乘隙已運石頭米暴過竟違城下盟宋疑獻計決湖灌雲

朗納賊開門迎獼猴竟協御座夢鳥雀久爲童謠偵酣酣縱火已示兆荷荷索密誰
聞聲將軍乃有宇宙號左右均以廂公名百濟國史弔喪亂溧陽公主悲嬌寧苕花
芟實盡凋罄文宣廟柏猶重青湘東東下恨太晚空使蕭賁悲西傾沈船臥鼓者誰
子法生僧達應連營白茆洲上誓師處朱航助順昭神靈雙龍夾艦風浪順羣魚導
引旌旗明前何猖獗後何弱皮囊馬上二子盛白馬載拜不肯起滬瀆竄匿如鼯鼯
羊鯤戮送稍快意苦竹井水資燔烹王瑋彭儁盡誅殛山河重秀天地清所惜練兒
好身手暮氣惑溺空崢嶸飾文黯武等盪屋求仙佞佛皆孽育六朝結局各有故干
秋金鑑知誰瑩宮闕荒廢遺址在石獸何處埋荒陵青山如夢啼鳥歇一篇賦罷臺
城行

梁武帝陵

梁武帝姓蕭氏諱衍字叔達小字練兒南蘭陵中都里人與齊同承淮陰令整考諱順之於齊高帝爲始
族弟佐齊高帝代宋封臨湘縣侯帝以宋孝武大明元年甲辰生於秣陵縣同夏里三橋宅日角龍顏狀
貌殊特有文仕手曰武及長博通多學有文武才幹初爲王儉東閣祭酒與沈約等遊竟陵王西邸號曰
八友齊明帝起鎮壽陽隆昌元年拜中書侍郎從王廣之破魏劉昶王肅尋爲司州刺史齊明帝崩遺詔
以爲雍州刺史東昏無道起兵滅之立和帝旨德皇后令以帝爲中書監大司馬錄尚書驃騎大將軍都

督揚州刺史封建安郡公進位相國總百揆封十郡爲梁公備九錫之禮進爵爲王遂受齊禪以和帝爲巴陵王從沈約言請鄭伯金害之在位四十餘年爲侯景所逼所求不供崩於臺城淨居殿時年八十六葬於修陵帝酷信佛法創造諸寺屢至同泰寺捨身羣臣斂錢贖歸宗廟祭祀至不血食末年流遁益甚境內化之遂至喪亡撰通史六百卷金海三十卷其他著述並詳本紀史臣謂自己而得自己而失未之有焉史言葬修陵不詳其處今太平門外有石辟邪土人云武帝陵上物陵相傳在攝山據郗皇后傳則陵又當在武進城東里山也

早年八友數雄才暮齒如君亦可哀玉輦屢求同泰去青絲終見壽陽來英雄成敗關天數書籍銷沉有劫灰老向空山留片石夜深翁仲話梁臺

梁驃騎大將軍中書監王僧辨墓

僧辨字君才右衛將軍神念次子神念太原郿人仕魏至潁川太守與僧辨據郡歸梁僧辨學涉該博射不穿札而有凌雲之氣元帝除荊州代柳仲禮爲竟陵太守侯景陷臺城爲領軍將軍破景軍於郢城加征東大將軍與陳霸先盟於白茆洲破景於石頭城景既平授鎮衛將軍司徒餘如故元帝崩與霸先同立敬帝又納貞陽侯明以爲梁嗣僧辨居石頭城霸先時爲南徐州刺史舉兵襲之與子顛等並爲所殺同葬一穴宣帝時故吏許亨抗表請以家財造墓葬之墓在方山初僧辨平建業遺霸先守京口推以赤心結廉藺之分且爲第三子顧婁霸先女霸先蓄志圖之僧辨不知爲其所害僧辨不亡陳氏未必代梁也惟國已有主而外求君則南史所謂斯人而有斯謬也歟

百戰平侯景蕭家此大勳如何國有主而更外求君廉藺交方合陳張勢忽分石頭

城下水鳴咽不堪聞

烈山弔梁湘州刺史王琳戰場

南史王琳傳琳字子珩會稽山陰人從王僧辨破侯景功第一歷官湘州刺史魏平江陵乃爲元帝舉哀上游諸將推琳主盟迎永嘉王莊於湘中出質於齊請納莊爲梁王奉莊纂梁祚於郢州敗吳明徹於江中因東下爲侯瑱等所敗茲山其戰地也尋與莊同入齊會明徹寇齊琳軍敗至壽陽爲明徹所圍無援城破被執見殺故吏朱場致書徐陵求其首瘞八公山側茅智勝等密送喪柩達於建鄴齊封琳驃騎大將軍進巴陵郡王不書琳志在梁也烈山在慈老浦東下爲烈山港亦作溧洲桓溫傳作烈洲

結客田橫盛從軍李廣賢乞師忠感楚報國義酬燕萬里馳驅日二軍縞素年江山遺壘在何處問樓船

陳武帝萬安陵

帝姓陳氏諱霸先字興國小字法生陵在城東三十五里舊名陵里又曰天子林石獸尙存今呼石馬冲按南史王僧辨與帝同平侯景奉方智爲梁王末正帝號齊人納蕭明帝與僧辨同在建業不聞併力拒齊及僧辨立明乃襲僧辨殺之廢明立方智不數年受方智禪廢爲江陰王致死別邸則兩人曲直可知矣陵爲僧辨子頒所發今僅餘石馬耳

當年僧辨平侯景太室銘功定不祧立長有心圖却敵背盟何意出同僚未容方智生南國終遺蕭莊死北朝（帝旣代梁王琳奉蕭莊入齊齊人將納之琳死齊亦亡

莊飲氣死）無復萬安陵寢在空餘石馬勢騰驤

大壯觀是陳宣帝講武處

在上元太平門外下臨後湖卽今湖北三塔寺所據之山寺爲宋建明永樂中爲雞鳴寺塔院有寒光亭南史陳宣帝紀大建十年帝幸大壯觀閱武又南康愍王子方泰傳大建十一年八月高宗幸大壯觀因大閱武命都督任忠領步騎十萬陣於真武湖都督陳景領樓艦五百出於瓜步江高宗登元武門親宴羣臣以觀因幸樂游苑設絲竹之會仍幸大壯觀集衆軍振旅而還按瓜步在六合東南二十里地屬江北觀此可爲湖水通江之證

五百樓船十萬兵登高閱武陣雲生定知戰艦橫反步應有軍牙擁石城湖上秋空
絲竹會江頭潮湧鼓鞞聲如何石子崗前路翻遣蠻奴馬首迎

書徐孝穆玉臺新詠序後

大唐新詠謂梁文帝好作豔詩江左化之謂之宮體晚年改之追之不及乃令徐陵撰玉臺集以大肆曩在京師與楊綦裳論玉臺新詠綦裳云就孝穆序文證之當時宮中能文妃嬪所錄同人服其持論之聰雋按六朝宮人本有女學士如齊之韓蘭英陳之袁大捨簪筆之暇編輯成書理或然也

不識何年事含毫詠玉臺分明金殿側彷彿麗人來鳳髻傾城豔蛾眉絕世才祇應
徐孝穆一序寫徘徊

亦有金箱說蓉湖識麗華班曹新著作盧駱舊名家弄墨銷香蠹然脂彈髻鴉當年

效隍弘評泊六朝花（梁溪女士楊蕊淵仿玉臺新詠撰金箱薈說余爲製序）

珍珠河是陳後主宮人雨中泛舟處

珍珠河宮中河也雨中宮人泛舟見浮漚呼曰滿河珍珠因名河卽孫吳所開潮溝詳見圖經辨證今自太平門北水關入城經土橋珍珠橋至浮橋合於楊吳城濠之水西轉至竹橋青溪之水入焉又西過復成橋明御河之水入焉又西過大中橋至東水關與淮水合作建康志者分爲二水誤也自楊吳及明初築城此水之西流者盡斷而自北水關至浮橋其故道居然可見第水涸竭耳

三閣蕭條六代荒一河流水尙斜陽影娥遺事分明記花落蘭舟夢雨涼
璧月瓊枝事有無青頭鷄散冷煙蕪祇今春雨闌珊夜猶唱新聲一斛珠
十斛明珠散不收一江春水向東流我來繫棹唵羅襪又是瀟瀟暮雨秋

玉樹後庭花曲詠張貴妃擬江總持

南史張貴妃傳陳至德二年起臨春結綺望仙三閣後主自居臨春閣張貴妃居結綺閣龔孔二貴嬪居望仙閣並複道交相往來又有王李二美人張薛二淑媛袁昭儀何婕妤江修容等七人並有寵遞代以游其上以宮人有文學者袁大捨等爲女學士後主每引賓客對貴妃等游宴使諸貴人及女學士與狎客共賦新詩采其尤豔麗者以爲曲調選宮女有容色者以千百數令習而歌之其曲有玉樹後庭花臨春樂等其略云璧月夜夜滿瓊綺朝朝新皆美張貴妃孔貴嬪之容色隋書樂志曰陳後主於清樂中造黃驪留及玉樹後庭花金釵兩鬢垂等曲與幸臣等製其歌詞綺豔相高極於輕蕩男女唱和其音甚哀

五行志曰：顧明初後主作新歌辭甚哀怨，令後宮美人習而歌之。其辭曰：玉樹後庭花，花開不復久。時人以爲歌讖，此其不久兆也。樂府清商曲辭吳聲歌後主自作玉樹後庭花曲曰：麗宇芳林對高閣，新妝豔質本傾城。映戶疑嬌乍不進，出帷含態笑相迎。妖姬臉似花含露，玉樹流光照後庭。其璧月夜夜滿等語，按大業拾遺記：蓋江總持辭也。女學士袁大捨獻春樂詞以諷之，又張貴妃別居桂宮宮中呼張嬪娥。按貴妃寵冠後宮，狎客以江總持爲首，必多殊豔之作，惜其不傳，戲爲補之。

玉樹後庭花
嬪娟張麗華
鏡容眉黛釵影鬢垂鴉
宮女珠河淺
嫦娥璧月遮
從來桂宮曲多在帝王家

璧月瓊枝詠孔貴嬪擬孔範

孔範字法言，山陰人。仕陳爲都官尚書，與江總等並爲狎客。時孔貴嬪絕愛幸，範與結爲兄妹，則玉樹新聲之外，必有專美貴嬪者，因並擬作。

璧月爲明鏡，瓊枝是玉人。
君恩三閣近，豔體六朝新。
宮內誰名士，臣家此貴嬪。
望仙通複道，長得奉臨春。

女學士弔袁大捨

宮井之人當不止一人，其從後主同乘上者，張孔耳宮車北行不復見學士，或已化井底香塵矣。吾更惜王李張薛諸人也。

宮中女學士文采久推袁前殿月輪滿後庭花影繁高臺誰解讖胥井定承恩太息
青溪事含悲不忍言

臨春閣輒視歌

薄游金陵於臺城遺址拾得斷輒文曰至德考南史陳後主至德二年建臨春結綺望仙三閣則此輒殆
三閣故物也曰臨春者以後主所居統於尊也琢以爲硯即以草停雲水榭秣陵集

璧月光寒瓊樹落一輒猶賸臨春閣隱囊坐占六朝春複道縈紆人似玉桂宮第一
好花枝人說臨春初建時臺上貴嬪同侍讌宮中狎客共題詩隋師忽報橫江至羣
鳥悲鳴奈何帝六朝城闕盡犁平何況閣前方寸地零落秦淮舊酒家摩挲如見後
庭花紫鏡墨澹紅綃冷落日青溪弔麗華

青溪弔江總宅

舊說在東水關鷺峯寺按青溪出鍾山南經竹橋又西南經菰首等橋入秦淮今鍾山書院前後諸水流
合昇平橋經四象淮清橋者皆青溪故道也菰首橋一曰斜橋宋乾道志謂卽東虹橋乃南唐宮左護龍
河橋卽今昇平橋則四象橋當卽青溪中橋淮清橋當卽青溪大橋也宋石邁云青溪大橋西卽江總宅
則今洞神宮處當是其地自俗以鷺峯寺爲青溪閣是以青溪在秦淮水南矣洞神宮舊爲老子宮本在
鍾山下宋景定四年留守姚希得久官不歸希得蜀人乃作蜀三神祠於青溪渚因以洞神舊額加之世
傳此爲江總故宅故希得欲以神祠存之也青溪閣本總故宅宋爲段約宅有亭曰割青蓋取王安石詩

割取鍾山一半青意按青溪閣爲約故宅自不誤誤在以鷺峯寺爲青溪閣耳則青溪閣段約宅割青亭皆在今洞神宮也鷺峯寺明天順間建鷺峯之誤青溪閣在宋清熙間史正志建康志云在府治東此宋府治在舊王府東北當中正街處不應在秦淮南今世指鷺峯西溝爲青溪誤也或云鷺峯梁法光寺舊基也總字總持父絳南史有傳總七歲而孤聰敏有文辭仕梁至始興內史魏寇江陵流寄嶺南陳天嘉中以中書侍郎徵還累遷左戶尙書轉太子詹事旣爲宮端與太子爲長夜之飲養良娣陳氏爲女太子亟徵行游總家宣帝怒免之後主卽位歷僕射尙書令日與後主游宴後庭多爲豔詩與孔範王瑳等十餘人爲狎客由是國政日頽以至亡國陳亡入隋拜上開府開皇十四年卒於江都

青溪一曲水微波江令風流可奈何狎客十人前輩少貴妃三閣豔詩多當時玉樹臨春曲異日瓊花水調歌留得南朝遺宅在佛煙劫火共消磨

白土岡是陳隋戰場

白土岡在鍾山土色白故名隋師之南下也賀若弼自京口濟江陳中領軍魯廣達陳兵白土岡居中軍南鎮東大將軍任忠次之護軍將軍樊毅都官尙書孔範又次之驃騎大將軍蕭摩訶居北亘二十里魯廣達田端以其徒力戰弼麾下戰死者二百七十三人弼而復振更趣孔範範兵交便走摩訶見捨任忠見軍敗馳入臺見後主言狀曰無所用力勸具舟楫就上流衆軍後主信之敕忠出部分久不至時隋將韓擒虎自采石濟江師至新林忠率數騎往石子岡降之仍引隋師入南掖門臺城遂陷魯廣達亦就執入隋以憤慨卒廣達有隊主楊孝辨力戰陷陣父子俱死隋文帝曰平陳之初悔不殺任蠻奴受人榮祿兼當重寄不能橫屍云無所用力與宏演納肝何其遠也蠻奴忠小名也

白土岡前土如玉頹雲黯黯草芽綠云是陳隋舊戰場年年春雨耕殘鏃隋師當日渡江來桃葉山高玉帳開僕射深謀防采石侍中奇計守長淮門將潛兵竟飛渡拍艦紛紛出瓜步初從京口達鍾山八千甲士岡前遇青龍金翅橫江波援兵未集愁奈何苦戰尙有魯廣達壯士空說蕭摩訶摩訶昔日當齊師銑銳擲將飛騎馳深入周軍十二騎長圍連鑣皆披靡煙燄橫空寶刀折一死艱難蘇武節死戰只有楊孝辨生降何異吳明徹歸命新林敵騎驅當時悔未殺蠻奴君看白土岡頭土曾有將軍戰血無

景陽井卽燕支井在臺城內

景陽井在景陽樓下詳見齊景陽樓注隋師入陳文武百司皆遁惟尙書僕射袁憲後閣舍人夏侯公韻侍側憲勸坐殿上正色以待之後主曰鋒刃之下未可交當吾自有計乃逃於井二人苦諫以身蔽井後主與爭乃得入既而軍人窺井呼之不應欲下石乃聞叫聲以繩引之驚其太重及出乃與張貴妃孔貴嬪三人同乘而上隋文帝聞之大驚開府鮑宏曰東井上於天文爲秦今王都所在投井其天意耶按憲等蔽井久而後入則貴妃等入井與後主非同時明矣適相值耶抑預計耶止三人耶抑八婦人中尙有他人及宮人中如女學士袁大捨其人耶入井之險何異墜樓惜乎入而復出未出者又無從問主名也

齊宮曾起景陽樓陳宮復有景陽井十萬隋師捲地來一夜君王去無影臨春深闕

齊雲高君王何處歌董逃銅瓶轆轤杳不測此間避世難藏嬌不枉生平同穴誓井
中之人奈何帝可憐墮日抱兩星結綺望仙舊佳麗入井出井元象知青谿劍心血
傷悲六朝從此始結局石闌紅淚明燕支却灰消盡佛煙起猶賸銀床土花紫當日
惜無三尺水君王妃子此中死

附錄

秀水王 曇仲瞿

美人不照華陰井叔寶心肝麗華影失我臙脂婦女愁六宮淚水如泉冷陳宮往
日八才人如魚如水一家春金釵照月年年豔玉樹從風日日新麗華十歲兵家
女金屋承恩阿嬌貯三鳥初來王母家玉清本在天孫許梧桐結子早盈囊豆蔻
含花乳鳳凰得寵不緣憐太子專房只合侍承香求賢殿裏西來佛不妬娥眉愛
如月長樂宮花春自芳昭陽院草秋來歇選人東宮初乘鸞承封冊拜綠霞冠中
宮不數陳皇后侍女何須賈佩蘭君王初起齊雲觀複道捫天門霄漢欲歸漢武
合歡宮不仿長楊射熊館風流直是任臨春三閣連連兩貴嬪宮中妃子三千歲
天上張星十二辰洞房左右離離曲翡翠沉檀問珠玉寶帳宵眠兜沫香金牀畫
爨仙音燭官家歌舞愛山池虹草恆春好四時樂景不緣天上有賞心那有外人

知復有深宮往來道淑媛亦在蓬萊島美人爭說婕妤賢昭儀誇道修容好黃門
給事肯教遲賤奏封章事事知中使只稱李善度內官兼愛蔡臨兒臨兒解識風
流猾鬢黑如雲貴妃髮七人喚取侍神仙十客呼來伴明月江總文章足大觀客
卿詞賦是豪翰宮裏佳人袁學士殿中才子孔都官雲光箋采桃花色哦詩寫近
君王側不須安世譜房中何必周南勝諸國驪留樂罷奏琵琶彈鈇吹笙盡內家
那曉春江花月夜祇知玉樹後庭花結綺宮中人婉嫕望仙樓下呼兄弟天子宮
中且莫愁尙書不討君王計班姬文學左姬賢飛燕如花事事專左右貂璫纔五
十後宮巫蠱僅三千三宮昨夜傳妖厲一足山禽宇成謎閣中天子夢黃衣山鳥
來歌奈何帝君王身是佛家奴黃塵皂莢不須呼人間萬歲爲天子不若長星醉
一壺蜀江流梯中江隘烽火南來一衣帶璽書十萬下江陵飛來忽到南天外春
官絃管正登臺京口城門昨夜開貴妃尙在君王膝天子焉知有禍來鍾山鐵馬
養山谷擒虎南軍勢如竹江龍已扼上流軍白土岡南鬼神哭孔郎俠少不知兵
遊戲承當大將營蠻奴只作迎降計司馬焉能一背城摩訶少小蘭陵族急作皇
畿大都督平生名勇冠三軍今日爲俘陣前辱此時天子妮宮娃牀下軍書事事
乖僕射不堪還獻納舍人那敢更詼諧官家最是風流子不作降王未能死金井

無波好誓心河魚已著春秋死流傳此井已千年欄口丹書字字鐫愚公擔石焉
能塞精衛啣沙不教填轆轤索斷銀瓶冷古璧相傳照形影香徑宮孔百草荒君
山鼓吹千年靜景陽宮瓦已成灰狐鼠空山雉鳥媒山僧不忍前皇辱重與官家
輦一坏從古繁華若轉燭琵琶浪寫元曲京洛門前舊日駝闔閭臺下當時鹿銅
雀西陵事可哀行人誰識故宮槐六朝脂粉成塵土八代風雲變草萊寒食飛花
莫相送長城公老臙脂痛天子風流自古然往來多少鷄臺夢

陳宮求賢殿是後主沈后所居

后諱婺華吳興武康人父君理有傳母卽武帝女會稽長公主也性端靜有識量聰明強記涉擗經史張
貴妃有寵總後宮之政未嘗怨忌惟尋閣圖史及釋典爲事會天早自暴誦經雨應時降數上書諫後主
將廢之立張貴妃會國亡不果與後主俱入長安後主薨自爲哀辭文甚酸切煬帝巡幸恆令從駕及煬
帝被弑后自廣陵渡江於毗陵天靜寺爲尼名觀音貞觀初卒嗟夫隋之中陳待亡國有禮矣而文納宣
華場納嫺又使沈后相隨巡幸雖年齒已艾不致有中冓之疑然別嫌明微終非愛人以德之道後來身
死國滅蕭后亦賢婦人也而轉徙無歸非其報歟

太息陳隋事傷心沈婺華六宮前殿月三閣後庭花寶筏參薪錄金陵失舊家他年
蕭后事一樣玉鈎斜

水西門訪賞心亭並弔張麗華墓

志載賞心亭在宋下水門城上下臨秦淮當在今水西門宋丁晉公張袁安臥雪圖於此又志載折柳亭在賞心亭下宋張詠建爲祖帳之所又橫江館在水西門外賞心亭側則埋香片十當於水西門外求之而舊志圖經又繪於水西門內當更博考載籍廣輿記云張麗華墓在賞心亭天井中時有白光如匹練掬之似水銀不久流散尤異事也

中橋遺址冰冷冷惆悵青溪一曲青結綺閣中唵窈窕紅梁夢裏見娉婷景陽草長迷智井玉樹花殘弔後庭欲訪麗華埋骨處更無人識賞心亭

讀廣輿記感麗華塚上白光如練事再賦一首

空亭孤塚舊埋香聞道中宵練影長玉女星低天澹白美人虹起月昏黃千秋精衛思填海一例英皇怨渡湘殉國精靈原不死雞臺殘夢警紅梁

張麗華祠

王莛亭金陵雜詠有張麗華祠不詳其處考之志乘亦未有云建祠者惟王漁洋詩話云秦淮青溪上有張麗華小祠不知何代所建金陵圖經不載余少時客秦淮賦雜詩二十餘首而獨遺此因補作二絕句紀之以存古跡云璧月依然瓊樹枯玉容猶似憶黃奴過江青蓋無消息寂寞鳥溪伴小姑臨春結綺已消沉遺廟荒涼碧蘚侵惟有青谿鳴咽水千年猶似怨韓擒唐修隋史謂韓擒虎曰韓擒避廟諱也又陳渚南山詞話云麗華死於青溪後人哀之爲立小祠像乃二女郎其一卽孔貴嬪又張歷友亦詩按麗華

雖擅寵後宮嘗後主就於聲色有以致之隋師南伐黃奴既不肯以身殉社稷一時文武如江總孔範魯廣達蕭摩訶樊毅計忠諸人曾未死國而貴妃身蹈罟罟并與綠珠墜樓何異繼死青溪並無乞憐免死之語不謂之爲國捐軀不可也爲國捐軀廟食可也故余雖考無其址仍係以詩擬擬於青溪下地焉

結綺臨春總寂寥秣陵煙雨亦瀟瀟有人豔曲題三閣似爾仙姿冠六朝舊譜猶能翻玉樹新詞曾記報紅綃故宮最是傷心地井上燕支澆不消
妖鳥羣呼桂樹摧後庭花落黯春苔無端軼事偏能記那得軍事久不開翠帳魂歸遲鳳輦紅梁夢醒感雞臺青天璧月如明鏡曾照嫦娥玉貌來
景陽鐘斷夜烏啼一曲金釵舊夢迷碎玉祇今憐碧血埋香何處築春泥小姑祠近清江北神女樓空夕照西自古蛾眉誰殉國不須惆悵怨青溪
靈旗縹緲碧天霞古木蕭條送晚鴉一樣芳魂招貴嬪六宮遺恨說宣華可憐桃渡曾軍壘又見蕪城作帝家問到迷樓好顏色紅心滿地鈎斜斜

附錄

錢塘女史汪端小韞

瓊樹新聲玉樹詞擘箋風度憶當時紅梁尙幻他生夢璧月空懸異代祠綺閣歌殘春如水秣陵花落雨如絲嬋娟甘爲黃奴殉終古青溪繞曲墀

附錄

錢塘女史管筠湘玉

古來國破蛾眉殉祇有南齊潘玉兒瓊樹空憐結綺閣青溪誰弔麗華祠明妝翠羽他生夢璧月紅綃往事悲留得景陽智井在年年春雨灑燕支

青溪懷

建康實錄吳大帝赤烏四年詔鑿東渠名青谿通城北塹潮溝又引輿地志青谿發源鍾山連縣十餘里則青溪發源鍾山北通潮溝南入於淮其大較也自楊吳城金陵其水遂分爲二其一自今駐防城內穿城西出北轉至竹橋合於楊吳城濠之水其一自內橋至昇平橋與護龍河合又過四象橋至淮清橋與淮水合按青溪合楊吳城濠之水其實城濠所借卽青溪也內橋古天津橋內橋下水青溪與運漕相接處而非正流青溪水當自昇平橋北南流出四象橋則南唐宮城溝渠亦卽青溪也蓋古青溪本自浮橋折而南下經今沐府東門紅花地吉祥街一帶繞鍾山書院之前南出昇平橋而下爲四象橋淮清橋之水故今大陽溝一帶往往有橋有水而書院錢廠橋其水與護龍河別爲兩派此正青溪之舊跡也自楊溥城金陵浮橋以下水流斷絕而昇平橋水南唐及宋復借爲護龍河其故道多不可考今世乃更指鷺峯寺西溝爲青溪則甚非是齊蕭遙光於東府反時臺軍曹虎屯青溪大橋拒之又齊高祖在東府亦有我以青溪爲鴻溝之語則青溪在淮水北東府之西不得爲今鷺峯寺地也陳之亡也張貴妃死於青溪柵勝於中橋故以青溪屬陳

淮水清流玉鍾山翠拂烟幾時開九曲記取赤烏年
卞公扶弱晉韋粲殉衰梁戰血消磨盡山河半夕陽

劍血燕支染春風弔麗華美人能殉國不怨後庭花
兔葵啼曉露燕麥動春風六代匆匆盡無人說故宮
開國中山業規模煥麗譙入流都塞盡一曲見南朝
微雨消芳屨香泥葬玉釵傷心無限柳不獨爲秦淮

石子岡是六朝人叢葬處

岡在聚寶門外今名聚寶山建康志在城南雨花臺側土多細瑪瑙石

白楊蕭蕭紅草暮石子岡前六朝路我來不見六朝人惟見六朝叢葬處六朝自古
多才人舊家裙屐江南春赤烏以來不勝紀下逮晉宋齊梁陳六朝逝矣繁華歇黃
土深深埋白骨寒食何人酌一樽夜深猶上六朝月我來弔古天蒼茫鷓鴣慘澹嘯
斜陽君不見二十四陵泣風雨何況岡前一坏土

車府山

在江甯西南四十里建康志云六朝常於此山藏車乘器甲故名

六代蒼茫繼赤烏當年馳道沒平蕪金輿玉輦消磨盡祇有青山似舊都

金陵歷代名勝志卷五（又名秣陵集）

錢塘 陳文述 退庵

蔣州

隋開皇九年平陳詔建康城邑並蕩平耕鑿於石頭置蔣州六朝舊蹟蕩然盡矣此高穎諸人之罪亦文帝之過也至大業十三年煬帝幸江都中原雲擾阻塞無歸將起丹陽宮遙於江左而已無及平陳功業僅換雷塘數畝田可慨也已

六代江山古石頭一朝烽火盡荒邱後庭玉樹淒涼發一曲青溪寂寞流隋苑笙歌

仍水調廣陵花月又迷樓丹陽宮殿憑誰作空使揚州作蔣州

蔣州治卽石頭城自東晉以後置曰揚州隋平陳更

置蔣州唐武德中李孝恭平輔公祐於此置揚州大都督府後徙揚州於廣陵此城遂廢至揚吳始另建金陵也

韓擒虎賀若弼軍壘

賀若弼剋南徐州斷曲阿之衝而入頓白土岡之東南進攻宮城燒北掖門韓擒虎自采石濟江自新林至石子岡任忠出降引軍經朱雀航趨宮城自南掖門入則韓壘在蔣山西賀壘在蔣山南也

蕭家鬪將有摩訶其奈前徒已倒戈何處將軍殘壘在蔣山煙雨久消磨
渡江士馬任馳驅尚有堅城擴霸圖空令蘇威敷五教當年何不殺蠻奴

隔江望桃葉山是晉王乘戰艦渡江處

桃葉山在六合西南六十五里南史陳後主本紀是江東謠唱王獻之桃葉詞云桃葉復桃葉渡江不用楫但渡無所苦我自迎接汝及隋師伐陳晉王軍於六合鎮其山名桃葉果乘陳船而渡桃葉山一名晉王山

桃葉歌殘賦夢華青溪往事感啼鴉兩軍韓賀留殘壘六代齊梁失舊家建業春風曾玉樹廣陵明月又瓊花尙餘戰艦乘潮處一抹青山隔彩霞

梅湖曲

北堂書鈔地里志云梅湖者昔有梅筏沈於此湖有時浮出至春則花開流滿湖矣太白送友人游梅湖詩躔行新林浦定擘金陵月則常與新林浦相近新林浦江甯西南二十里今大勝關是其地也

聞道梅湖上春來花滿湖東風吹綠水能寄一枝無

梅片白於雪梅根綠似苔金陵一片月歲歲照花開

秋浦雙流合新林一道斜我行桃葉渡曾不見桃花

鴈書寄音塵誰是題詩者何處覓紅芳人說梅根冶

林嶼漾羅羅烟雲迴滄滄何年湖上歸重製浮梅檻

明黃汝亨作竹筏於西湖上施闌幙周本仿梅湖之意題曰浮梅檻

武岡山石佛相傳唐武后造

武岡山在上元城東二十五里有石佛十餘軀相傳爲唐武后造見石蓮古跡編俗呼爲石佛子廟

如此蛾眉一代才金輪奇氣自天開明堂封禪親行後又向青山造像來
若題歲月記千支萬歲通天事可師六代江山五松樹有人重刻順陵碑

淵如觀察得武后順陵碑舊拓本重刻於金陵

獻花巖

花巖寺在牛首幽棲寺北卽古獻花巖唐貞觀時法融禪師入定於此有百鳥獻花之異故名幽棲寺卽宏覺寺又有幽棲祖堂寺或卽宏覺所分也法融爲南宗第一法派名牛頭宗寺名祖堂山亦名祖堂也
江山秋早磬聲催綠樹清陰靜講臺儘有枯僧解禪定更無山鳥獻花來

鏡中雙鬢感華顛夢裏湖山證古禪（余夢中自知前世爲西湖壑庵僧）巾拂重來
期問道不知成佛定何年

烏龍潭訪顏魯公放生池

顏魯公真卿字清臣師古五世從孫也初舉進士又擢制科遷監察御史楊國忠惡之出爲平原太守祿山反河朔盡陷獨平原城守具備又使參軍李平馳入奏元宗始聞亂歎曰河北二十四郡無一忠臣邪及平奏至帝大喜謂左右曰朕不識顏真卿何如人所爲乃若此肅宗卽位靈武公謀於衆曰賊銳甚委命辱國非計也不如逕赴行在遂棄郡渡河開關至鳳翔謁帝詔授御史大夫出爲馮翊太守爲御史某

誣劾貶饒州刺史乾元二年拜浙西節度使召爲刑部侍郎李輔國遷太上皇於西宮公首率百官請問起居輔國惡之貶逢州長史代宗立改尙書右丞元載又惡之以檢校刑部尙書出爲朔方行營宣慰使攝事太廟載又誣以誹謗再貶陝州別駕載誅以楊綰薦爲刑部尙書尋進吏部德宗立楊炎當國又以直道不容改太子少師領使如故盧杞爲相改太子太師罷領使益惡之李希烈陷汝州杞奏遣公承詔宣諭希烈李勉上言以爲失一元老貽朝廷羞不聽抵河南河南尹鄭叔則以爲李希烈反狀旣明不可往公曰君命不可違也遂往旣見希烈宣詔旨希烈遂遣使上疏雪已公不許時朱滔王武俊田悅李納使者皆在希烈所謂希烈曰聞太師名德久矣令公欲建大號求宰相無如太師者公叱之曰若等聞顏常山否吾弟也首舉義師後雖被執詬賊不絕吾年且八十官太師吾守吾節豈受若等脅邪會其黨周曾康秀林等謀襲執希烈而奉公爲師歸身朝廷事洩希烈乃拘公於蔡州遂遇害公年七十有七矣事聞詔贈司徒諡文忠公生平立朝正色剛而有禮天下皆不以姓名稱而獨曰魯公公善正草筆力遒勁論者謂其書點如墜石畫如陣雲鈞如屈金戈如發弩此其大概也至其千變萬化各具一體若中興頌之闕偉家廟碑之莊重仙壇記之秀穎元魯山銘之深厚又是種種不同自早年書千佛寺碑已與歐虞輩暮年之筆相上下嘗作筆法十二章備盡師資之學傳於後世烏龍潭在城西清涼山側舊說晉時有烏龍見故名唐顏魯公置爲放生池潭上有放生庵爲祀公處按唐書乾元二年詔天下臨江帶郭各置放生池八十一所公所置在秦淮太平橋側茲潭在清涼山今之城內昔爲城外當秦淮西北沿石頭將入江處所謂臨江帶郭相合也乾元初公會領昇州論其年代亦復相合又鷲峯寺亦有顏魯公放生池相傳爲江總舊宅因併及之

神龍潛伏處池爲放生開游女施釵去殘僧洗鉢來魯公應有記江令本無才留得

空王宅殘碑掩綠苔

長干行效李太白

長干在今城南聚寶門外詳見前越城注有大長干小長干名甚古白詩最著故系諸此

君家在何處妾家在長干長干好相識淥水明朱闌朱闌十二曲曲曲莓苔綠比翼
雙鴛鴦微波澹秋玉君昔下揚州揚州好畫樓娥娥紅粉女雙槳木蘭舟君今去巴
陵巴陵接洞庭洞庭秋水闊楚雨夢飄零雨絲吹白露君向何方渡妾夢在高樓明
鏡當牕曙梧桐金井闌夢醒啼鳥處西風昨夜來紅卻檐前樹落葉不知愁吹滿長
干路

白鷺洲

丹陽記云在縣西三里大江中多聚白鷺因名其洲建康志引酈道元水經注云江寧之新林浦西對白鷺洲太白詩朝別朱雀門暮宿白鷺洲則此洲距江甯當有一日之程在烈山港亂石磯東北也鳳皇臺詩二水中分白鷺洲蓋古時此洲上下亘江甚遠故一江分爲二水今則淤漲毗連二水舊形不復可辨以形勢度之今之上新河當是其地

遺跡南朝半落暉澄波澹澹晚風微疎煙一抹涼於水白鷺洲邊白鷺飛
嘯傲江山宮錦游謫仙當日最風流鳳凰臺上重回首何處當時白鷺洲

落星岡是李太白遇蓬池隱者脫紫綺裘挽酒處

金陵落星岡有二一在上元神策門內吳大帝時置三層樓吳都賦所謂饗戎旅於落星之樓數軍實於桂林之苑者是卽王僧辨連營拒侯景處一在江甯板橋市西臨大江有岡曰落星岡近水者曰落星洲又曰落星磯太白換酒處也太白詩金陵江上遇蓬池隱者自注云於落星石上以紫綺裘換酒爲歡蓬池在開封尉氏縣北五里亦曰蓬澤隱者蓋家於此惜不得其主名也

白雲映水衆星沒江風浩浩吹綠髮素舸謫仙人金陵城南踏秋月秋月照影何團團美人消息青雲端今宵月如白玉鏡昨宵月如白玉盤玉鏡盈盈落我手玉盤爛爛將進酒西來青鳥啼繁霜落盡絲絲白門柳玉琴蕩漾江聲秋金尊灑落江波流蘭陵美酒三百斛對此可以消煩憂蓬池隱者紫煙客湛湛長庚映天碧雲愁海思一千年醉臥江頭落星石

板橋浦是李白夜泛處

大江過三山至板橋浦又東北至新林浦詳見前新林浦注太白有秋夜板橋浦泛月獨酌懷謝朓詩元暉詩江路西南永歸流東北驚天際識歸舟雲中辨江樹卽此地也

謫仙當日題詩處放棹來尋舊板橋綠酒有情邀夜月青山如夢送歸潮江花江草成千古秋雨秋風弔六朝莫問鳳凰臺上事長安不見暮雲遙

擬建太白樓於鳳凰臺詩以誌事

李白字太白蜀之彰明人母夢長庚入懷而生既長隱居岷讀書力學州舉有道不就蘇頲爲益州長史見而異之曰是子天才於特少益以學可比如性喜縱橫擊劍爲任俠輕財好施與客任城與孔巢父等五人居徂徠山日沈飲號竹溪六逸天寶初南入會稽與吳筠善筠被召同至長安賀知章見其文歎曰子謫仙人也言於元宗召見金鑾殿論當世事奏頌一篇帝命賜食親爲調羹有詔供奉翰林白猶時與酒徒醉於市帝坐沉香亭意有所感欲得白爲樂章馳使召人而白已醉左右以水類面稍解授筆成文婉麗精切元宗深愛其才數宴見白嘗侍帝醉後使高力士脫鞵力士素貴恥之因摘其詩以激楊貴妃帝欲官白妃輒沮之白自知不爲親近所容益傲放不自修與知章李適之汝陽王璣崔宗之蘇晉張旭焦遂爲飲中八仙人屢自陳奏懇賜還山帝賜金放還白遂浮游四方嘗乘月與崔宗之自采石至金陵着宮錦袍坐畫鷁人望之飄飄若仙安史之亂白轉側宿松匡廬問永王璣強辟爲府僚佐及璣起兵白逃還彭澤璣敗被誅白當緣坐初白遊并州識郭子儀奇之儀嘗犯法白爲奏免至是子儀奏請解官以贖白罪有詔長流夜郎會赦還尋陽代宗立以左拾遺召而自已前卒年六十餘白晚好黃老度牛渚磯平姑孰悅謝家青山欲家焉及卒葬東麓元和末范傳正爲宜歙觀察使爲改葬立二碑金陵江山之勝甲於東南古來詩人游者太白最著鳳凰臺又太白賦詩地也余家西湖天竺爲太白遊覽賦詩處擬爲建祠僑寓吳門因太白有夜宴虎邱山序議建太白樓於海湧峯下今來茲地固士大夫藪澤也知必有助余成此志者先之以詩

不賦黃鶴樓來登鳳凰臺鳳凰一去不復回宮錦紫裘安在哉我來訪古高臺下晉

闕吳宮半瓦浮雲蔽日深復深我亦登台賦詩者金陵城西華月流天津橋南空
酒樓三山一水至今在思君不見心悠悠君昔宴集虎邱山蘭亭一序留人寔有人
招飲醉仙舫置君綠水青山間（孫淵如觀察建醉仙舫於虎邱孫子祠右並書太
白序文於壁未及設祠）北湖梅花白門柳一樽重酌高台酒何人解祀謫仙來江
山萬古詩千首

高座寺李白賦詩贈中孚處

李太白上裴長史書云白家居金陵世爲右族遭沮渠蒙遜之亂奔流咸秦因官寓家觀此白亦金陵人
後爲供奉求還山乘舟至金陵有從子僧中孚止高座寺白依焉嘗著宮錦袍坐舟中浮江而下旁若無
人又嘗脫紫綺裘換酒飲落星磯上寺在雨花臺梅岡上晉永嘉中名甘露寺西竺僧尸黎密據高座說
法世稱高座道人既卒於塚側立刹因名爲高座寺或云晉法師竺道生所居梁寶誌曾主其地中孚高
座寺僧太白族姪也太白集中有登梅岡望金陵贈族姪高座寺僧中孚詩寺有中孚塔及井

當年來說法西域有名僧古寺仍高座禪宗朗一燈天曾甘露降地以雨花稱我亦
聽經者思參最上乘

禪伯有高致襟懷支道林青天一明月萬古此禪心龍虎地形壯鳳凰天籟吟謫仙
奇句在鐫入碧峯陰（時遷大運去龍虎勢休歇吾宗挺禪伯特秀鳳鸞骨衆星羅

青天明者獨有月皆太白詩中語

白下門

詞人詠秣陵古跡輒以白門爲白下門不知白門卽古宣陽門臺城外門也在朱雀門內宋明帝紀時人以宣陽門爲白門帝以爲不祥甚諱之右丞江謚謾犯帝變色曰白汝家門是也白下門則自在白下城古之後琅邪城卽江乘之白石壘唐武德中於此地築白下縣也今神策門外之石灰山下當是其地太白詩驛亭一楊樹正當白下門則其地正當驛路也適案頭有吳門女士李晨蘭詩集中驛柳詩有白下門前萬樹柔句因和其韻且以考正古跡焉

踈地長條舞態柔
征人鄉夢易句留
濃陰戍角斜陽晚
落葉旗亭細雨秋
羈客蕭騷悲紫塞
美人消息隔紅樓
今從白下門前過
極目河山動古愁

原作

琴河女史李佩金晨蘭

白下門前萬樹柔
天涯還見綠陰留
春閨別恨風前思
故國殘陽籬裏秋
十里遠籠江店月
一帘高颺酒家樓
年年古道傷行役
搖落關河滿目愁

青溪訪王龍標故居

唐書王昌齡字少白江甯人第進士補校書郎又中宏辭遷汜水尉不護細行貶龍標尉以世亂還鄉里爲刺史閩邱曉所殺昌齡宅近青溪常建詩云青溪深不測隱處惟孤雲松際露微月清光猶爲君茆亭

宿花影藥院滋苔餘亦謝時去西山鸞鶴羣山此唐書地理志黔中道敘州潭陽郡有龍標縣

盛唐詩 伯壘南朝少伯風流久寂寥我向青溪宮畔過楊花明月憶龍標

紫裘換酒興翩翩花月春江醉欲眠一樣才人工樂府當時祇有李青蓮

冷朝陽宅

朝陽爲大歷十子之一韓翃有送冷朝陽還金陵舊宅詩云落日澄江鳥榜外秋風疎柳白門前橋通小市家林近山帶平湖野寺連此種風景金陵處處有之

金陵舊有詩人宅定在平湖野寺旁處處白門鳥榜路更無人識冷朝陽

瓦官寺尋杜少陵舊游處

瓦官寺舊有顧長康維摩圖少陵送許八拾遺歸江甯省觀云甫昔時嘗客游此縣於許生處乞瓦官寺維摩圖志詩中所云看畫曾饑渴追蹤恨渺茫虎頭金粟影神妙獨難忘是也夫長康圖像少陵向許生乞之殆前已刻石少陵乞其拓本歟此爲少陵會至金陵之證獨是金陵爲六朝舊都山水形勝甲於江左而少陵集中舍是題外曾無篇什卽壯游篇歷敘蹤跡亦未一及豈當日未盡登覽耶此亦事之不可解者昔趙甌北據少陵東游姑蘇臺一語因於虎邱建懷杜閣金陵游跡太白最著余意建太白樓於鳳凰臺畔並以少陵附之

六代帝王州江山此勝游如何雙屐過不見一詩留我昨金陵去沈吟太白樓先生登覽處俎豆共千秋

高適曾鎮金陵集中無詩詠之以存其概

唐肅宗二年以江甯縣置江甯郡命高適鎮江東密圖永王璘江甯名勝地也而集中無詩豈多事之際未暇流覽耶抑達夫五十始吟詩其時尚未能握管耶

當日高常侍金陵作鎮來時危勞將略任重失詩才兩道誰開府

先是因輔公祐之亂廢蔣州行臺並廢都督以

延陵句容隸潤州溧水溧陽丹陽隸宣州

何年更築臺乾德元年改江甯郡爲昇州置浙江西道節度兼江甯軍使治昇州

東巡曾作頌應爲謫仙哀太白

有永王璘東巡歌

杏花村

在城南新橋西信府河鳳凰臺一帶皆是明代士大夫園亭多在此寰宇記謂杜牧之沽酒處牧之詩南朝四百八十寺夜泊秦淮近酒家皆在金陵作即此說固可信也

江南春雨夢無痕沽酒旗亭白下門一自樊川題句後至今人說杏花村
何處秦淮問酒家青溪門巷夕陽斜春明舊事關心在宮體銷魂爲杏花

楊吳三門

六朝城郭臺城爲天子所居石頭城爲揚州刺史廨東府城梁時有簡文爲會稽王時第東則孝文王道子府蓋諸王子所居也道子領揚州不居州廨而居舊舍故稱東府隋平江南盡毀舊城於石頭城建蔣州終唐之世因之不改楊吳太和五年徐知誥城昇州廣金陵舊城二十里明初改建都城惟南門大西

水西三門仍其舊更名聚寶石城三山則自燕子磯泝江西上雉堞參差尙可想見南唐舊迹

金陵城郭溯楊吳紫極宮庭半綠蕪順義元年建紫極宮於冶城故址當卽今朝天宮留得二門遺趾在更無人

話黑雲都

隔江城郭暮雲中東下江流戰血紅鐵樹宮庭遺宅在揚州鐵樹宮是楊行密故宅可憐二十六英雄

延和宮弔楊吳太子連妃

妃李氏齊王知誥第四女賢明溫淑容儀絕世吳天祥中冊立爲皇太子連妃及南唐受禪宋齊邱請離其昏唐先主不許封永興公主妃自以吳家家婦遭遇國亡聞人呼公主輒悲傷流涕旣而從連至池州連卒妃還居金陵宮終身縞素稱未亡人焚香對佛誓曰願生生世世莫作有情之物年二十四無疾坐亡有光如翦長丈餘自口出五夕始滅先生悼痛詔李建勛勒碑宮中紀其異云舊志云居延和宮

一樣齊梁竊國才宮庭往事更堪哀滄桑身世綱常繫又見黃皇室王來

南唐故宮遺址

鳳凰臺記事六朝舊城近覆舟山去秦淮北五里至楊吳改築跨秦淮南北周圍二十五里南止長干橋北至北門橋西帶冶城石頭東止通濟門又建宮城於天津橋北卽南唐宮是也在今內橋北上元縣治盧妃巷廣儲倉等地皆是左有東虹橋今昇平橋也右有西虹橋今大市橋也此護龍河也由盧妃巷北

行里許又一橋亦名虹橋而東西二虹橋北達之水綰帶於此其前則東南達四象橋入淮西南達運漕
內有百尺樓澄心堂小金山摩訶池瑤光殿柔儀殿紅羅亭飲香亭宮城之北另有北苑也

東虹迢遞接西虹指點南唐說故宮儘有洞天橫碧錦見清更錄更餘亭榭幕羅紅金輿

玩月殘山在

宋陳無已清涼寺詩惟應駐馬坡頭月
曾見金輿納晚涼注山有後主暑風亭

玉殿移花舊夢空

廬山僧含有麝囊花詔取
植於移風殿號紫風流

樣滄桑天水碧錢塘烟雨有溟濛

南園訪南唐宋齊邱故居

吳太和一年徐知誥召齊邱還金陵給南園居之不令與國事南園志不詳其處或卽宋明帝紀張永乞
借之南苑耶則卽建興苑也梁天監改建興苑於秣陵且侯景之亂韋粲等會青塘立營據建興苑則當
在城西石頭側也齊邱字子嵩世爲廬陵人因姚克瞻謁烈祖參祕書仕至鎮南軍節度使元宗立召拜
太保中書令請歸九華賜號青陽公復起拜太師封衛國公鎮洪州周侵淮北起爲太師領劍南東川節
度使封楚國公周棄淮南衆議扼險齊邱不從終失淮南鎮護自周還發其短放於青陽敕鎮其第家衆
坐餒因謫於其妻共縊殺之年七十二諡曰繆醜徵時餬口於倡家魏氏後娶爲妻封國夫人齊邱旣死
元宗屢見爲厲遂遷都也齊邱佐烈祖篡楊吳之業又請絕太子璉昏誣韓熙載沉汪台符竊譚峭化書
幽讓皇之族於泰州依恃舊恩縱恣狂悖小人之尤也

力排熙載溺台符衣錦功名似爾無生果有謀能竊國死能爲厲致遷都讓皇骨肉

全家徙公主婚姻七出誣太息九華山翠裏青陽甲第穢名區

蚶蛟磯弔汪台符

台符歛人南唐初上書國主齊邱嫉其才誘令飲醉沈此磯在石頭城下

蚶蛟磯下有餘哀魚腹精靈去不回太息才人丁未造晦才難免况矜才
晚辭佐命充高隱早向仙人竊化書如此人才難並世水亭秘計畫灰初

石頭驛詠陶穀使江南事

南唐拾遺記載陶穀使江南甚欲假書韓熙載令館伴驛中膽六朝書半年乃畢穀見伎秦弱蘭以爲驛
卒女也遂敗慎獨之戒作長短句贈之明日中書宴穀使弱蘭出歌詞名風光好云好姻緣惡姻緣祇得
郵亭一夜眠別神仙琵琶撥盡相思調知音少再把鸞膠續斷絃是何年又沈遼任社嬾傳亦載此詞以
爲穀使吳越女爲社嬾非弱蘭蓋穀乃無行小人使南唐吳越皆有穢行且穀非甚愚闇甯不知弱蘭之
非驛女特借此自彰其穢以爲婪取地耳觀其在南唐橫索後主硯山在吳越乞取金盞最文人之無行
者非止驛女一事也石頭驛在石頭城唐張九齡有候使石頭驛詩李白有答裴侍御行至石頭驛詩
又有金陵驛在上元縣長樂鄉

何處風光好郵亭一夜眠野花香客夢驛樹送華年罷酒燈前讌烹茶雪後天使星
指吳越還有好姻緣

南唐李建勛青溪草堂遺址

建勛字致堯，趙王德誠第四子。仕至昭武軍節度使，適意泉石，營亭榭於鍾山，以司徒致仕，賜號鍾山公。妻廣德長公主也。亦自號鍾山老嫗。建勛有青溪草堂，按青溪發源鍾山草堂，當即在鍾山臺榭中耳。或謂之曰：欲復爲九華先生耶？建勛爲詩見志曰：桃花流水須相信，不學劉郎去。又來時有李冠者善吹洞簫，建勛絕歎賞之。建勛死無所依，流落梁宋間，人比之李龜年云。

不學青陽賦，九華杳然流。水送桃花草堂近，在青溪曲誰識鍾山處士家。

風流顧曲擅南朝，古澗秋蟬響欲消。一自清談人去後，更無人聽李冠簫。

金陵寺是五代僧貫休所建

僧貫休，姓姜氏，字德隱，婺州蘭溪人。與齊己齊名，有西岳集十卷。吳融爲之序，又有禪月集，休每得句云：只堪供養佛，故懷贈武昌樓詩云：風清江上月，霜灑月中砧。得句先呈佛，無人知此心。常爲詩投錢鏐云：滿堂花醉三千客，一劍霜寒十四州。投王建云：一瓶一鉢垂垂老，千水千山得得來。爲世所誦，寺在定淮門內馬鞍山。

一錫東南任意投，李花世界未全收。禪心自照三千界，詩識曾題十四州。錦樹蒼涼雲外見，金輿寂寞月中游。應真遺像今猶在，誰識當年老貫休。（貫休畫羅漢其中一幀卽已像也）

南唐北苑

徐鉉北苑侍宴賦序云：望蔣嶠之嶽岑，祝爲萬壽；泛潮溝之清淺，流作恩波。則當在城北，又南唐拾遺記

云南唐宮嬪皆澹妝以茶油花餅施額上號北苑妝

南唐開北苑知近古臺城蔣嶠當門翠溝繞苑明內香春罷宴法曲夜飛聲寂寞
新妝處茶花貢舊京

南唐別院感耿玉真事

玉真軍大校耿謙女明慧有姿好書善畫爲詩往往有佳句雅通黃白之術能拘制鬼魅得道於鄆仙翁
爲女道士自稱天自在山人保大中因宋齊邱薦入宮元宗處之別院號曰先生嘗以金盆貯雪削爲錠
狀投熾炭少頃成銀又掃蠶壤置鐻中鍊之皆成白金元宗嘗購真珠欲得圓者玉真聚麥以銀釜燭之
皆成圓珠大食國進龍腦油玉真以夾縑囊盛白龍腦懸之瀝液如注香味愈於所進未幾得幸元宗有
娠一夕雷電繞屋及霧娠已失矣問之曰己爲神物取去久之宮中忽失太后耿亦隱去嗣得太后於方
山寶華宮耿不復見宮有人言其往來江淮賣藥於市云或曰挾太后至寶華宮徐國太事也

妙術金盆雪纖袿碧落霞雲雷仙眷屬黃白道萌芽幻跡留淮市流言誤寶華從來
宮禁事祇合戒奇裘

翠微亭

南唐後主建在清涼山宋陳無已清涼寺詩惟應駐馬坡頭月曾見金輿納晚涼自注山有後主暑風亭
井闌刻保大三年字今之翠微亭卽暑風亭相傳爲南唐避暑宮也清涼山卽石頭山

清涼山色幾芙蓉舊是南唐避暑宮玉輦夜游明月好娥皇舞罷彩雲空六朝城郭

啼鳥外一枕江流鐵甃中留得翠微亭子在水天閒話夕陽紅

訪南唐百尺樓遺址

南唐書蕭儼傳元宗於宮中作百尺樓羣臣歎其宏麗蕭儼曰恨樓下無井以此不及景陽樓耳後主怒貶儼舒州木平和尙知人禍福後主常召見於百尺木平指樓曰此宜望火及淮甸交兵龍安山置烽墩應江北後主常登樓以望其言始驗

金釘壁帶淩宵起罽毼影落秦淮水何處南唐百尺樓殘輒繡礎空遺址憶昔彭奴起將家鯉魚風起散楊花金陵城郭親營建秘計爐灰定九華宮殿琳琅開建業有司初作昇元格北苑妝成法曲新內香宴早羣花集隱居託意署鍾峯親政纔居太子宮儘有英才資輔弼建隆新政美重瞳宮中逸事誰親見金錯刀書龍尾硯保儀自掌澄心堂娥皇深住瑤花殿殿秘堂深繞玉階紅羅亭樹玉梅開纖裳高髻人多少都與登樓笑語來此樓尙記前朝築雪中開宴人如玉畫院風流有盛名圖寫林泉繪絲竹保大五年正月丁亥朔大雪帝召齊王景遂等登樓賜宴賦詩徐鉉爲前後序仍集名手圖畫當卽此樓樓頭花月自芳妍樓上明珠照玉顏不見浮梁窺采石宮中空唱念家山北來萬馬樓前至臥榻更無鼾睡地江南江北舊家鄉南朝千古傷心事傷心千里舊由河轉眼滄桑喚奈何一曲教坊邀醉舞可憐揮淚別宮娥倉皇百日中原去趙家

天水知何處山溫水軟秣陵秋回頭望斷樓前樹跨虎乘鷄識有徵黃花水縮數難
爭淨居曾禮臺城佛照破興亡一塔鐙垂楊飛雪黃羅冷齊梁殘局消俄頃小樓昨
夜斷腸詞月中憶煞天河影讜言人已去舒州烽火連天望遠愁留得燕支芳井在
不應更遜景陽樓

附錄

(錢塘女史)汪端小韞

六代江山百尺樓鍾山隱士亦風流玉梅正擁紅羅幕銜騎長嘶白鷺洲草草鶯
花非故國潺潺春雨釀新愁卻憐天塹長江固祇換凌雲轡一鈎

紅羅亭懷古

紅羅亭在南唐宮中後主建四面栽紅梅作豔曲歌之韓熙載和云桃李不須誇爛漫已輸了東風一半
時已失淮南故也

紅羅亭外春風來紅羅亭中華譙開美人如花復如玉鈿篋橫吹破春綠南唐宮殿
久啼鴉歌舞江山付夢華一片金陵城畔月更無人倚玉梅花
瓦官寺感南唐遺事

景定志引建康實錄晉哀帝興甯二年詔移陶官於淮水北遂以南岸陶地施僧慧力造瓦官寺閣曰瓦
官閣南唐改曰昇元陸游南唐書瓦官寺因山爲基高可十丈開寶中宋師下江南士大夫豪民富商家

婦女數千人避難閣上吳越兵舉火焚之一旦而燼焦氏筆乘云驍騎衛倉是其遺阯登高江山滿目最爲勝處太白詩白浪高於瓦官閣所見正同嗣詔毀私剏庵院集慶庵一僧妄以瓦官名其處得免今新橋西杏花村瓦官寺是也其上瓦官寺本名叢桂庵焦竑易名鳳游寺又晉義熙初師子國遣使獻玉像經十載乃至歷晉宋皆在瓦官寺與戴安道手製佛像及顧長康維摩圖世稱三絕見南史又方輿勝覽南唐時有人於昇元閣掘得古記中有云抱雞升寶位走犬出金陵上句謂後主丁酉生下句謂宋師甲戌渡江也

玉帳焚香上將才瓦官遺事亦堪哀綺羅士女消磨盡豈獨澄心一炬灰
何處虎頭金粟影更聞師子玉維摩抱雞走犬關前定惆悵家山一曲歌

畢竟南朝勝六朝諸臣忠義薄雲霄文儒報國將軍死惆悵新詞賸碧綃城陷將軍高彥馬誠信及弟承俊皆戰死勤政殿學士鍾蒨右內史侍郎陳喬皆死國後主在圍城中作櫻桃花落一闋未就而城破遠岫雲籠雨打舟一江春水向東流可憐一片金陵火何不先燔百尺樓

鳳臺山弔南唐司空孫文忠公晟遺宅

孫晟初名鳳又名忌高密人篤學善文辭少舉進士豪舉跌宕不能就繩墨遂弃去南遊廬山爲道士繪唐詩人賈島像置壁間道衆以爲妖驅之乃北走趙魏謁後唐莊宗於鎮州朱守殷守汴辭爲判官守殷反伏誅亡命陳宋間安重誨謂教殷反者晟也族其家晟渡淮至壽春節度使劉金送詣金陵烈祖愛之預禪代祕計元宗立出爲舒州節度遷右僕射與馮延巳並相進位司空周師破滁州擒皇甫暉江左大

灑以晟使周世宗留之使以樓車載詣壽州城下諭劉仁贍降晟至呼曰無墮臣節援兵即至矣世宗怒詰之晟曰臣備員唐宰相豈可教節度使叛耶會周將李重進上金陵招重進驕書書中多斥周過世宗怒遂收晟誅之晟之見收也都承旨曹翰謂曰有旨賜相公死晟神色怡然索鞞笏正衣冠南向拜曰臣謹以死報國遂死之元宗聞晟死哀甚流涕贈太傅追封晉國公諡文忠鳳臺山當與今鳳遊寺相近早入廬山爲道士曾摹賈島作詩人樓車慷慨勤王詔鞞笏尊嚴報國身正氣中原留使節大名故國泣忠臣鳳臺荒隴知何處惆悵叢祠宰樹春

南唐劉忠肅王祠

祀南唐清淮節度使劉仁贍舊在上元縣西洪武二十年建於欽天山陽有黃子澄撰碑按仁贍字守惠曲溪人歐史以爲淮陰洪澤人吳濠州團練使金之季也輕財重士號令嚴肅事烈祖爲左監門衛將軍袁黃二州刺史元宗時拜武昌軍節度使平楚之役以舟師克巴陵徒清淮軍節度使周世宗圍壽州坐城下督攻甚急仁贍素善射矢至世宗前輒墮世宗命移牀更進矢墮如初仁贍投弓歎曰天果不佑唐耶若此吾有死耳世宗遣人招之不顧會淮淝水漲周師敗走明年周人復至南兵屢敗元宗震懾請稱臣割地仁贍獨堅守圍城不少下少子崇諫幸父病夜度淮北以降爲小校所執仁贍立命斬之士卒皆感泣死守既病甚副使孫羽詐爲仁贍書以降世宗賜以玉帶御馬拜太尉兼中書令天平軍節度使仁贍不受命而卒偏裨及士卒自殺以殉者數十人元宗聞仁贍卒哭之慟贈太師中書令諡曰忠肅加封衛王焚其誥曰魂其有知鑿周惠耶歆吾命耶夜夢仁贍拜墀下若受命然後主立進封越王宋政和時列仁贍於祀典賜祠額曰忠顯陸游南唐書言仁贍斬崇諫時監軍使求救於仁贍妻薛氏薛曰崇諫吾

幼子固所不忍然貸其死則劉氏爲不忠之門趣命斬之然後成服仁膽死薛氏不食五日而卒徵特仁
瞻忠臣薛亦烈女子哉

孤忠勁節敵人知落日青山弔古祠石碣滅親明大義張巡力戰失援師艱難孫晟

登車日慷慨陳喬撤榻時太息南朝多義烈江流嗚咽不勝悲

孫晟殉節事見前周師急攻城後主欲降樞密使陳

喬勸殉國不從乃自縊二吏撤榻瘞之餘如潘佑之歷疏國奸虜居素沉井致命趙仁澤扶口不撓段處常誓死退陔張彥卿繩床搏戰鄭紹業視死如歸李延鄒之擲筆周宏祚之赴水高彥之巷戰廖澄之仰藥張雄之父子殺身胡則之一門殉難鍾蕩舉族被兵申屠令堅之誓死報國統軍使李雄父子八人之戰沒於溧水南唐忠臣之衆駕六朝而上之盛矣哉

梅岡弔南唐中書侍郎韓熙載墓

熙載字叔言濰州北海人少隱嵩山後唐同光中進士父光嗣平盧節度副使因軍推留後明宗討亂坐死熙載南奔洵擢制誥詔命典雅有元和之風屢上疏論事不見用熙載才氣逸發爲當時風流之冠性高簡江左稱爲韓夫子尤忽細謹老而益甚蓄伎四十輩自污以避入相開寶三年臥疾卒於城南戚家山贈右僕射同平章事諡文靖葬梅嶺岡謝安墓側

避難軍門杖策干嵩山舊隱路漫漫早年北伐雄心在老去南朝相業難夫子文章
原典雅才人酒色亦辛酸分明棋墅東山意埋骨端應傍謝安

鍾山訪徐鉉遺宅

鉉字鼎臣世爲會稽人父延休爲吳江都少尹遂家廣陵十歲能屬文長與韓熙載齊名江南謂之韓徐起家吳校書郎洊仕南唐至吏部尚書宋師圍金陵奉使辭令不屈既隨後主歸宋命爲太子率更令歷左散騎常侍奉敕撰江南錄卒年七十六弟鐸字楚金精小學與兄俱有名官右內史舍人兼兵吏部選事開寶七年先鉉卒

葺葺衰草沒殘基遺宅蒼涼暮靄疑花月誰尋江令宅雲山好傍蔣侯祠興亡著錄江南重兄弟聲華海內知愁絕蘭成小園賦汴京流水不勝悲

附錄

(錢塘女史)汪 端 小韞

伴月香曾永夜焚鼎臣遺宅傍斜曛江南遺事空存錄汴北雄談未策勛赴洛士衡偏擅譽入隋公輔尙能文(公輔李德林字)可憐握手思潘佑地下應慚見故君(宋太宗使鉉視李煜煜謂之曰今日悔殺潘佑鉉還以聞遂害煜)

訪南唐昭惠后周娥皇詠陵

后司徒宗之女通書史善歌舞尤工琵琶創爲高髻纖裳及首翹鬢宋之妝常雪夜酣讌請後主起舞後主曰汝能創爲新聲則可矣后卽命賤綴譜喉無滯音筆無停思俄頃譜成所謂邀醉舞破也又有恨來遲破亦后所製得霓裳羽衣殘譜以琵琶奏之於是開元天寶之遺音復傳於世以乾德二年十一月甲戌殂於瑤光殿之西室年二十有九葬懿陵諡曰昭惠後主自製誄刻之石與后所愛燒槽金屑琵琶同葬

青山何處葬西施落葉哀蟬有所思名畫尙留邀醉舞（金雲門女史有畫周娥皇雪夜邀醉舞圖余姬人管筠有詩）新聲誰譜恨來遲宮人解寫金經字帝子親書玉女碑僥倖瑤光人早死汴京不見入宮時

金雲門女史畫周娥皇雪夜邀醉舞圖

管 筠 湘玉

金碧樓臺交網戶蘭堂夜譙翻新譜纖眉高髻周娥皇笑倚君王邀醉舞流風迴雪翩驚鴻君舞不如妾舞工風香愛語春生早妾舞何如君舞好君舞不輕作妾意能相邀命賤綴譜雲鬢嬌初爲霓裳後六么新聲按入燒檀槽珠籠夕捲蘭情媚法曲聲聲響紅翠但得嬋娟一曲成不辭醺醪千回醉此時尊前酒未闌此時酒邊鐙欲殘雪花如海飛漫漫外人那識宮中寒拍成自理么絃和澄心堂紙宮香澆流珠遺事記南朝樂府風流查一破君不見瑤光西殿葬琵琶落葉哀蟬感暮鴉剗襪香階明月夜紅羅亭外又飛花

柔儀殿感南唐小周后事

小周后昭惠后女弟也警敏有才思神彩端靜以戚里間入宮掖後主製樂府豔其事有袞纓下垂階手提金縷鞋之句昭惠薨納后成禮被寵過於昭惠後主常於羣花中作亭幕以紅羅押以玳牙又柔儀殿設玉太古諸器貯后於中國亡隨後主北遷封鄭國夫人例隨命婦入宋宮讌樂出必泣言後主宛轉避

之後主暴隕后哀不自勝亦薨

柔儀殿上玉罌香金縷提鞋夢未忘絕豔可如唐虢國承恩應比漢昭陽娥皇國后身先死芳蕊夫人貌更芳他日青衣同北狩宮車一樣感滄桑

訪澄心堂遺趾並弔黃保儀

澄心堂在南唐宮之左後主建藏書撰述之所造澄心堂紙爲世所珍保儀黃氏江夏人容態冠絕一時顧盼顰笑無不妍姣工書札使專掌宮中書籍二周后相繼擅寵不得數見幸後主藏鍾王以來墨蹟至多保儀實掌之城將陷後主恚命焚之從北遷卒於大梁

蕙幄蘭堂詠月娥澄心遺趾問如何後庭班左才名重前殿鍾王墨跡多雲裏蓮花邀素月簾邊梅樹擁紅羅湘東劫火同灰燼留與宮詞寫衍波（姬人管筠有南唐宮詞）

南唐宮詞

（錢塘女史）管筠 湘玉

法曲沉沉夜漏催繞亭香雪玉梅開綠鈿綃幃紅羅壁邀取君王醉舞來
柔儀殿上玉罌香袂鞵新詞事渺茫應是虞宮前事在本來國后號娥皇
鍾王墨跡渺雲煙錦暉珍題禁本傳一樣漢宮辭輦意澄心堂上掌書仙
琵琶金屑月輪孤法曲霓裳定有無記得恨來遲入破六宮無語問流珠

橫波小影說宮娃翠羽分
水一涯十八雲鬢胡蝶繞
玉人氣息本如花
宮禁千秋軼事傳
宵娘新月出雲妍
從今兒女淩波鞦
不數南朝步步蓮
南唐淨德尼院弔入道宮人殉國自焚處

淨得尼院八十餘人皆宮人入道者都城將陷積薪於庭後主與約曰如有不虞宮中舉火爲應吾與汝輩俱焚死及黃保儀燔積書於宮院中遙見煙燄遂蒸積薪皆赴火死無一人肯脫者院阯今無攷能望見宮中煙起則與宮城當遠也

奪瑤瑤光事不平
魚山仙梵月華清
後庭寂寞辭金殿
故國滄桑感玉笙
白奈簪花悲此地
青蓮證果悟他生
空門劫火香消後
無數宮車向北行

樂官山

宋兵下江南諸將置酒大會伶官痛哭不作樂被殺瘞此按南唐樂工有楊花飛李家明王感化諸人南唐書有傳殉國者或卽此數人未可知也南唐之亡諸臣如潘佑廖居素孫晟劉仁贍張彥卿李延鄒周宏祚陳喬鍾萼高彥廖澄張雄胡則申屠令堅先後死國而樂部諸伶復慷慨以殉斯亡國爲有光矣

秣陵花月奈愁何
腸斷流珠一曲歌
凝碧池頭海青死
古來忠義此中多
止戈三誓戒龍驤
太息黎園碧血涼
一笑當年芻武惠
帳中辛苦共焚香

書晁補之芳儀曲後

芳儀南唐元宗女後主失國隨族北遷嫁爲宋供奉官孫某妻孫出仕武疆都監契丹兵至武疆失守芳儀爲所虜遼聖宗得之悅其都美納之宮中封芳儀蓋遼人內職名據廬山真風觀石刻當卽永甯公主也屍補之爲北都教官覽北庭雜記而悲之作爲此曲

家國滄桑又一時天河星象指南箕北庭雜記分明在一曲芳儀最可悲
花落江南飛鷓鴣穹廬回首月輪孤分明蹤跡文姬似曾有胡笳按拍無

南唐李後主祠

在府治東南十里俗稱李帝廟

故宮何處問南唐零落叢祠半夕陽墨蹟鍾王已灰燼紅羅亭榭更荒涼地鄰臥榻
知難免天塹長江竟被量太息雄圖成底事汴京花月亦滄桑

皇甫巷是南唐皇甫暉所居

亦名王府巷在朝天宮東下街口閃駕橋北舊有龍翔寺址寺卽元文宗藩府巷卽寺旁路也人知以藩府得名不知先本暉第宅暉魏州人先事唐晉事具五代史契丹入中原暉南奔仕至北面行營應援使與姚鳳守清流關爲宋太祖所擒不屈死之暉子繼勛爲裨將從戰歸歷仕池饒二州刺史神衛統軍都指揮使拜大將軍貲產優贍園林聲伎甲於金陵無效死意蒙蔽軍報後主知之以屬吏爲百姓所戀居亦毀焉

初從北國後南朝亂世英雄肯寂寥天命已知歸檢點將軍空復事嫖姚戟門賓從

笙歌滿甲第園林子弟驕太息忠臣無濟美齋鍾空應午時潮（滁州僧寺於午時鳴鐘云以報暉）

宋曹武惠王廟

祀宋樞密使曹彬舊在江甯社壇前明洪武二十年改建於欽天山陽卽雞鳴十廟之一南唐事宋最爲恭順本無可伐之罪宋祖西失銀夏北謝燕雲獨於江左蓄志併吞實爲以強凌弱師出本屬無名彬焚香誓衆期以不殺尙得古名將之義然曹翰屠江州而不能禁吳越兵焚瓦官閣諸將因作樂抗命誅戮伶工皆不能止則令行禁止之謂何而廟食之不能無遺憾也

黃袍一着五代畢從此中原將畫一不爭塞北爭江南六師先爲金陵出水犀百道橫江來唐兵十萬如死灰桓桓上將曹武惠焚香祇爲蒼生哀諸將同心復同誓有征無戰王師義不因將略矢忠貞誰將兵劫迴天地六朝前後殊可憐龍蟠虎踞知幾年王濬樓船石頭下韓擒賊血青溪邊繩牀搏戰悲軍主雲擁降旛息鉦鼓百年版籍歸汴京不異錢塘先納土士女青山酒一卮江風吹雨卷靈旗君看北宋曹侯廟何似南齊蔣帝祠

半山報甯寺是王安石故宅

王安石臨川人好讀書善屬文歐陽修爲之延譽擢進士上第文彥博韓維呂公著曾公亮並薦之鮮于

恠吳奎唐介孫固呂誨皆言其不可用蘇洵作辨姦論譏之神宗朝用爲宰相行新法任用呂惠卿章惇曾希之徒設三司條例司銳意變法農田水利青苗均輸保甲免役市易保馬方田諸役天下苦之范純仁韓琦富弼司馬光皆言其不便安禮安國其親弟也亦以爲非帝惑其說皆不聽暴斂橫征民窮財匱卒釀靖康之禍英宗治平四年以王安石知江甯府神宗熙甯九年罷判府事尋爲集禧觀使元豐七年安石請以所居宅捨爲寺賜額甯甯集中有謝賜額表宋時在城東七里距鍾山亦七里此爲半道故名半山從其實也東坡蔣山詩云朱門收畫戟紺宇出青蓮卽此明初地入禁中當在今駐防城內安石墓相傳亦在半山寺或以太平門內香林寺趾當之

青蓮紺宇劫灰平殷浩當時枉盛名空有文章追作者可憐經濟誤蒼生釀成北狩
徽欽禍旁及中朝洛蜀爭何處香林遺趾在夢華惆悵話東京

半山亭

金陵志獨龍岡有上下二定林寺王荆公卜居於二定林之間名曰半山六朝事蹟報甯禪寺地名白塘由城東門至蔣山此半道也故今亦名半山寺東坡有半山寺詩

定林雙寺暮雲停坡老新詩駐馬聽一自青苗流毒後更無人話半山亭
苦將官禮行新法誤盡蒼生誤子孫自己一亭留不得青山何處更爭墩

鍾山用東坡同王勝之游蔣山韻

蘇軾字子瞻眉山入父洵世所稱明允先生者也軾生十歲父宦學四方母程氏嘗覽東漢史至范滂傳

軾侍側曰兒若爲滂母其許之乎母曰汝能爲滂吾顧不能爲滂母耶嘉祐二年歐陽修考試禮部進士梅堯臣得軾論刑賞以示修修驚喜謂堯臣曰老夫當讓此人出一頭地及廷對仁宗得軾及轍所對策退朝謂皇后曰吾爲子孫得二宰相矣英宗自藩邸聞其名召試得直史館神宗卽位欲用軾中書條例又欲爲起居注安石以爲不可乃寘軾官告院熙甯四年安石欲變更科舉成法詔使兩制三館議之上得軾奏議乃止卽日召見問政軾曰臣竊意陛下求治太急聽言太廣進人太銳願陛下安靜以待物之來然後應之上竦然初策進士舉子爭希合上意多言祖宗法制非是軾爲考官退而擬答以進安石愈恨軾乃乞外通判杭州自杭徙密輯悍卒之誣民者自密徙守徐州時河決曹村匯於城下富民爭出避水軾曰吾在是水決不致壞城驅使復入而自杖策入武衛營呼其長告之乃率其徒築東南長堤首起馬耳山尾屬於城而水患息徙知湖州言事者摘謝表中語以爲謗逮赴詔獄御史舒亶復劾其作爲歌詩譏切時事將擠之死地張方平范鎮王安禮救之遂以黃州團練副使安置築室東坡自號東坡居士五年神宗謂宰相王珪蔡確曰國史至重可命蘇軾成之珪等有難色帝遂手札移軾汝州軾上言有田在常願得移居奏入報可哲宗立復朝奉郎知登州召爲禮部郎中元祐二年遷中書舍人時宣仁太后臨朝司馬光執收軾遇事盡言多見聽用尋除翰林學士復轉侍讀嘗召入對殿宣仁太后問曰卿前爲何官對曰臣嘗爲團練使后又曰今爲何官曰待罪翰林學士后問何以至此曰遭遇太皇太后皇帝陛下后曰非也軾奏曰豈大臣論薦乎曰亦非軾驚曰臣雖無狀不敢由他途以進后曰此先帝意也先帝每誦卿文章必歎曰奇才奇才但未及進用卿耳軾不覺哭失聲宣仁后與哲宗亦泣左右皆感涕已而命坐賜茶撤御前金蓮燭遣內侍送歸院三年權知禮部貢舉嘗侍上讀祖宗寶訓因及時事當軸者惡之出知杭州杭近海水泉鹹唐刺史李泌始引西湖水作六井白居易復浚西湖湖水入運河自河至

田所溉千頃至宋廢而不理湖中葑積爲田運河失湖水之利則取給於江湖潮渾濁多淤河行闕闕中三年一淘大爲市井患而六井亦幾廢軾始至浚茅山一河專受江湖浚鹽橋一河專受湖水復造堰閘以爲湖水蓄洩之限且以餘力復完六井民獲其利又取湖中葑田積爲長隄以通南北植芙蓉於上望之如雲錦杭人名之曰蘇公堤家有畫像飲食必祝六年召入爲翰林學士承旨復侍邇英殿七年出知揚州尋以兵部尙書召還再遷禮部復兼二學士八年出知定州紹聖改元三黨之論大起軾坐爲中書舍人日草詔誣爲謗訕復謫知英州惠州安置軾以少子過自隨居三年復貶瓊州別駕安置昌化軾至儋官屋以居有司猶執不可乃買地躬自築室至元符三年更三大赦始得還將居許病暑暴下乃止於常遂卒葬於汝之邾城高宗朝特詔追贈文忠王益柔字勝之用父曙蔭平殿中丞後以直學士知江甯府施元之注勝之至江甯纔一日移南都坡在賞心亭作長短句送之西清詩話元豐中王文公在金陵東坡自黃北還日與公游後渡江至儀徵和蔣山詩寄金陵王勝之公亟取讀至峯多巧障日江遠欲浮天乃拊几歎曰老夫生平作詩無此二句

獨上鍾山頂金陵氣鬱然人才三國志城闕六朝年樹老齊梁寺帆通楚蜀船畫師顧金粟詞客李青蓮桂峪香應近松林路欲偏覆舟俯平陸幕府接層巒翠合千重嶺雲飛百道泉猿聲悽夙夢鷓影沒遙天廢隴餘秋草荒陵起暮烟憑誰圖笠屐雲

月共嬋娟

明道先生祠

明道程子名灝字伯淳世居中山徙河南舉進士任晉城令在縣三年民愛之如父母熙甯初因呂公著薦擢監察御史帝素知其名數召見前後進說甚多大要以正心窒欲求賢育才爲先務會新法行被旨赴中臺議事王安石方怒言者厲色待之先生徐言曰天下事非一家私議願平氣以聽之安石爲之媿屈因上疏改授鎮甯軍節度使判官元豐二年召判武學旣而罷之哲宗嗣位召爲宗正寺丞未至卒文彥博題其墓曰明道先生諡曰純理宗淳祐中追封河南伯仁宗嘉祐四年嘗爲上元主簿多及民之政孝宗淳熙三年劉琪重修府學立明道先生祠今爲明道書院在鎮淮橋東又有祠在上元縣治中

探源循洛水同志匹伊川資格嗟豪傑官階限聖賢高風期善俗遺澤在均田太息舒王宅空山沒野煙

一拂清忠祠

在府治清涼山麓祀宋監上安門鄭介公俠以上流民圖去國僅存一拂故人稱一拂先生父監江甯稅使常隨父讀書清涼山寺中

生平忠愛鄭監門清宦歸來一拂存曾寫流民諷新法可憐安石枉爭墩

泥馬巷

在三山街相傳是宋高宗渡江處

泥馬南來事有無江山形勝見規模如何苦要臨安去不向金陵議建都

宋妃祠

高宗南渡妃留建業善治日疾沒而祀之在牛首山俗稱眼香娘娘廟

瀟瀟暮雨暗靈旗天水蒼涼又一時車駕倉皇人去遠湖山金碧夢歸遲暮潮滄海
梅妃塚明月揚州繡女祠（婁東梅妃塚揚州繡女祠皆宋高宗妃也）都是生平憑
弔處南朝遺事不勝悲

南宋行宮

卽南唐故宮也初爲建康府治紹興三年高宗駐蹕金陵以府治爲行宮徙府治於東錦繡坊卽今舊王
府地按建炎三年上發臨安如建康駐蹕神霄宮上如浙留杜充領行營金人陷建康通判楊邦乂死之
神霄宮卽吳大帝爲西竺康僧會建保甯寺在城內新橋南晉時鳳集於此因建鳳凰臺於寺側齊高帝
於其地得外國甄建白塔名曰塔寺唐改長慶寺南唐名奉先寺宋賜額保甯建凌雲鳳皇雲光三亭政
和三年敕改神霄宮也南唐故宮與神霄宮屬兩地蓋建炎三年先駐蹕神霄宮紹興三年以府治爲行
宮嗣是六年張浚請幸建康七年岳飛扈蹕至建康八年上復幸浙西也岳飛敗金人於龍灣韓世忠敗
金人於黃天蕩則皆在建炎四年

花發南唐禁苑紅趙家曾此作行宮空令部曲歸張浚（建康張氏部曲所在）誰遣
行營付杜充白塔梵鐘秋樹外金山戰鼓夕陽中岳韓辛苦龍爭地卻向西冷賦玉
驄

土門岡弔楊忠襄公

公名邦又建康通判金人入寇陷建康留守杜允迎附公不屈金人剖腹取其心土門岡在聚寶山梅嶺南公墓在焉

翠華遠向臨安去鐵騎翻從建業來大帥已甘囚首縛孤忠竟受剖心哀蒼茫雲樹環遺墓慘澹風煙護將臺閒向土門岡上望精靈應共怒潮回

龍灣是宋岳忠武王破金人處

岳飛字鵬舉相州湯陰人家貧力學未冠能挽弓三百斤弩八石先隸宗留守澤澤授以陣圖公曰陣而後戰兵法之常運用之妙在乎一心澤深奇之建炎元年上書劾汪伯彥黃潛善奪職歸詣河北說招討使張所奇其論令從王彥渡河破金人於新鄉復歸宗澤二年澤卒於軍杜充代之金兵至充以建康迎降兀朮趨杭州公要擊於廣德六戰皆捷兀朮奔淮西遂復建康平羣盜李成張用孔彥舟於江淮湖湘平曹成於嶺表高宗手書精忠岳飛四字製旗以賜移屯鄂州八日破楊么紹興六年進屯襄陽連戰皆捷復蔡州敗劉豫於唐州奏進取中原入朝帝謂之曰中興之事一以委卿進止機宜朕不中制會秦檜主和議忌之又因論置帥與張浚忤乞解兵柄終母喪服步歸廬山帝累詔趣還鄧瓊以淮西畔降金害呂祉飛請討瓊不許詔駐江州爲淮浙援八年乞增兵不許九年在鄂州上書言和議不便檜益怒十年授少保河南北諸路招討使敗金人於京西所遣他將皆捷中原大震收復郡縣又敗之於鄆城破其拐子馬又敗之臨穎又敗之垣曲又敗之沁水又敗之朱仙鎮距汴京四十五里修治陵寢招結兩河豪傑

盡破相開德澤潞晉絳汾隰之境皆期日興兵與官軍會所揭旗以岳爲號自燕以南金號令不行兀朮欲簽軍以抗飛河北無一人從者金將軍韓常以五萬騎內附龍虎大王下恠查千戶高勇之屬皆密受飛旗榜飛大喜語其下曰直抵黃龍府與諸公痛飲耳方指日渡河檜欲盡淮以北棄之知飛志銳不可回先請張俊楊沂中等歸一日發十二金牌召之飛憤惋泣下留五日以待遷者從而南者如市奏以漢上六郡閒田處之既歸請解兵柄不許十一年兀朮逼廬州帝命飛救之兵至而遁兀朮破濠飛至又遁時和議已決飛以恢復爲己任力陳和議之非表有云唾手燕雲終欲復仇而報國誓心天地尙令稽首以稱藩檜益怒矯詔下公大理獄命何鑄鞠之裂裳以背示鑄有盡忠報國四大字坐繫兩月無可證復使万侯嵩羅織成獄遂遇害籍家資徙家嶺南天下冤之幕屬于鵬等坐者六人言飛無罪者李若樸何彥猷薛仁輔于儂先後劾去或竄死布衣劉允升上書訟冤下棘寺以死洪皓在金國中以礪書馳奏言金人所畏服惟飛至以父呼之諸會聞其死酌酒相賀史臣曰西漢而下若韓彭絳灌之爲將代不乏人求其文武全器仁智並施如宋岳飛者一代豈多見哉明張溥曰蜀漢之諸葛亮唐之郭子儀宋之岳飛三人皆間世一出者也淳熙六年追贈鄂王諡忠武志云建炎四年金人焚掠建康欲自靖安渡宣化而去飛設伏牛首山敗之於靖安兀朮次龍灣飛敗之於新城

敵騎南來蹴建康鄂王威望勝蘄王龍灣戰勝金師走也抵黃龍醉一場

黃天蕩詠韓蘄王破金師事

岳飛既破兀朮於龍灣韓世忠復扼之於黃天蕩或敎之於冶城西南鑿大渠十餘里接江口出世忠之上世忠尾擊敗之按黃天蕩南對龍潭則龍灣或卽龍潭耶

黃天蕩走江流疾橫江旌旆樓船出中興名將韓蘄王南渡以來功第一中原復地還兩宮指顧直欲吞黃龍豈知老鶴夜偷渡恢復竟敗垂成功君不見兀朮南侵驅萬馬岳侯破敵新城下誰家部曲駐建康昏夜鑿河無覺者行殿臨安草木春趙家遺事黯風塵西湖花發人如玉憶爾親提戰鼓人（黃天蕩之戰世忠妻梁氏親提桴鼓）

南軒先生祠

南軒張先生栻字敬夫丞相魏公浚子也魏公奇愛之自幼所教莫非仁義忠孝之道長師胡宏告以孔門論仁親切之旨退而思之益自奮厲以古聖賢自期作希顏錄手寫成編用以自警孝宗始受內禪金人方大舉入寇召赴行在卽進言曰陛下上念宗社之仇讎下憫生民之塗炭惕然於中而思有以振之臣謂此心之發卽天理也願益加省察而稽古親賢以自輔則今日之功可以立成帝大奇之及魏公以樞密使都督江淮開府建康參佐皆極一時之選先生年最少所爲機宜文字援筆立成內贊密謀外參庶務其所綜畫浚自以爲不及朝議將遣使如金祈請陵寢士大夫有憂其無備而召兵者先生以起居郎入對曰陵寢隔絕誠臣子不忍言之至痛而或猶以爲憂者以無必勝之形故也夫必勝之形當在於早正素定之日而不在兩陣決機之時今當下哀痛之詔明復仇之義修德立政用賢養民選將練兵以內修外攘進戰退守通爲一事必治其實而不爲虛文則必勝之形隱然可見矣帝深納焉會朝命以知閣門事張說僉書樞密院事說妻吳氏皇后女弟也授舉親屬擢拜樞府朝論譁然未敢顯攻之者先生上疏切諫且詣朝堂責宰相虞允文曰宦官執政自京輔始近習執政自相公始說遂未拜而罷乾道

八年以左司員外郎兼侍講出知袁州在朝僅一年召對至六七所言皆修身務本畏天恤民斥僥倖屏讒諛故近習皆嚴憚之尋除右文殿修撰淳熙七年卒疾革猶遺疏勸帝親君子遠小人信任防一己之偏好惡公天下之理天下傳誦之帝聞嗟歎不已甯宗嘉泰八年賜諡曰宣學耆稱曰南軒先生理宗景定二年追封華陽伯先生表裏洞然勇於從義孝宗嘗臨朝而歎以仗節死義之臣難得先生對曰當於犯顏敢諫中求之朱子於南軒尤爲推服嘗言某之學乃銖積寸累而成如敬夫則大本卓然有見者也

浚開府時先生讀書保甯寺方丈小室號南軒真德秀建南軒先生祠於天禧寺後卽今報恩寺也

南軒讀書處蕭寺古長干出水蓮花淨虛中竹樹寒二銘新語錄列鎮舊軍壇莫更論心學符離戰壘殘

東南佳麗樓

舊名賞心樓宋寶祐四年馬光祖重建易今名在宋銀行街今內橋西街也

舊時原是賞心樓有客登臨紀勝游從古江南佳麗地六朝山色在樓頭
樓頭煙雨影鱗鱗一曲秦淮萬古新何處風光最佳麗六朝花月六朝人

三宿巖訪南宋右僕射虞允文題名

虞允文隆州人由進士第仕至工部尚書紹興三十年使金充賀正使金主謂之曰我行將看花洛陽允文自金還奏言金必敗盟其兵出有五道宜爲備禦越明年金主亮果大舉入寇軍臨采石誓衆渡江會允文奉命往蕪湖迎李顯忠交王權軍且犒師采石至則王權已去顯忠未來官軍三五星散解鞍束甲

坐道旁允文以爲坐待顯忠至必誤國事遂立招諸將謂之曰金帛誥命皆在此以待有功衆曰既有主請死戰允文至江見江北已築高臺對植絳繡旗中建黃屋金主踞坐其下時金兵號百萬實四十萬馬倍之我軍僅萬八千人允文乃命諸軍列大陣不動分戈船爲五其二並東西岸行一駐中流藏精兵待戰二藏小港備不測部分甫別敵已大呼數百艘截江而來直薄我軍軍小卻允文遣將時俊揮雙刀出士殊死戰以海鱸船衝敵舟皆平沉敵半死半戰日暮未退有潰卒自光州至允文授以旗鼓從山後轉出敵疑救兵大至始退以勁弓尾擊追射大敗之乃犒將士謂之曰敵今敗明必復來夜半部勒將士分綴上流別遣兵截楊林口明日金人果至因夾擊之復大戰又大敗之焚其舟三百再以捷聞金人復趣瓜洲允文與楊存中大修戰艦旣畢閱之江中命戰士踏車船中流上下三周金山回轉如飛敵持滿以待相顧駭愕不敢發金主亮遂遁去未幾亮爲其下所殺召允文對高宗謂陳俊卿曰虞允文朕之裴度也孝宗乾道元年拜參知政事並樞密院事是秋金遣完顏仲來有所議偃蹇不敬允文請斬之廷有異議不果五年拜右僕射同平章事會慶節金使烏林客天錫來賀驕甚固請上降楊問金主起廷居臣錯愕失措允文請大駕還內諭之曰大駕已興使臣明日隨班上壽虜使大慚而退八年舉梁克家自代上不聽御製詩書扇以留之允文求去益力授四川按察使卒於任三宿巖在廬龍山麓靜海寺內允文自采石戰勝歸三宿於此題名巖上

可憐南宋偏安日稱姪稱臣二百年戰勝歸來三宿去一行題字抵燕然
岳侯早死韓王老夢斷黃龍痛飲時采石磯頭雲似墨招魂有客去題詩

龍翔寺是元文宗潛邸

在王府巷今朝天宮東下巷口閃駕橋北南唐皇甫暉宅在其地亦稱皇甫巷也元史文宗本紀泰定二年命出居建康文宗天歷一年改潛邸所幸諸路名建康曰集慶改集慶潛邸爲大龍翔集慶寺以平江官田五十頃賜大龍翔集慶寺及大崇禧萬壽寺至順元年命市故瀛國公趙彞田爲大龍翔集慶寺永業按武宗二子長明宗名和世疎居漠北次文宗名圖帖睦爾先後居建康江陵泰定帝以支庶繼統既崩於上都文宗從燕帖木兒之謀襲帝位又迎明宗於漠北已爲太子明宗次旺忽察都文宗入見明宗暴崩文宗復襲位蓋兄弟之變史有所諱不敢質言之也夫父子兄弟國之紀也元代版圖式廓而倫紀蕩然宜其土崩瓦解一蹶不可復振歟

江南舊是分符地漠北虛勞奉璽迎鳳籙終看膺寶位

至順二年司徒香山言陶宏景胡笳曲有負展飛天歷終是甲辰君語爲

文宗受命之符請宣付史館

龍翔先已錫嘉名青宮肇麟唐貞觀金匱寒盟宋太平自古陰謀關骨

肉江山懷古不勝情

衛國忠蕭公廟弔元殉難江南行臺御史大夫福壽

元順帝至正十六年太平兵取集慶路御史大夫福壽坐鳳凰臺下督兵拒戰百司奔潰左右或勸之去叱曰吾爲重臣城存則存城破則死向安往哉遂死於兵祠舊在城南土門岡洪武中改建於欽天山陽至貢院乃永樂中錦衣衛指揮紀綱宅坐不法誅闔門受殲亦有生瘞其下者至今鄉試時舉子入院輒有聲自地中起歷諸號而止明旒顯卿奇聞類記庚巳編所載甚明新志以綱爲元忠臣行省丞相抗禦

明師兵敗全家被戮葬處與御史大夫福壽同時殉節事無所本鄂書燕說不足據也

一代興亡日封疆最可哀敵軍天塹渡殘卒板橋回慷慨明臣節艱難惜將才當年
有祠廟長傍鳳凰臺

翰文書店木版新印

金陵歷代名勝志 卷五

攷金陵歷代勝蹟書

可園文存詩詞 江甯陳作霖著

八本

白門新柳記 海陽許養和

二本

金陵通紀通傳 江甯陳作霖著

十二本

金陵瑣志七種 江甯陳作霖著

五本

金陵炳燭里談 江甯陳作霖著

一本

建康實錄 江甯甘熙著

六本

白下瑣言 江甯甘熙著

四本

上江兩縣志 同治年修

十二本

南京朱雀路四象橋

金陵歷代名勝志卷六（又名秣陵集）

朝天宮

錢塘 陳文述 退菴

在府城西卽古冶城遺址劉宋建國學於此楊吳時建紫極宮改天慶觀元改元妙觀文昇爲永壽宮明洪武中重建賜今額殿後有萬歲亭凡大朝賀於此習儀舊唐書開元二十九年正月制兩京諸州各置玄元皇帝廟天寶二年二月改西京玄元廟爲太清宮東京爲太微宮天下諸郡爲紫極宮

風雲濛濛起真人集慶開基海宇春一統輿圖元版籍百年禮樂漢君臣呼來萬歲神靈語揚到千官舞蹈塵

聖代蕃釐邁前古年年

天壽祝華紳

觀象臺

在雞鳴山上臺西卽北極閣元至正元年建明改爲欽天臺儀器今在北京欽天監署

銅壺沒地黍離哀北極宮庭訪古臺偶讀周髀三代遠記窺儀器上都回借根方法
中原去推步疇人西極來自有立天元一在測圓誰是不凡才
今推步用西土借根方法
卽元人立天元一法見元

李冶測圓海鏡其法至 國朝梅鼎祚始明余師真州阮伯元尙書精於此學視學兩浙以此取士曾屬吳縣李銳校勘梓行嘉慶己未拜兼理 欽天監之命

天界寺是明初修元史處

在城南鳳臺山距聚寶門二里洪武初移元龍翔集慶寺於此更名天界寺徵高僧宗泐主之詔高啓等十六人於此修元史啓詩萬履隨鐘集千燈入鏡流可想見其盛矣明祖以馬士取天下本不知書而好談制作元史總裁宋濂王禕皆一代名儒纂修諸人亦均有學識使得從容討論未必不與遷固並美而勒限緊促六月而成致繁蕪重復難稱良史洪武正韻出自獨斷不師古韻當時且罕有違行之者貽譏後世復何足怪皆明祖不學威脅羣下之過也

未曾偃武已修文章草簪毫集縉紳千載華裔徵信史一時班馬命儒臣偶來萬履隨鐘地惜爾三長秉筆人何事深宮偏遠慮忌才更比愛才真

明祖忌才甚於漢高漢高忌武臣之威權過重者明

祖則兼忌文臣宋濂劉基均不得其死魏觀賢者高啓亦修史舊臣偶以文字小過置之極刑不僅楊基袁凱諸人矣永樂之殺戮忠臣不少降意皆明祖有以啓之

盧龍山閱江樓

志云盧龍觀在盧龍山明高帝尅陳友諒親樹旌麾督戰於此嘗欲建閱江樓不果按閱江樓宋濂作記王伯安有詩不果之說似未可信

盧龍山上閱江樓舊是高皇翠輦游曾爲平戎親戰伐更因破敵樹旌旆盪胸雲擁三山壯放眼風高萬里秋五百年來人事改長江依舊接天流

明太祖孝陵

在鍾山陽獨龍阜舊靈谷寺基與馬皇后合葬懿文太子祔於左嘉靖十年更名鍾山爲神烈山

國朝定鼎設立守陵監二員陵戶四十名撥給司香田地乾隆十六年裁守陵司香太監留陵戶按靈谷寺梁天監十三年爲誌公建塔於鍾山玩珠峯前名開善精舍後爲開善寺宋改名太平興國寺後名蔣山寺明初改寺於舊基之東五里而舊基遂爲孝陵南朝七十寺半在禁垣今則盡屬荒煙蔓草矣

泗陵沉沒鳳陵荒此地明樓傍夕陽金粟銘功無石馬醴泉陪葬有名王六師威略清沙漠一統規模接漢唐自是真人出天授空同雲氣說軒皇

亭亭紫氣滂朝霞來訪留都賦夢華秦代已傳天子氣吳都原是帝王家六朝花月無孤塚萬樹松楸有暮鴉太息長陵一坏土野人相約種秋瓜

冠古雄圖此宅京千秋餘恨亦難平一篇黃鳥朝天戶宮女殉死者其父兄加錦衣千戶名朝天女戶百戰金川

靖難天破帽殘衫空有淚玉魚金盃豈無情巍巍御製穹碑在聖德神功有盛名月輪東上夜啼烏江水西來卽鼎湖蔣帝青山秋雨暗誌公靈谷暮雲孤薦新曾遣中璫奉帶劍應無小吏趨聞道時巡親致饗

興朝優禮古來無

孝陵長生鹿銀牌歌

鐘山舊少林樹是以東晉有刺史栽松之令孝陵之建有松十萬株長生鹿千今則林木僅有存者鹿亦

杳不可見陵戶間有收得銀牌者耳

孝陵雲黯萬株松葉葉冰霜樹樹龍更遺奚官豢仙鹿芝田瑤草護春茸劫火灰飛陵上土松旣爲薪鹿作脯銀牌不逐玉魚沉流落人間泣風雨翠華玉輦侍昭儀正是銀牌初鑄時一自金棺遺寶誌鼎湖雲氣鬱參差秣陵王氣消沉易滄桑花月傷心事鹿走中原楚漢爭銀牌猶勒長生字原廟衣冠幸未殘玉龜飛盡掖松寒

孝陵之建

掘地得玉龜十其九飛去僅存其一

唐陵漢寢知何限銀雁金鳧一例看

懿文太子陵

太子名標太祖長子母高皇后元至正十五年生於太平陳迪家太祖爲吳王立爲世子從宋濂受經洪武元年立爲皇太子先是以應天開封爲南北京臨濠爲中都御史胡子祺上書以天下形勝莫如關中帝善之二十四年敕太子巡撫陝西比還獻陝西地圖遂病病中上言經略建都事明年四月丙子薨八月庚申祔葬孝陵東諭曰懿文太子建文元年追尊爲孝康皇帝廟號興宗燕王卽位復稱懿文皇太子帝性猜忌果於殺戮太子屢以爲言帝嘗欲殺宋濂太子請免不得投水幾斃以高后茹齋諷諫始宥濂又因燕王譖欲誅藍玉請免不得固請帝怒曰待汝爲君自有之太子驚悸發疾踣於御前遂不起蓋天性性仁暴異也

當年名德重青宮頗與昭明器宇同華望久應敷海內遷都惜未定關中犯顏力救
儒臣禍失意空嗟大將功鶴駕定隨龍馭杳夕陽雲樹孝陵東

朝天女感孝陵殉葬宮人事

初太祖崩宮人多從死者建文永樂時相繼優卹若張鳳李衡趙福張璧汪賓諸家皆自錦衣衛所試百戶散騎帶刀舍人進千百戶帶俸世襲人謂之朝天女戶歷成仁宣三朝亦皆用殉景帝以郕王薨猶用其制蓋當時王府皆然至英宗遺詔始罷之夫宮人殉葬暴秦之制明祖以開基之主且平日以始皇爲戒乃身後貽此秕政豈非輕戮餘威流及宮禁耶英宗復辟惟此事及釋建庶人爲善政之大者

墓門未可比長門燈暗魚膏白日昏銅輦幾曾甘曉夢玉鈞何處弔芳魂青山陰隧
悲埋豔白露園林泣奉恩太息嬴秦留舊事泉臺終古此銜冤

閹妃怨

陸次雲北墅瑣言有書明潭王事一篇云潭王名梓其次爲明祖第八子其實陳友諒之遺腹子也友諒妻閹氏方懷娠而友諒殂太祖曰我自起兵來未嘗納人子女今友諒三犯金陵四犯太平心甚恨之沒其妻閹氏入宮掖未幾生梓封潭王國於長沙瀕行辭其母母曰爾安之曰將之國曰爾國何在曰在潭曰孰封爾曰封於父曰爾父何在而封爾乎梓訝曰母言何異甯有說乎閹氏泣語之曰明帝爾仇非爾父爾父漢王陳友諒也吾故漢妃漢王殂分宜從死而尙食息於此者爲爾故也爾其毋忘復仇之志梓飲泣受命去後入朝故事諸王來朝者止宮中梓在宮不自檢明祖怒梓歸國遂舉兵反明祖遣徐達子以討之梓大書銅牌擲城外云甯見閹王不見賊王自知兵力不敵舉火焚宮抱其子繞城疾走投隍塹下死明祖深恨閹氏借言妖宿亂宮盡殲宮眷嘗考明祖雖恨友諒其待陳氏甚厚封友諒子理爲歸德侯友諒父普才爲奉恩侯其弟兄皆錫爵何獨沒入閹氏意者悅其豔美託言有所恨而然歟明史不書

諱也

舊家章華臺故國瀟湘渚回首望巫山美人渺何許
夜月深宮怨東風故苑春艱難惟一死豈獨息夫人

破蜀留花蕊平陳乞麗華莫將羸呂局宮羽換琵琶

當日潭王事深宮夜月幽如何花影句移禍到青邱

夜靜鐘鳴遠山空落葉涼南朝遺事在愁煞豫章王

梁武帝第三子綜封豫章王吳淑媛所生本東昏妃入梁宮七月而生實爲東昏遺嗣有聽鐘鳴悲落葉諸作後入北魏見南史本傳與潭王事絕相類也

漢府

明洪武初封陳友諒子理爲漢王建府西華門外後徙高麗永樂封高煦爲漢王居之後爲織局在今駐防城

吳楚爭雄日江山百戰場中原已眞主軹道有降王冠履趨中禁烽煙靖武昌如何
勞遠慮平壤更投荒

舊內

在東錦繡坊東南宋建康府治元南臺遺址明祖下集慶路以此爲吳王府洪武元年移建大內遂改爲舊王府今爲菜圃承恩寺在其右卽灑掃宮監王瑾故宮也

開國規模往事空兔葵燕麥動春風荒原長徧瓢兒菜寂寞無人弔故宮

海內羣雄角力時，煙雲過眼亦堪悲。吳門花月同蕭瑟，一樣張王舊府基。

吳門王府基張士誠故居

也

曾與中山作賜園，功臣容易保君恩。英雄從古多猜忌，烏榜高題舊內門。

明祖初建新宮以舊內賜

徐達既而悔之

寒蟹咽月碎秋墜，往事滄桑百感增。何似中官遺宅在，內家香火傍禪燈。

訪十六樓遺址

明初建妓樓十六，曰南市，曰北市，在城西內，曰來賓，曰重譯，在南門外，曰集賢，曰樂民，在南門瓦屑壩，曰輕烟，曰澹粉，在西關東街，曰醉仙，在西關南街，曰柳翠，曰梅妍，曰鶴鳴，在西關北街，曰石城，曰謳歌，在石頭門外，曰清江，曰鼓腹，在清江門外，爲游人憩息之所，並以處官妓焉。永樂中，晏振之金陵，春夕詩有花月春風十四樓句，則南市北市不在此數也。後皆廢。惟南市樓在陡門橋東北。國初猶存。康熙中，太守陳鵬年拆毀，改建講堂。夫明祖一代英主，開國之初，正宜培養廉恥，以正人心，乃作法於涼，導淫傷化，致靖難兵下，忠臣妻女辱甚，挐戮誰之咎也？諸臣惕於兇威，不能引君當道，責以大義，均不能辭其咎矣。

三百餘年逝水流，惟留南市舊名樓。輕煙澹粉銷沉盡，何處春風十四樓。
六朝佳麗柳垂絲，一角青溪照畫眉。開國規模太涼薄，浣衣局與教坊司。

舊院篇

舊院遺址在東花園之右，一河爲界，建長板以通行，人後橋廢，築石壩，名曰石壩園，亦曰石壩街，今與東

園皆成菜圃土人猶稱東花園明初爲曲中女郎所居統於教坊司街東南有樂王廟後人誤爲藥王廟也

青溪明月秣陵花幾處春山葬麗華小玉舊居迷鄭曲莫愁廢巷說盧家盧家鄭曲紛相向紅闌水榭秦淮上舞袖都翻北里嬌明璫尙學南都樣舞袖明璫舊有名家家玉貌擅傾城楚王臺上宮腰細隋帝舟中殿脚輕雨中秋草生紅淚棲鴉流水傷心地過客閒尋廢苑基行人解說前朝事前朝淮南朝龍飛六合爲家四海歸已築華林環帝囿更羅粉黛豔皇畿燕藩當日師南下猜嫌亦是高皇亞忠臣妻女教坊司千秋讀史心悲詫頓脫諸家舊姓存當年原不爲清門更新日月開皇極已覺微傷天地思作法於涼成敝習鄭衛餘風播篇什三月煙花絃索悲六朝金粉嬋娟泣從此沿流五百年青衫紅粉互留連幾家碧檻移紅豆何處青泥種白蓮板橋雜記何人作滄桑心事閒情託尊前羅綺感飄零卷中詞翰傷輕薄畫舫題襟過蔣州鍾山陵樹暮雲秋故宮都種瓢兒菜惆悵春風十四樓

鍾山弔靜誠先生陳遇墓

陳遇字中行先世曹人徙居建康天姿純粹篤學博覽元末爲溫州教授己而棄官歸隱學者稱靜誠先生太祖渡江以秦從龍薦貽書聘之以伊呂諸葛爲喻至與語大悅留參密議日見親信自爲吳王及即皇帝位歷授官至禮部尙書皆不受帝嘗問保國安民之計遇對以不嗜殺人薄斂任賢復先王禮樂爲

首務計劃多祕不傳寵禮之隆勳成大臣無與比者數幸其第語必稱先生或呼爲君子十七年卒賜葬鍾山從龍字元之鎮江人太祖命徐達下鎮江訪得之命從王文正甥李文忠奉金幣聘之自迎之於龍江朝夕與處事無大小悉與之謀至正二十五年卒在太祖未卽吳王位時亦未官也

太祖求賢日吾宗有靜誠名儒重經濟王佐薄功名何點辭梁代嚴陵謝漢京青田最高潔出處遜先生

劉文成公故居

公諱基字伯溫處州青田人讀書性警悟天文兵法過目洞識其要從鄭復初聞濂洛心得其指歸元末舉進士授高安縣丞揭曼碩目爲魏徵之流行省辟爲掾史與幕官不合投劾去後爲江浙儒學副提舉建言爲臺憲所沮遂決去嘗游西湖放歌極醉西蜀趙天澤以爲諸葛武侯之流方谷珍反海上省憲舉公爲行省都事議招諭公議誅方氏兄弟而撫其黨方氏賄京省臺院罷行省官羈管公於紹興方氏遂橫行省復起公略定山寇又從石抹宜孫守處州經略使李谷鳳奏公績執政不錄乃棄官歸田里或以據地之事說公不聽明太祖定金陵遣使來聘遂詣金陵上時務一十八策陳天命所在從平陳友諒張士誠諸大敵事多前知因以決勝開國勳業密勿參贊爲多拜御史臺中丞封誠意伯洪武四年賜歸老鄉里上嘗手書問天象事公悉條答大意以霜雪之後必有陽春國威已立宜濟以寬書奏付史館甌括閒有隙地曰談洋奸民所虐民受其害公請設巡檢司抗拒不服官不以聞公使子璉赴京奏其事不先白中書省胡惟庸挾舊忿以談洋有王氣公求爲墓地不得立建司之策致釀亂爲成案陷公上不問公入朝引咎爲胡惟庸所藥放歸卒於家正德中追諡文成公生平剛毅慷慨有大節以天下安危生民休戚爲己任明祖常稱之爲老先生而不名又曰吾子房也功業相似而純粹過之所爲詩文亦足冠有明

一代或疑爲惟庸所藥爲不智不知明祖猜忌功臣甚於漢高舊德若宋景濂尙欲因事誅之況文成智計出諸臣上其未能一日忘情可知文成久窺其隱服之不疑藉以得保首領亦蕭望之使朱游和藥意也兒子裴之持論如此頗能道文成心事文成初偕宋濂葉琛章溢至金陵居孔夫子學有玉兔泉銘泉在今儒學二門內志乘不載所居或金陵日久未攜眷屬別未卜居耶

高皇英武剗羣雄賴有青田佐命功出處定知伊尹合權謀原與子房同郁離文字留天壤猜忌君臣竟始終玉兔泉邊勒銘在名儒居合傍巒宮

禮賢館弔宋文憲公濂

濂字景濂金華潛溪人遷居浦江英敏強記元至正中授翰林編修辭不就入龍門山著書太祖定婺州以薦與劉基諸人徵至金陵建禮賢館居之事高祖十九年敷陳納誨皆以內聖外王之道太祖嘗曰朕聞太上爲聖其次爲賢其次爲君子宋濂事朕十九年未嘗有一言之僞誚一人之短始終無二非止君子抑可謂賢矣國家有大典章大著作皆委濂爲開國文臣之首外國使臣敬問起居並購文集四方學者稱太史公不以姓氏洊至學士承旨知制誥致仕以長孫慎坐胡惟庸黨欲誅之賴皇后太子力救乃安置茂州次年卒葬於蜀子璉孫慎坐惟庸黨死正德中追諡文憲夫濂之品學高祖知之稔矣其不爲惟庸黨亦可信矣因後人疑似之罪輒欲加元輔以大戮雖以中宮茹齋儲貳墮水猶令竄謫以死不少寬假考之列朝開國諸臣之不幸未有如明者太祖真少恩哉禮賢館志乘不載考劉基文集初至同居孔夫子學後高祖於所居之西建禮賢館則當在今學官西也

典策高文徧海隅新朝冠冕此名儒禮同漢代徵園綺望比唐初重褚虞一德嘉謨

天下望兩宮優禮古今無如何黨禍貽鈞距埋骨華陽墓草枯

天界寺弔王忠文公禕並題遺集

禕字子充義烏人帥柳貫黃縉以文章名世觀元政衰爲書上時宰隱青巖山太祖取婺州召見用爲中書省掾且曰江南有二儒禕與宋濂學問之博禕不如濂才思之雄濂不如禕創禮賢館居之洪武二年修元史命禕與濂爲總裁五年奉詔招諭雲南梁王欲從會元遣脫脫徵餉酋王必欲殺禕禕不爲屈遂遇害梁王遣使致祭具依冠斂之建文中諡文節正統中改諡忠文人化中建祠祀之天界寺爲諸臣修元史處則忠文當有遺跡也洪武八年再遣湖南行省參政吳雲往以大將軍塞外所獲鏡知院輩二十餘人同行鏡知院等自以奉使被執罪應死謀誘雲詐爲元使改制書給梁王雲不從遂爲所害梁王聞其事收雲骨送蜀給孤寺殯之後馳傳返葬弘治中贈刑部尙書天明祖以兵取天下滇遠在南服梁王爲元宗室且與漠北騎驛相通元主雖遜荒尙倚以謀中國則非口舌所能動也明矣禕之使也旣不以重兵隨其後禕之被害也又不卽興問罪之師事閱數年又使吳雲仍蹈覆轍且使被獲二十餘人悉數偕行豈不料衆寡之不敵必爲所魚肉哉殆其時方馳逐中原不暇兼顧姑委一二人嘗試以餒之以厚其毒而怒我師耶爲忠文者告無媿矣雲先仕元晚蓋亦足多焉

昆池天遠路難通詔遣儒臣出紫宮蘇武幾能歸漠北張彌何事使遼東羈魂金馬
山川外遺跡青蓮梵唄中百戰勤勞終底定南征誰紀穎川功

鍾山里訪高青邱故居

高啓字季迪長洲人少孤力學有文武才居北郭與張羽徐賁諸人以詩文相砥礪號北郭十友又與楊

基及羽賁稱吳中四傑張上誠據吳屢以禮招之策其必敗堅不往挈家依婦翁於吳淞江之青邱因號青邱洪武初徵修元史授翰林院國史編修擢戶部侍郎以孤遠辭乞還鄉里復還青邱魏觀守蘇州與有舊爲徙居城中夏侯里觀以張士誠據府舊治爲宮今治湫隘按故阨徒之指揮某與觀有隙爲蜚語上聞使御史張度覘之儉人也誣觀與旣滅之基有異圖遂被誅季迪常爲觀撰上梁文度日以黨併逮至宗論死明祖起自式徵甫得金陵卽以網羅文士爲事初極矜寵其後任意誅戮不必有罪季迪之事至爲失刑推其忌才之故或徵時曾爲儒生所辱故銜之刺骨遇觸卽發耶季迪詩豪健秀逸衆長畢臻三百年中無與抗手歸愚盛推何李苛論青邱皮相目論不足爲憑集中有自天界寺移寓鍾山里詩當是修史告竣入內府教功臣子弟時卜居也

不仕張吳不仕元十年高節隱邱樊論詩早歲曾開社修史歸來祇閉門龍臥竟同
中散忌燕泥誰省道衡窻西庵孫賁字西庵以爲藍玉題畫連及坐死海叟袁凱字太祖欲誅之伴狂以免俱摧抑開國規模
最少恩

張太尉墓

張士誠小字九四泰州白駒場亭人有弟三人並以操舟運鹽爲業因元政亂同李伯昇等十八人起事據高郵自爲誠王元丞相脫脫總大軍討之圍高郵幾破順帝信讒解脫脫兵柄易以他將士誠乘間擊奮復振遂由通州入常熟陷平江并陷湖州松江及常州諸路是歲明太祖亦下集慶貽書遣楊憲通好不報與明接境兵數交屢敗弟士德爲明所擒問道貽士誠書俾降元士誠遂決計降元江浙右丞相達識貼睦邇爲言於朝授士誠太尉官其將吏有差遣使徵糧賜之龍衣御酒士誠自海道輸糧十一萬石

歲以爲常既自立爲吳王所據南抵紹興北踰徐州達於濟甯之金溝西距汝穎濠泗東薄海二千餘里陳友諒遣使約夾攻太祖而士誠欲守境觀變許使者卒不行明太祖既平陳友諒旋師伐吳列郡皆下諸將死降相繼明師攻平江築長圍困之太祖貽書招之竟不降城破被執至金陵自縊死方城之將也士誠妻劉夫人驅羣妾登齊雲樓積薪自焚死有二幼子匿民間不知所終相傳有金姬者姓李氏幼育于誠母太妃宮中通陰陽壬遁之學士誠之降元也決於姬陳友諒之期夾攻也姬勸某日出師士誠就晏安不從其言故無功姬有殊色士誠欲納之遂前期坐化於佛前士誠二幼子從姬母育於民間遂改姓李亦從姬言蓋奇女子也姬墓在蘇州閶門外八里管家濱相傳爲金姬墩或訛爲金雞云士誠墓在瓦廊北鎮以小白塔門外有鐵鑪人稱大香爐夫士誠與明祖乘元政之衰先後起事勢力不敵終爲俘虜謂明祖曰天日照爾不照我此言誠然非才之不敵運之不敵也因念古來羣雄競起妄冀天命略地爭城生靈塗炭終歸漸滅者不可勝計保境息民以待真主若竇融於漢汪華於唐錢鏐於宋者斯爲賢矣竇氏代遠不可知汪氏錢氏越今千載子孫蕃衍軒冕代興天道好生人心福善至理固不易也

皇覺真人唱大風魚鹽先後起南東也思江表同孫策未肯河西學竇融滄海烟波無故壘吳門花月有遺宮

吳門王府基卽士誠舊宮也

一坏曾葬田橫骨不作王降作鬼雄

東邱郡侯花雲墓

花雲懷遠人明初守太平陳友諒入寇城陷死之妻郜氏亦赴水死侍兒孫氏瘞郜氏抱兒煒匿水中七日不死遇老父雷老偕行達金陵高帝置兒於膝曰此將種也授左衛指揮洪武七年至太平奉母郜夫人喪歸金陵束草像父加以衣冠台葬於此宋濂爲墓碑高啓有花雲兒詩李東陽有花將軍詩墓在上

元縣南五十里水橋

龍興艱百戰猛將有花卿大節全夫婦危城共死生遺孤留趙武弱女有程嬰一代金華筆高文表賜塋

越國武莊公胡大海墓

大海字通甫從太祖起滁陽破甯國拔徽州克建德取婺州下諸暨定處州克廣信鎮金華爲降人蔣英劉震李福所害追封越國公諡武莊肖像功臣廟配享太廟大海善用兵每自誦曰吾武人不知書惟知三事不殺人不掠婦女不焚廬舍而已以是軍行遠近爭先附及死聞者無不流涕所至輒訪求豪雋劉某宋濂葉琛章溢所稱金華四先生其所薦也設天假之年建立當不在中山下功業未半而中道告殂惜哉墓在江甯城十五里

開國人才貴將軍首薦賢伊周王佐出英衛戰功偏來歛抽刀日岑彭應讖年神靈趨石馬來往孝陵前

功臣廟

在雞鳴山洪武二年建祠祀徐達以下二十一人

國朝

高宗純皇帝南巡賜徐達額曰元勛偉略賜常遇春額曰勇動風雲廟久廢附祀宋曹武惠王廟明初功臣六王最著各繫以詩

十廟雞鳴麓功臣有舊祠雲臺畫冠履月窟識旌旗馮傅崇勛失胡藍往事悲惟應
曹武惠綸綉共丹墀

中山武甯王徐達

徐達字天德濠人始從太祖以二十四人略定遠守集慶却陳友諒下平江獲張士誠北取中原走元順
帝克秦州降李思齊擣定西破擴廓獲名王國公平章以下文武僚屬千八百六十餘人將士八萬四千
五百餘人大小數百戰平大都二省會三郡邑百數成太祖一統之業自淮興翼統軍元帥洊至征虜大
將軍太傅中書右丞相封魏國公追封中山王諡武甯贈三世皆王爵賜葬鍾山之陰配享太廟肖像功
臣廟位皆第一達言簡慮精在軍令出不二諸將奉持凜凜而帝前恭謹如不能言善拊循與下同甘苦
所向克捷民不苦兵歸朝之日單車就舍延禮儒生談議終日雍雍如也賜以舊邸不敢居乃飭有司卽
舊邸前治甲第表其坊曰大功帝嘗稱之曰受命而出成功而旋不矜不伐婦女無所愛財寶無所取中
正無疵昭明乎日月大將軍一人而已

香軍競起元運畢龍飛淮甸真人出開國佐命徐武寧百戰功成名第一滁陽一旅
明所基惟王翊運左右之二十四人略定遠指揮早握天王旗闢地東南先楚漢仗
鉞桓桓期戡亂龍江禡牙命北征謀出萬全操勝算御軍持重不殺降西北底定銷
戈鏃昭明日月帝心簡如大將軍真無雙元主中原凡幾帝北走和林識天意不事
窮追大體存山海關前合祠祭更番變伐登軍壇軍中稟命心敢專不從中制下手

詔君臣一德知殊難將相功名滿中外軼事流傳盡堪愛不斬德濟心則仁不問惟庸度尤大惟王功大報亦崇前封三王後兩公太廟配食立廟祀丈夫遭際開心胸錫以彤弓兼世券布衣兄弟眞恩眷如王猶足保功名不信當年死御膳長身高顙誰寫眞秉圭服冕如有神元勳名世美史冊丹青應勝圖麒麟

開平忠武王常遇春

常遇春字伯仁懷遠人貌奇偉勇力絕人太祖渡江拔采石功第一開國之功與中山埒封鄂國公拜副將軍與大將軍達帥兵北征帝親諭曰當百萬衆摧鋒陷堅莫如副將軍不慮不能戰慮輕戰耳出塞拔開平追兀帝至柳河川卒追封開平王諡忠武賜葬鍾山原遇春沉鷺果敢善撫士卒摧鋒陷陣未嘗敗北雖不習書史用兵輒與古合長於大將軍二歲數從征伐聽約束奉命惟謹一時名將稱徐常云史臣贊曰明太祖奮自滌陽戡定四方雖曰天授蓋二王之力多焉中山持重有謀功高不伐自古世之佐無以過之開平摧鋒陷陣所向必克智勇不在中山下而公忠謙遜善持其功名允爲元勳之冠身依日月剖符錫土若二王者可謂極盛矣願中山賞延後裔世叨榮寵而開平天不假年子孫亦復衰替貴匹勳齊而食報或爽其故何也太祖嘗語諸將曰爲將不妄殺人豈惟國家之利爾子孫實受其福信哉可爲爲將帥者鑑矣

擁盾神人夢中語和陽仗劍歸眞主橫行十萬常將軍桓桓虎臣作心齊高皇定鼎先江南羣雄倡亂天戈戡采石磯頭功第一奇功如此眞奇男沔陽漁子紅巾起樓船赤壓鄱湖水溯江西上一戰平康郎山高功莫比楚漢底定爭中原二十萬衆身

當先不慮不戰慮輕戰諄諄天語軍門宣叱咤咽驕萬馬大敵崩摧堅壁下轉戰從無敗北時盛名豈在中山亞河西夜襲戰血紅孱騎十八走大同不信敗軍王保保敢與名將爭英雄全甯錦州出砂磧將帥平章盡俘獲千騎八伏拔開平威聲遠被和林北百戰成功奏凱旋將星夜隕柳河川後來婦弟成奸黨猶幸功臣不永年如王生死哀榮備醜龍江咨故事煌煌御筆勒穹碑鍾山賜葬通州祭國步艱難愴甲申功臣子姓半沉淪流離猶勝徐公子白首王孫種菜人

岐陽武靖王李文忠

李文忠字思本盱眙人太祖姊子太祖撫爲己子敗元軍破張士誠平浙閩皆有功洪武二年代常遇春爲副將軍出塞者七獲元順帝孫及后妃宮主諸王將相數萬人及宋元玉璽金寶玉冊鎮圭降數萬衆獻捷京師帝御奉天門受朝賀大封功臣文忠功最封曹國公掌大都督府兼領國子監事文忠器量沉宏人莫測其際臨陣踴厲風發遇大敵益壯頗好學問常師事金華范祖韓胡翰通曉經義爲詩歌雄駿可觀常請減應天民田租額勸帝少誅僂諫征日本言宦者過盛積忤旨不免譴責卒追封岐陽王諡武靖配享太廟肖像功臣廟位在第三葬鍾山

高后之子高皇甥盱眙舍人早有聲讀書穎敏戰驍果青陽石埭馳威名愛民慈惠治軍肅兩浙經營八閩服女樂不許降將迎棄兒恆令軍中育將軍勛勞在北征武略不數常開平急救大同次馬邑出塞代將開平兵駱駝山高亂峯直臚胸水落河

流黑捕魚兒海元所都茫茫一氣居庸北兼程精騎趨應昌獲其妃主諸王侯奉天獻捷大朝賀金寶玉璽生輝光椎牛饗士鼓忠義塞外幾番經死地馬中流矢人短兵如此功名良不易御衣名馬位上公錫以世券頒彤弓敦詩說禮若儒者號令頗有前賢風應天田租請得減諫征日本言尤敢得疾知由譴責深通侯枉爲諸醫貶後嗣金川馬首降岐陽功業自無雙中山亦有徐增壽紈袴何勞笑九江

寧河武順王鄧愈

愈虹人繼父兄領軍事年甫十六戰必先登陷陣軍中咸服其勇太祖起滁陽愈自盱眙來歸從渡江下集慶取鎮江皆有功與朱文正守撫州陳友諒衆六十萬來攻樓船高與城等乘漲直抵城下圍數百重愈分守撫州門當衝要友諒親督衆來攻城壞且三十餘丈愈且築且戰晝夜不解甲者三月太祖自將來援圍始解論功與克敵同徇江西取吉安克贛州進江西行省右丞時年二十八兵興諸將早貴未有如愈與李文忠者爲人簡重慎密不憚危險將軍嚴善撫降附常遇春克襄陽以愈爲湖廣行省平章地鄰擴廓拊循招徠威惠盛著從大將軍出定西走擴廓進克河州招諭吐蕃諸酋長皆納印朶甘烏斯藏諸部悉歸附封衛國公征諸蠻克四十八洞征吐番川藏窮追至崑崙歸還道卒追封甯河王諡武順

菩薩線落羣雄起父兄轉戰俱前死坐擁餘衆據濠領軍年始十六耳一旅早向滁陽歸渡江以後功益奇破長槍帥克完者手提天戈伸天威洪都地險逼僞漢強寇如雲六十萬樓船百道高於城辛苦艱難支百戰撫州門近當其衝激勸忠義氣

倍雄死守三月不解甲全城功與克敵同軍中號令嚴且明撫降戮逆民不驚襄陽作鎮璽書賜國家賴爾如長城分兵定西啓戎幕車道峴高勢嶮削威名不數大將軍壁壘精嚴走擴廓吐蕃望風紛投戈窮追直至西黃河練軍辰澧定蠻寨四十八洞功尤多嗚呼王之早貴同岐陽早死亦似開平常功平名既成身應亡君不見胡藍獄成宿將盡飛鳥既盡良弓藏

東甌襄武王湯和

和字鼎臣濠人與太祖同里閏從取和州諸將多太祖等夷莫肯爲下和長太祖三歲獨約束甚謹太祖悅之破張士誠降方國珍執陳友定從大將軍西征斬張良臣敗擴廓皆功封中山侯營中都宮闕鎮北平壁彰德城進信國公和沉數多智計頗有酒過及封信國猶鑄其失於券帝春秋高意不欲諸將久典兵和以間乞歸故鄉帝悅爲治第旣而倭寇上海帝患之使和往利用方國珍從子鳴謙策度地浙西東並海設衛所城五十有九浙人賴之立廟以祀晚年益爲恭慎疾篤不能興詔以安車入覲與絺里閏故舊及兵興艱難事卒年七十追封東甌王諡襄武

白鬚偉貌圭璧光老將獨數東甌湯生享富貴死壽考居然名位同徐常高皇初起軍旅寡郭家諸將肯相下奉約甚謹王最賢風塵似識眞人者金壇蘭陵境接吳維王作鎮恢雄圖敵不能窺兵不挫守城功豈寧河殊攻堅陷城遂奇志流矢中股礮傷臂終執友定降國珍萬死一生殊不易兩浙東西王所治衛所林立費不貲功在

東南合廟祀海上倭起民思之可惜生平多酒過欲右則右欲左左鑄券猶邀法網寬此事豈容騎屋坐所幸見幾乞解兵璽書褒諭賜第成安車入覲親視疾流涕爲話當年情岐陽以親王以舊豈獨勤勞獲寬宥馮傳勳高氣亦驕功臣安得如王壽

黔陽昭王靖沐英

英字文英定遠人少孤太祖與高后撫爲子征伐有功洪武十年從鄧愈討吐蕃西略川藏耀兵崑崙封西平侯明年拜征西將軍討西蕃拓地數千里十三年出塞略亦集乃路獲其全部明年從大將軍北征克全寧四部尋同藍玉從傅友德取雲南梁王走死拔大理收諸蠻設官立衛留鎮滇中思倫發叛誘羣蠻驅象入寇衆三十萬力戰平之諸蠻震懾南中悉定諸番重譯入貢帝曰使我高枕無南顧憂者汝英也卒追封黔甯王諡昭靖歸葬京師侑享太廟英沉毅寡言笑好禮賢士居常讀書不釋卷拊士卒有恩在滇百務具舉墾田至百萬餘畝浚滇池通鹽井定貢稅均力役疎節目民以便安子孫世鎮黔勳名與明相終始

功臣廟祀雞鳴麓前榮肖像名王六列坐徐常李鄧湯英雄吾愛黔陽沐高王養子二十餘惟王功業與衆殊帳前十八作都尉少年早握親軍符定鼎以後功尤大西征兵與甯河會略定川藏銘崑崙威名早被陽關外更涉流沙登賀蘭四翼夜擊當中堅和林全部受束縛臚胸水落花寒滇南秉鉞合藍傳白石江寒迷曉霧長刀斫陣銅角鳴鏃騎紛從下流渡龍首龍尾開重關大理旣拔王師班烏撒畢節立二

衛帝命留鎮威諸蠻百夷小醜思倫發百象來攻資衝突定遠一戰餘孽清從此南中息征伐重譯入貢來番酋黃金采幣功難酬帝曰汝英作屏翰高枕無復南顧憂恤兵愛民禮賢士水利農桑並經理點蒼山高洱海深王之功德無與比星夜隕天中台萬里歸葬丹旌回至性感疾出忠孝遠夷流涕軍民哀明初勳臣多多不保黨錄昭示全者少五王雖善處功名子孫末克家聲紹後嗣安得如王賢西南作鎮三百年天波人緬死不屈婦女操亦松筠堅嗚呼後嗣安得如王賢

功臣廟感麗江武靖王傅友德事

傅友德宿州人初事陳友諒不見知歸明太祖戰功茂著謹慎無過平滇平蜀功最諸將封穎國公以無罪賜死功臣之冤淮陰而後友德其最也朱一是穎國公傳後記略云洪武末胡藍二獄之後舊臣宿將惟穎公及宋公馮勝在宋公將略不及穎公心之純白亦不及穎公穎公開平後一人耳高祖必欲去之者其時春秋高皇太子孫幼不能無漢景疑亞夫之心然穎公死而少帝之長城壞矣漢高殺功臣與明祖類然猶能存周勃陳平定呂氏之亂而明祖不能存一穎公以拒靖難之師貽謀不善有天意焉宏治中晉王爲友德五世孫瑛援六王例求襲封下禮官議不許嘉靖元年雲南巡撫何孟春請立祠祀友德詔可名曰報功南渡後以給事中李清言追贈麗江王諡武靖而馮勝亦贈甯陵王諡武壯又進祀於功臣廟二七十年之缺陷至是始快人心而孚公論矣

百戰英名捲繡旗故家何處問符離馬援擇主良禽識馮異論功大樹知驛繞寶雞
通蜀棧山盤金馬下滇池無端竟作藏弓計自壞長城最可悲

感藍玉事書明史傳後

玉定遠人常遇春婦弟從征積功至大都督府僉事嘗從傅友德伐蜀從徐達北征同沐英討西番封永昌侯從傅友德平滇功最多從馮勝征納哈投降之會勝獲罪卽軍中拜玉爲大將軍元順帝孫嗣立撥塞上玉帥師十五萬征之至捕魚兒海獲元主次子地保奴妃公主以下百餘人又追獲吳王代王平章以下官屬三千人男女七萬餘並寶璽符敕金牌金銀印諸物馬駝牛羊十五萬餘捷奏賜敕褒勞比之衛青李靖師還封涼國公餘戰功甚多恃功驕蹇帝聞之不樂錦衣衛指揮蔣瓛告玉謀反獄詞具族誅之詞連萬五千人坐黨夷滅者列侯以下不可勝數條列爰書爲逆臣錄於是元功宿將相繼盡矣明祖猜忌甚於漢高胡惟庸之案李善長以元功勳威年齒已暮事無左證猶坐以黨逆族誅可云殘忍然猶可曰惟庸謀逆有實跡也至玉屢總大軍立功萬里勳不在徐常下功臣驕蹇武人粗暴乃事之常輒坐以謀逆族誅連及者一公二伯十三侯族誅者萬五千人之多非特無人君之度亦全無人理矣考懿文太子妃爲常遇春女玉爲遇春婦弟姻戚密邇實爲青宮羽翼其時燕王久已統兵威望日著隋唐往事未必不有動於中則玉之見忌固不獨在高祖也元功宿將相繼俱盡而後靖難之師始肆行而無忌今讀明史玉傳云下吏鞫訊獄辭云與曹震等謀爲變再則云獄具族誅之據事直書亦深知獄情之未確故列惟庸於姦臣而玉仍列諸功臣傳則千秋公論自有定也觀於玉案之發在懿文薨後一年則冤獄以媒孽而成亦較可信偶感傅友德事因成一詩論之

塞垣威望埒開平魚海蒼茫事遠征報國旌旗齊衛霍酬勳蘊醞到韓彭青宮羽翼

人思翦鋏券功名覺早萌

玉封涼國公猶鐫其過於券

萬五千人同獄具當年何止壞長城

徐中山王舊宅

明祖旣建宮城以舊內賜中山旣而悔之乃爲另建茲第今爲方伯署小樓猶祀中山像靈爽甚著

萬春花木管滄桑開國勳名有寵光田宅貽謀蕭相國豪華弈世郭汾陽河山事業英雄記骨肉君臣異姓王留得武甯遺像在燕泥零落舊焚香

東西花園

皆徐中山別墅東園在武甯橋東城下西與舊院鄰西園在城南新橋西東名太傅西名鳳臺

東園流水西園樹遺趾當年尙有無棋局風流謝安石舊家湯沐莫愁湖一篇花石平泉記百歲昇平內宴圖滄海揚塵君莫歎行人猶說舊留都

勝棋樓

在水西門外莫愁湖上華嚴菴後是明太祖與徐中山賭棋所賜至今湖租猶爲徐氏世業湖水不與秦淮通澄泓一碧皎若明鏡清涼山正當其北鍾阜盧龍映帶左右朗若翠屏隔江諸山出沒於烟雲杳靄之外最爲勝處樓下爲鬱金堂

莫愁湖上畫樓橫賭野風流憶舊京開國君王能將將傾城佳麗說卿卿推枰莫問當年事打槳偏移異代情帶礪銷磨烟水在金堂花影尙分明

隱仙菴

在清涼山虎踞關側相傳陶通明隱居於此故名明初冷鐵脚尹蓬頭諸人亦嘗遊覽菴有六朝古梅及

宋桂二株明嘉靖中重修

上界神仙足官府官府事繁仙亦苦不如棲遁向人間雲臥林壑清且閑君不見陶
通明松風聽罷聽吹笙華陽隱居當署名遺宅猶傍茲山青又不見冷鐵脚尹篷頭
天上亦是神仙流不棲碧落棲丹邱嘯傲明月天門秋齊梁之梅宋之桂老物摩挲
多古意隱耶仙耶兩不知倘遇陶公應把臂我友松壺子隱居隱公谷青峯草堂傍
山麓松下茯苓大於屋我家西湖西巖壑饒雲烟隱者林君復仙之人兮葛稚川徑
思歸買二頃田面山結屋臨飛泉枕琴醉藉松陰眠門外閒泊鷓鴣船翠屏幾疊白
雲鎖料理烟霞日孤坐謂我爲神仙也可謂我爲隱逸也可

書葉伯巨疏後

伯巨字居升甯海人以國子生授平遙訓導洪武九年星變詔求直言伯巨上書言分封太侈用刑太煩
求治太速所言痛切過於賈生用其言無靖難之師可也書奏下獄死

分封長策更無倫善處能全骨肉恩諫疏朝陳人夕死可憐星變正求言
讜論能申事最難沉吟青史惜披肝漢文有道真無比容得長沙策治安

書高巍傳後

巍遼州人尙氣節能文章洪武中旌孝行由太學生試前軍都督府左斷事以決事不稱旨謫戍惠帝時
遼州知州應詔辟巍時用事者方請削藩獨巍與御史韓郁先後請仿主父偃推恩之策勿行梟錯削奪

之謀語甚切至帝頷之而已伐燕之役命贊李景隆軍務巍上書請使燕許之勸燕王謝罪歸藩書數不報景隆敗自拔南歸與鐵鉞守濟南京城破自經死驛舍 國朝諡忠節郁疏亦切至燕師渡江郁棄官去不知所終

辛苦陳書請使燕調停骨肉費周旋義同田叔遊梁日忠比壺關說漢年慷慨圍城身百戰淒涼古驛練孤懸齊黃當日如知此早向盧溝息戍煙

金川門

在都城北面燕師之入李景隆開金川門迎降有門卒痛哭去者則太倉龔安節先生詡也

古來家國多奇變第一無名靖難兵未見削藩籌北伐翻勞破斧啓東征孝昭繼續

應相似北齊孝昭亦以叔篡姪新室安劉亦此情太息金川門下過青山依舊秣陵城

因思創業非常事內患多由立長開但令懿文承統後能禁元吉奪門來園陵景泰

多餘恨江漢宸濠亦異才一代貽謀涼德在故都風雨不勝哀璧玉之死燕王之譖也懿文救之爲明祖切責心悻

致疾既卒之後明祖察其無他因決意立太孫非一意復古也夫劉宋諸老成早經殞謝不得以孱弱之太

孫託之新進諸臣而跋扈之燕王既予以要地又假以事權并以陰譎之道衍爲之羽翼靖難之變實自明祖

忌才好殺貽謀不善有以啓之觀於葉伯巨之應詔言事則有識者早已動燭先幾使當日封太孫以名藩予

燕王以大統何至骨肉遭煨燼之慘忠義延瓜蔓之禍哉

神樂觀

在明紫禁城東南爲郊廟習樂之所相傳靖難兵至建文遜國於此行遁後之論者互有是非宮基具在

果有地道能相通耶何數百年來無人一窺其竈也今爲真武行宮在駐城防內

正是圍城四面攻如何地道遠能通不知飛燕來何事却訟潛龍去此中滄海千艘
天欲盡滇池萬里路皆窮分明殉國貽家法久已深宮一炬終

感齊泰黃子澄事因題一律

泰溧水人官尚書子澄名湜以字行分宜人官太常寺卿削藩之議二人實主之金陵破二人先已外出
被執不屈死之

削藩自古無長策授鉞非才更寡謀朝政果然數簿海強臣何說渡盧溝賈生經濟
君應愧晃令文章我欲愁儒者與人家國事可憐輕易借前籌

木末亭拜方正學墓

方正學字希直一字希古甯海人循吏克勤子幼警敏讀書日盈寸鄉人目爲小韓子從宋濂受業以明
王道致太平爲己任以吳沉揭樞薦召見太祖謂皇太子曰此壯士常老其才禮遣還後除漢中教授日
與諸生講學蜀獻王聘爲世子師尊以殊禮名其讀書之廬曰正學惠帝卽位召爲翰林侍講國家大事
輒以咨之更定官制改文學博士燕兵起廷議討之詔檄皆出其手軍事多所參決京師破被執召使草
詔悲慟聲徹殿陛投筆於地且哭且誓成祖怒命磔諸市作絕命詞就死門人廖鏞與其弟銘拾遺骸瘞
聚寶門外山上兄孝聞前死弟孝友同戮妻鄭及二子中憲中愈先自經死二女投秦淮河死宗族親戚
前後坐孝孺誅者數百人門下士有以身殉者餘坐謫戍者甚衆神宗初褒錄建文忠臣建表忠祠於南
京首徐輝祖次孝孺云成祖既殺孝孺以草詔屬樓璉璉不敢辭歸謂妻子曰我固甘死正恐累汝輩耳
遂自經或曰草詔乃括蒼王景或曰無錫王達云

高皇孽子兵威盛少主賢臣氣節端何意兵戎生骨肉爲扶倫紀剖心肝西京詔下
千行易南史書逃一字難世傳孝孺草書一篡字明史大傳不載劉基子璟謂想避忠魂北遷
去長陵蔓草不勝寒成祖曰殿下百後後逃不得一篡字下獄自經死

表忠祠弔鐵忠定公鉉

鉉鄧人洪武中由國子生授禮科給事中嘗讞疑獄立白太祖喜字之曰鼎石爲山東參政李景隆北伐
鉉督餉無乏景隆敗鉉與參軍高巍趨濟南守之使人詐降誘燕王入下鍍板擊之別設伏斷橋王未入
板驟下王驚走伏殺板倉卒不可斷王馳去憤甚攻三月不下解圍北歸帝悅擢鉉山東布政使進兵部
尙書參盛庸軍務敗燕師於東昌斬其將張玉自是燕兵南下由徐沛不敢復道山東燕王卽帝位執鉉
至反背坐廷中大罵令一回顧終不可得遂磔於市或云烹於油鼎 國朝賜諡忠定

燕師席捲下山東竟有重關不受攻羊侃臺城能保障孝寬玉壁是英雄丹心一顧
河山重碧血千秋鼎俎空遺恨景隆眞孺子荒祠猶見氣如虹

景公祠

在正學祠左祀明御史大夫景清清本耿姓眞魯人初爲北平參議再遷御史大夫燕師入詣闕自歸一
日早朝衣緋懷刃欲刺燕王不克先是日者奏異星赤色犯帝坐甚急成祖故疑清及朝清獨著緋搜得
所藏刃詰之不屈磔死籍其鄉轉相攀染謂之瓜蔓抄村里爲墟祠亦萬曆中建初金川門之啓御史連
楹叩馬欲刺成祖不尅被殺事亦相類

立孫當日知非計況有強藩匹國儲慷慨捐生方正學艱難報國鐵尙書誰扶日月

迴丹極能動星辰撼太虛今日景公祠下過緋衣仿佛颺瓊琚

感卓忠毅公事

卓敬字惟恭瑞安人洪武二十一年進士歷官戶部侍郎建文初密疏言燕王雄略類高祖不宜居北平形勝地請徙封南昌不聽敬於天官輿地歷律兵刑諸家無不博究成祖嘗曰國家養士三十年惟得一卓敬既位執繫獄使人以管仲魏徵事諷不從姚廣孝故與敬有隙進曰敬言誠用上安有今日乃斬之並夷三族萬歷初用御史屠叔方言表寔建祠同時戶部侍郎死節者郭任盧迴

南昌內徙眞良策何事當年議不同從此兵端生薊北遂令烽燧達江東心隨龍比

千秋上名在齊黃列傳中盧郭清流俱殉國至今農部憶三忠

一作容易一言三族
盡誰鐫頑鐵謝孤忠

書姚廣孝傳後

廣孝長洲人年十四爲僧名道衍字斯道事道士席應真得其陰陽術數之學相者袁珙謂其形似病虎性必嗜殺劉秉忠之流則大喜高后崩太祖選高僧侍諸王爲誦經薦福燕王請道衍以從惠帝立削奪諸王道衍勸燕王舉兵戰守機事咸取決焉永樂二年拜資善大夫太子少師復其姓賜名廣孝諡恭靖廣孝少與王賓友善及貴至長洲訪賓賓不見遙語曰和尚誤矣往見其姊姊拒詈之熙中加贈少師配享成祖廟廷嘉靖中撤祀大興隆寺成祖以叔篡姪廣孝首發其端陷君子惡功之首實罪之魁千秋萬世公論具在非特高祖惠帝之罪人亦成祖之罪人也京師某僧寺中尙有塑像房山尙有遺塚惜無有楷貳負之尸磔蚩尤之醜者

高祖僧爲帝神孫帝作僧修羅兵劫惡一樣佛傳燈

削藩密議成靖難釁端起何物禿鷲啼飛來食龍子
歛威驕病虎翊運詔真龍未生方正學竟族卓司農
故人不得見女嬃尤可哀空爲和尙誤那得好人來
立嫡高皇命髡奴敢亂常何年鑄頑鍊長跽孝陵旁
三百年來事浮漚水上飄興亡容易過祇有孽難消

翁夫人血影石

夫人侍中黃觀妻觀字伯瀾一字尙賓貴池人官右侍中燕師南下觀募兵上游聞城破自沉羅刹磯下
燕師入城以翁氏及二女給象奴夫人攜二女及家屬十人溺柵洪橋下死遂葬岸側夫人先嘔血石上
遂成小影石今在祠中

半月無光燕飄瞥烈女忠臣同殉節侍中墮江江水清夫人墮河河水潔柵洪橋西
一坏土孤鸞雛燕葬同穴小影何年石上沁此石貞石血碧血江水西來響嗚咽萬
歲千秋影不滅

秦淮弔方正學二女自沉殉節處

燕師之入孝孺妻鄭氏及二子中憲中愈先自經死二女投秦淮河死

靖難兵來怨氣深忠臣奇節盛如林何如正學當年事十族捐生二女沉
不應開國誤貽謀辱及妻孥世所尤十里秦淮金粉地獨餘高節重清流

靖難忠臣祠

在朝天宮東萬曆二年立祀惠帝死節之臣崇禎五年賜諡 國朝乾隆五年

命廷臣議爲專諡通諡之典守臣因舊祠廓大之

高皇造天下辛苦植彝常各矢君臣義同爭日月光燕飛終寂寂龍戰任茫茫太息
長陵土燕久夕陽

徐妙錦墓

妙錦徐中山王季女端靜有識長姊仁孝皇后次姊代王妃妹安王妃洪武末諸王不靖代王被逮妙錦感誓不適人親王求婚皆拒絕之仁孝崩文皇聞其賢欲聘爲后命內使女官往諭旨妙錦稱病不出女官直抵榻前不得已乃徐起曰吾無婦容不足備六宮之選內使歸妙錦卽削髮爲尼文皇聞之竟虛中宮不復冊立洪熙改元乃返初服宣德初仁廟張太后自入東宮時聞其高潔心加敬慕乃徵入朝旣敝戚里恩自稱徐達第三女肅拜端凝不失跬步太后以下皆尊敬之隨遣內使護歸正統中卒耐葬鍾山先塋之次俗傳拒命投井者謬也

鳳詔曾聞却九重青蓮花下暫留蹤高飛久已輕來燕定力真能制毒龍翠水瑤姬
原絕代青天玉女自成峯賜塋西畔埋香塚應有孤鸞嘯古松

鍾山告天文石刻

凡二通一書洪武三十五年一書永樂四年皆朝天宮道士淵然於鍾山朱湖洞天告行係前明追薦設

醜祈福之文理石山頂乾隆四十三年爲樵者掘得報官飭送朝天宮貯藏今尙存其詞云奉大明皇帝聖旨伏爲皇考太祖高皇帝妣孝慈皇后登遐日遠痛懷喪葬之勿親崩失年深益感劬勞之未報手足日傷於先帝情懷有慟於死生骨肉相殘幾致屏翰之傾替腹心構訟幸茲家國之安全云云其洪武三十五年卽建文四年壬午之歲此革除年月之證夫惠帝以太孫繼統諸王皆尊屬據地擁兵尾大不掉此誠明祖貽謀之不善帝不思增修國政偏聽儒生之謀一意削藩致釀巨變亦誠不能無咎而燕王摧殘骨肉殺戮忠良天下後世公論具在乃欲以飾非文過之辭上瀆彼蒼是人不可欺而竟欲欺天矣異哉

骨肉摧殘事可憐千秋遺恨說金川縱令刻石堪埋地未必盟心可告天景鐵叢祠餘宰木齊黃孤塚臥荒烟曾聞正學書丹陛一字能令萬古傳

登報恩寺浮圖

報恩寺一名建初寺一曰長干寺一曰阿育王寺在聚寶門外吳赤烏開天竺國人康僧會東游至建業言阿育王役鬼神起塔事禮請三七日得舍利吳大帝爲建阿育王塔號建初寺言江南建塔之始也自後代有興廢宋改天禧寺元改慈恩旌忠寺永樂十年敕工部重建大報恩寺造九級琉璃塔至宣德六年凡二十九年始成法輪金碧照耀人天誠爲鉅觀永樂之爲此殆自知殺戮過重藉佛力以懺除惡業耶

靖難師來孰閉門孝陵雲樹黯消魂忠臣已盡神孫死却建浮圖說報恩

兒女英雄各有人舊都遺事說紛紛六朝祇在斜陽裏半是青山半白雲

浮泥國王墓

在石子岡淳泥國名永樂中來朝病卒賜葬於此諡恭順

石頭城畔名王墓賜葬當年禮秩優萬里故都滄海遠六朝殘月白門秋遺墳莫誤
前三國歸夢應尋大九州何幸中華得陪葬孝陵雲氣接松楸

靜海寺

在儀鳳門外廬龍山西永樂以海外平服因建此寺按永樂命內監鄭和等統舟師徧歷西蕃諸國藉訪
建文蹤跡今劉河天后宮有通蕃事跡石刻此寺其流亞也

樓船萬里劇蒼茫竟欲乘槎覽入荒龍去定知歸海島燕飛終是怯斜陽縱令絕域
圖王會從此兵權屬內璫太息深宮枉心計長陵蔓草不勝長

五穀樹

明內監鄭和自西洋攜歸一在天界寺一在報恩寺相傳可驗年歲豐歉故有是名

樓船十萬泰西迴此樹曾隨舶趕來移植遠從鸚鵡地托根終傍鳳凰臺種分蕭寺
雙株老花爲豐年幾度開野史紛紛說三寶貂璫亦自不凡才

明武宗釣魚處

徐中山東園一名太傅園在武定橋東城下西與舊院鄰王弇州名園記謂武宗南幸於此設釣今釣魚
巷得名以此

太傅勛勞重名園夾岸開詩人題鳳去東西二園相近西園一名鳳臺園以鳳凰臺得名帝子釣魚來祠墓殘碑

在河山故國哀斜陽話金粉白石黯秋苔

過明大內感媚蘭仙子事

夢樵詩話載南甯伯毛舜臣留守南都麗掃舊內見別院牆壁多宮人題詠有句云寒氣逼人眠不得鐘聲催月下斜廊款曰媚蘭仙子

媚蘭仙子題詩處家國滄桑故苑荒何處夜鐘聲不定更無寒月下斜廊
想見嬋娟絕代妹流傳一字一明珠闌干影裏秋如水誰寫深宮夜怨圖
開國君王說愛才青邱往事最堪哀夜深宮禁清冷地可有金鈴吠影來

孔雀庵

相傳爲馬湘蘭故居水月庵是其遺跡湘蘭名守真詒詩善畫西曲中翹楚也

翠袖人何處空吟白練裙含光弔佳俠感舊憶夫君畫舫春前水紅樓日暮雲佛烟
消綺業花雨落紛紛

秦淮感鄭妥娘事

鄭如英字無美小名妥如臬冒伯麀集無美及馬湘蘭趙今燕朱泰玉之作爲秦淮四美人詩錢牧齋採其詩入閩集所云閒開閩集教孫女身是前朝鄭妥孀是也孔東塘桃花扇樂府過事醜詆因爲正之

傳唱詩篇總擅名當年誰似鄭如英流傳閩集今猶在何處青溪繞石城牧齋詩選以青樓詩

入閩集

羅袂春寒絕妙辭桃花紅濕雨絲絲詞人月日真無定雪嶺纔登又墨池

如英閨怨詩
曲曲迴廊十

二闌風飄羅袂怯春寒桃花帶雨如含淚只恐多情不忍看

回首鶯花舊院春板橋流水碧鱗鱗祇應水繪園中客解說秦淮四美人

孔雀荒庵易夕曛消愁何處酒微醺雙跌何與詞人事也唱當年白練裙

酒是消愁物
能消幾箇時

馬湘蘭句也白練裙樂府鄭應尼爲湘蘭作

青溪訪顧眉生眉樓遺址

顧媚字眉生又名眉莊妍靜雅風度超羣通文史善畫蘭追步馬守真而姿容勝之所居曰眉樓在青溪
桃葉間肥歸合肥龔芝麓尙書乞畫者動盈篋筒款署橫波夫人者是也尙書入國朝元配童夫人以
曾受封明代不肯膺兩朝封典眉乃改姓徐氏受夫人封尙書有白門柳傳奇行於世事詳板橋雜記及
定山堂詩集

艤棹青溪水閣頭居人猶說舊眉樓春山何處窺明鏡新月依然上玉鈎身世滄桑

悲永逝閨房福慧悔雙修含光同被虛聲誤皖水虞山一樣愁

謂河東君

汪文毅公祠

汪偉字叔度江甯人崇禎戊辰進士授慈谿令多異政擢簡討分較禮闈同殉難之孟章明所得士也荆
襄失守上江防疏上嘉之城破書壁云身不可辱志不可降夫妻同死節義成雙並作家書寄長子與繼
室耿氏同死節墓射烏山石佛庵王潢有華山會葬汪文烈公暨耿夫人詩云仗節人臣事同心婦烈彰

幽宮蹲虎豹高塚臥鴛鴦皎日沉青鏡悲風起白楊夜深環珮響攜手共翺翔松檟鬱蒼蒼泉臺影梵堂
雪翻層石浪華滿衆山香執紼荒阡外懸碑古道旁墓門三尺土千載握椒漿

國朝乾隆中

賜諡文毅建祠江南

賜田七十畝春秋祀之祠在古城隍廟北

話到前朝事艱難愴甲申孤忠偕繼室報國重詞臣碑碣風雲護祠堂草木春孝陵
雙闕在一爲弔斯人

百川橋弔明殉難乞兒

南都之變有乞兒題百川橋柱曰三百年來養士朝如何文武盡皆逃綱常留卑田在院乞丐養存命一
條投橋下死其賢而隱於丐者歟垂紳委佩諸人過此應增媿矣百川橋明宮城御河入城濠之所經也
爲詩弔之

擊筑悲歌客吹簫乞食人江山自戎馬天地正風塵身世原庚癸乾坤又甲申倫常
無貴賤一死謝君親

史墩是史閣部別業今爲酒肆

史可法字憲之號道鄰大興籍祥符人母夢文天祥而生崇禎初進士由推官入戶部至郎中出任守道
巡道監軍江北屢擊敗流賊馬守應羅汝才李自成等於桐澗城潛山滁州廬州遷安慶巡撫提督軍務

連敗賊英山六合丁憂服闋起戶部侍郎總督漕運兼僉都御史巡撫鳳陽淮安揚州濟南河釐漕政擢南京兵部尙書參贊機務奏行更新久弛武備八事李自成陷北京誓師勤王渡江抵浦口遇鳳陽總督馬士英等發兵迎福王由崧於淮安衆推可法輔政京士英旋入閩改可法武英殿大學士兵部尙書督師淮揚追敍江北戰功加秩至太傅兼太子太師李自成爲大清兵擊敗西竄可法疏請分責江北鎮帥經理山東河南自簡精銳直指秦關扼流賊歸路士英斬餉不發諸鎮遂巡自相攻奪可法受王令驅除講解行不張蓋食不重味夏不篷冬不裘寢不解衣素善飲酒在軍中絕飲歲除遣文牒至夜半倦索酒無殺可佐取鹽鼓下之嘗言今非昔比合籌兵籌餉無議論舍治兵治餉無人才每繕疏聲淚俱下

大清兵下江南入援抵燕子磯令救盱眙趨天長聞泗州援軍覆沒急返揚州檄徵各鎮兵無一至者大清兵圍揚州率在城文武登陴禦戰以舊城西門險要自守之 大清兵用大礮擊城西北隅遂克城可法作書寄母妻自刎不殊一參將擁出小東門可法大呼曰我史督師也被執就刃死本朝順治二年四月事也從死者兩淮鹽運使楊振熙揚州府任民育同知曲從直王纘爵江都知縣周志畏羅伏龍監餉知縣吳道正江都縣丞王志端賞功副將汪思誠幕客盧渭公無子以副將德威爲子公死遺骸不可辨識踰年家人舉袍笏招魂葬於揚州郭外之梅花嶺乾隆四十一年

高宗純皇帝賜諡忠正制曰取義成仁式著艱貞之烈易名表行爰昭獎卹之公眷致命之可風曩迹未湮於異代期扶綱之攸賴休稱允協於千秋爾故明督師太傅武英殿大學士兵部尙書史可法砥行能堅秉誠克裕遭時坎坷恆仗節以無撓殉義從容竟捐生而不悔朕覽披信史軫念忠微予褒顯於崇祠用隆秩祀示表章於往籍載錫嘉名象厥生平諡爲忠正於戲溯流芳於頑廉懦立節或重於泰山彰定論於世遠風徽榮更逾於華袞幽光特闡鑒當年傲日之心正氣威伸勵萬古疾風之節欽茲茂典慰爾英靈(又)

御製賜題彭元瑞所進畫像家書及復睿親王書勸石揚州祠壁墩今不知其處公遺書云願得以骸骨歸葬
鍾山之側官訪求遺趾爲公建祠亦賢士大夫之責也

秣陵花月總銷魂剩有當年別墅存留與南朝說遺事謝公墩後史公墩
北來萬馬飲淮流四鎮兵驕一哭休義士三千同日死一城碧血在揚州
女牆二月石城潮白下啼鳥夢不消舊內落花孝陵樹酒人墮淚說前朝

書厲太鴻開平王孫種菜詩後

常延齡字喬若開平王十四世孫伉爽有大志既襲侯封遇事敢言前後條陳利弊疏凡十二上皆切時
弊上深眷之時科臣姜琛行人熊應霖以劾首輔下獄延齡疏請釋二臣而以文彥博救唐介爲輔臣勸
朝論黜之馬阮握政延齡復露章糾劾忤權臣意卽挂冠去爲僧號蒼谷居村庵中灌園自給死無以殮
友人白大生等醮金葬之室徐氏魏國公女躬操井臼辟纒而食荆布不充毫無怨尤人以爲難有湖孰
種菜圖太鴻見而題之也

家國滄桑裏江山戰伐中空山無寸土種菜亦英雄

鐵券誓山河功臣孰最多全家能報國祇有沐天波

天波西平後人從
桂王死緬甸之難

華表鍾山麓青松噪暮鴉莫愁湖上水今尙屬徐家

莫愁湖今尙
爲徐氏世業

明故宮遺趾今爲將軍駐節處

雲裏分明舊鳳城中春樹久無聲當年帝子宮槐陌今日將軍細柳營儘有銅駝

悲晉代久看玉馬會周京六朝往事都如此江水東流無限情

聽友人話南都遺事作

可有長門作賦才同時家國總堪哀君王心事無人識不問微時故劍來
祁阮同時並絕倫滄桑身世最銷魂不迎漢后歸金屋翻遣明妃出玉門
一樣南朝玉樹花景陽宮井又啼鴉興亡草草都相似可惜無人似麗華
花月南朝祇一年洛陽青蓋最堪憐美人自擁桃花扇狎客空題燕子箋

詠南都遺事

錢塘女史汪端小韞

離宮處處麗朝霞玉貌昭儀豹尾車幾見椒塗容故劍又看鳳詔選良家龜年白
髮談天寶夷甫元言誤永嘉若比黃奴應有恨無人解唱後庭花

分明戰艦下南唐酒勸長星尙未央鐵甕高昂終跋扈石頭陶侃孰勤王張巡力
盡孤城墮韋粲營荒碧血涼惆悵延秋城外走青驪還過孝陵傍

大忠橋弔明督師大學士黃忠端公

公諱道周漳浦人學行見重於天下崇禎中劾楊嗣昌陳新甲方一藻召對平臺反覆抗論坐謫戍南都
亡見唐王請募兵江西得義旅九千人出徽州遇大兵戰敗被執至金陵不屈死之大中橋在青溪公
殉節處今亦稱大忠橋乾隆中

欽定勝朝殉節諸臣錄曰黃道周碩學清操孤忠亮節克全儒行無媿貞臣今論忠端

慷慨論思日從容殉國晨當年重儒行後世惜貞臣高節知心苦遺文見道醞忠魂
渺何處風雨共悲辛

杜茶村墓

茶村名濬初名詔先字于皇號西止晚號茶村老人黃岡人明副貢生前進士祝進子祝進字退思濬與
弟昇專力學古稱二杜入南雍與余懷白鼎齊名兩司成品題甲乙無出三人右者授司李不仕年二十
餘隨祝進隱居金陵繼遼海柴桑之躅築鐵鳳軒變雅堂於雞鳴巖峻曠立名節簡傲豪上不可一世
意所不可與論文不合輒攘臂與爭卽貴人不少假以故多與俗忤尤侗所云杜陵布衣踞詞壇白首罵
座僮與蠻著其實也時楚風尙鍾譚濬師杜甫喧啾百鳥孤鳳獨鳴嘗詠東坡詩二十字又賦燈船鼓吹
歌爲時所歎服吳偉業嘗語人吾於五言近體自得杜于皇而一變曹秋岳謂論詩於今日布衣之士吾
必以杜于皇爲巨擘瓜蒌蔣易以高隱重與濬尤契濬客死邗上易與太守陳鵬年友蔡仍玉葬之於太
平門外著饑風軒詩集變雅堂文集茶村生平喜嫚罵身後有富人購其稿焚之故所傳甚少

國初諸老輩人說杜茶村遺稿成灰燼孤墳少子孫江山詞客重姓氏布衣尊太息
城東路寒鴉繞墓門

乳山訪林古度故居

古度字茂之號那字閩之福清人孝廉章子章字初文負大志嘗獻書闕下不報歸而下居金陵華林園
側具亭榭池館之美古度與兄君遷皆好爲詩與曹學佺友善少賦搗鼓行爲東海屠隆所知遂有名詩
多清綺婉縟之致有鮑謝遺軌與學佺相類萬歷己酉壬子間楚人鍾惺譚元春先後遊金陵古度與沂

大江過雲夢憩竟陵者累月其詩乃一變爲楚風甲申後徙真珠橋兩陋巷掘門蓬蒿蒙翳彈琴賦詩弗輟也王士正司理揚州每集名士泛舟紅橋古度年八十五士正親爲撰杖晚益貧窶冬夜眠敗絮中自以孤鶴入蘆花爲喻夏乏蚊幃施閨章寄贈一具而題詩其上恐其入質庫也兒時佩一萬歷錢至老不去身王士祿有兒日一錢子句指此白雲先生陳昂織履於市古度物色之世以爲知人古度嘗語士正曰屈指平生師友皆化爲異物每開卷見其姓氏輒作數日惡千秋之事今以付子卒年九十後士正命門人殷譽慶程哲梓之且曰此五十年挂劍之約也歿三年周亮工葬之鍾山之麓或云後居乳山有江東父老小印

書臺留處士吟社集遺民史事三朝熟遊蹤五嶽頻松雲晨避客蘿月夜窺人何處
幽居在茆茨古澗濱

跋

山水之美莫如錢塘花月之娛厥惟吳苑兩美必合兼之者其惟秣陵詩人著籍王昌齡冷朝陽外概不多見太白遊跡較多然鳳凰臺上一篇亦未突過崔顥黃鶴樓也錢塘陳頤道先生以海涵地負之才羈宦吳下者十有四年金陵大府節鉞所在曾未一至今年秋始以公事蒞白下寓延陵氏水榭者浹旬晝覽江山宵詠花月剪燈命酒潑墨題襟得詩三百餘篇皆登臨山水詠懷古蹟表章忠烈分別賢奸之作吞花臥酒亦閒及之並考訂地輿證其謬誤蓋先生於史學最深茲編尤擷吳志晉書南史南唐書之精參以丹陽建康實錄景定嘉泰諸志用能上追六代下掩三唐含吐沈任凌轢鮑謝昔先生在京師刊碧城仙館詩集及官江表又刻頤道堂詩集其中岱遊灤遊銜其山川自成一編咸可觀覽茲集尤鉅細兼綜微顯畢貫清華簡要又爲集中另開一境行見人握隋珠家寶和璧則是集之傳以爲詩集也可以爲圖經也可以爲史論也亦無不可世有桓譚將與其證之也 尙之侍先生几席最久茲遊舟車並從往來用就見聞所及敘其大略云爾

嘉慶己卯八月吳門徐尙之拜跋

期 限 表

中華民國二十二年十月出版

國立北京師範大學

圖書館



書號 928.402/384

第 冊

登記號 52842

(金陵歷代名勝志) 全一冊

述 店 局 店

翰文書店最新出版

金陵歷代名勝志

江寧陳文述著

一册

實售

金陵勝蹟志

上洋胡祥翰著

一册

實售
五角

金陵園墅志

江寧陳詒紱著

一册

實售
五角

金陵莫愁湖志

江寧馬士圖著

一册

實售
四角

金陵後湖志

上元王曼犀著

一册

實售
二角

南京朱雀路四象橋北